

(欽定)平定七省方略

北京中國書店印行



THE HISTORY OF THE

THE HISTORY OF THE

THE HISTORY OF THE



欽定勦平粵匪方略卷一百二十四 乙卯年

三月十三日 乙亥 和春福濟奏言欽奉

上諭王茂蔭奏請飭已革巡撫張芾前往徽甯一路防堵著和春等酌量情形奏明辦理伏查徽甯兩郡紳士旣多民情浮動不可無大員統帥張芾曾任封圻辦事實心 臣等已咨會該員無論行抵何處迅速折回堵禦合無仰懇

天恩飭令張芾會同已革提臣鄧紹良學臣沈祖懋統
兵進剿並請

飭下怡良就近撥兵勇一二千名交張芾統帶星夜赴
援庶可速資防剿

和春福濟又奏言賊由青陽竄入石埭當卽飛
飭各屬嚴守要隘旋據甯國府知府鄧瀛稟稱
舉人王祥儲等督率團勇於正月二十七日馳

抵石埭城下殺賊多名登時收復其另股賊匪
四千餘人由鵝橋竄抵牛角井圖襲涇縣窺伺
郡城經遊擊楊瑞乾知縣曾承禧等統帶兵勇
一千餘人會同團丁分三路起程在錢村地方
卽與賊遇正相持間楊瑞乾率勇衝入賊隊守
備楊萬清等帶勇抄出賊後夾攻賊衆大亂我
兵乘勝追殺直至銅繁二縣境地共斃賊三百

餘名又據向榮咨有二月十三日賊竄徽州之
語伏思皖省地方惟徽甯稍稱完善江南各省
又惟浙江未被逆氛疊獲奸細皆有竄浙之供
該處重山峻嶺鳥道縈紆實爲緊要門戶查已
革提督鄧紹良久歷戎行軍情熟悉現准向榮
派由黃池進勦仰懇

天恩飭令該員在徽甯一帶駐紮督辦藉收指臂之效

福濟又奏言查候選同知黃恩彤由廣東巡撫
降調現居原籍辦理團練動合機宜如令效力
戎行必當益加策勵合無仰懇

天恩飭令黃恩彤來廬差委奏入

上命軍機大臣傳諭和春福濟何桂清曰和春福濟奏
請飭怡良撥兵勇一二千名交張芾統帶赴徽甯一
路督辦防剿等語張芾係發往軍營差委之員該提

督等請明降諭旨令其馳赴徽甯調度各軍於事恐
爲無益現在鄧紹良已過浙境各路赴徽援剿兵勇
均歸調遣昨復諭知何桂清督飭該員迅圖剿辦若
再另派統率之人轉致事權不一張芾著仍遵前旨
交和春等差遣委用是否令其卽赴徽甯隨同攻剿
並著何桂清酌量辦理怡良駐紮常州帶兵亦屬無
多徽郡兵勇經向榮何桂清派往者已有數千毋庸

怡良等再事抽撥至廬州軍營卽使差委乏人亦何
至專保廢員始收指臂之助福濟所請令黃恩彤赴
廬州差委之處著不准行

和春福濟又奏言欽奉

上諭袁甲三已交部嚴加議處其所帶兵勇著和春等
酌委得力大員接替等因查有現辦團練侍衛多慧
幹練老成機宜熟悉臣等已飭該員剋日前往

臨淮接替所有袁甲三原帶文武將弁悉歸節制以一事權

和春福濟又奏言廬州逆匪前被官軍連破巢穴殲斃甚衆城內尙餘賊數千人臣等連日督兵圍勦該逆憑城拒守防備極嚴前焦湖突來援賊二三千名經郎中李文安等率勇擊退因偏近舒巢無爲州等處恐其去而復來臣等又

添派侍衛多慧遊擊塔思哈帶兵勇五百名馳往焦湖一帶接應二月二十五日無爲州廬江兩處約有賊匪二千人由盛家橋三河鎮一帶分竄該侍衛等率領兵勇前往攻勦至小尖山地方適遇逆匪分兩股來撲我軍分途迎擊斃賊多名賊匪紛紛敗退查該逆兩次來援均爲我軍擊敗第巢縣舒城廬江無爲州尙爲賊踞

其焦湖一帶現在多慧前赴臨淮防堵仍令李文安等極力堵禦使其無從竄入臣等一面督兵堯勦以冀迅復堅城

和春福濟又奏言准秦定三來函舒城東路地面遼闊緊接廬江三河等處爲逆匪往來之路必須偏近添築營盤方可斷其接濟二月二十一至二十九等日督兵出隊仍一面在西門六

安門城下趕築營壘該逆突出千餘人意圖衝
撲我軍奮勇迎戰斃賊十餘名立時敗退卽令
兵勇移進新營扼住該逆出入咽喉又准忠秦
咨開二月十九日分攻各門賊伏不出我軍設
法搭橋繞過南岸搶上賊船殺賊十餘名二十
二二十四等日督兵進攻船上及城內賊匪各
突出千餘人抗拒兵勇奮力殺賊多名並奪獲

西門外礮臺二座 臣等仍當嚴飭相機進剿以
期淨掃賊氛奏入均報

聞

十四日 丙子 署陝西巡撫載齡奏言接西安將軍

扎拉芬咨會奉

旨著扎拉芬卽帶兵前赴湖北探明襄樊何路緊急卽
由何路進攻等因現在該將軍統帶潼關固原等兵

共二千一百名已於三月初四日起程 臣查由
楚入陝要隘棗陽最爲喫緊入陝尤爲便捷恐
我兵俱顧襄樊該逆聲東擊西難保不乘虛由
棗陽直犯商南可否請

旨飭下扎拉芬駐紮棗陽距襄樊不過百餘里聲勢相
通堪爲犄角之勢於會同攻勦亦不致坐失機
宜奏入

上命軍機大臣傳諭扎拉芬載齡曰據載齡奏請飭扎
拉芬駐紮棗陽扼守由楚入陝要隘等語該將軍帶
兵赴楚原爲探明賊蹤以勦爲防現在該逆上竄尙
無定向若扎拉芬專駐棗陽轉成株守且本月初三
遞到楊需奏報已由棗陽縣拜發該處防堵情形諒
已妥爲布置該將軍早已起程務須確探賊蹤如棗
陽緊急卽會同楊需截勦儻該逆紛竄他處卽當帶

兵迅出賊前迎頭截擊切勿祇顧一隅致誤事機

同日

上命軍機大臣傳諭僧格林沁德勒克色楞西凌阿崇
恩曰前此僧格林沁故撤高唐南面之兵原爲誘賊
離巢追殺易於得手乃自竄踞馮官屯以後又已月
餘該逆抵死堅匿而官軍竟無計可破前月二十九
日之戰甚至傷亡兵勇遺失礮位似此情形轉不如

任其坐困高唐猶得以糧盡制其死命該大臣所用
水攻之法現已竣工惟聞該屯地勢微高逆賊在濠
內添土築壘巧爲抵禦是水勢雖形暢旺不過灌滿
四面濠溝而止該逆在屯內仍能暗施詭計卽現在
掘濠厚灌自下而上亦難得力如果此舉再無成效
該大臣又計將安出以萬餘兵勇圍數百之賊百計
經營迄無把握朕心實深焦灼著僧格林沁卽將現

在水勢若何攻勦能否得手及水攻儘不可恃應作何設法之處迅速具奏至撥赴河南之馬步隊官兵四千名業經降旨令赴湖北迎勦河南兵力空虛防堵倍形喫緊著僧格林沁會同崇恩卽行選派三四千名派委得力將弁管帶前往河南交英桂調遣專備該省防堵之用仍咨明英桂沿途迎提毋任稽留延緩

十九日辛巳僧格林沁德勒克色楞西凌阿奏言

本月初四日引河工竣初五日先將圍濠灌滿
隨復向北浸淹惟馮官屯地勢微高現雖將水
浸入賊濠二道深已三四尺不等濠外低窪處
所亦有一二尺尙未能浸灌逆匪地窖臣等輟
轉思維若啟隄水勢過大恐引河內漫溢有礙
民田若先將引河兩岸培厚加高又恐工程浩

大不敢輕舉惟有趕造水車用人力掣灌方爲
萬全現已趕緊製造以資應用且該逆詭謀惟
恃挖地雷前於放水次日見西北溝內漂出
藥袋藥篋甚多自係該逆暗放地雷之所此時
地已溼透斷難施此伎倆至前次撥赴豫省馬
步隊官兵業於初二日分起前進初八日全數
起程又奉

諭旨著會同崇恩選派山東官兵三四千名赴豫查現
在東省兵力單薄惟豫省防堵尤關緊要臣與
崇恩悉心籌度現擬選派官兵一千名東勇一
千名卽日馳赴河南聽候調遣

同日英桂奏言臣因楚北逆氛復熾豫省南汝
光一帶均與毗連信陽尤爲緊要親往該處督
防連日疊據探稟分竄德安之賊長髮不過千

餘名裏脅約三千餘人有楊昌泗劉富成督兵
迎擊下游賊匪分踞團風蘄水有窺伺麻城羅
田之意督臣楊需現在棗陽催集兵勇與胡林
翼等合軍進攻各等情臣沿途飭屬嚴加防範
並催令兵勇冒雨前行途次接奉

諭旨前令僧格林沁挑選馬步精兵三四千名赴豫等

因查僧格林沁來咨官兵內有馬隊一千五百

名臣思信陽南陽山路崎嶇馬隊難於施展荆襄水陸交衝馬隊恐亦不能得力合無仰懇

天恩飭下僧格林沁截留改撥庶兵歸實用餉不虛糜至豫省南路邊防南陽固關緊要信陽及光商等州縣逼近逆氛路徑紛歧防不勝防鎮臣邱聯恩雖紮營西雙河居中控制而三關兵力究形單薄仰蒙

俞允績調北路官兵亦恐緩不濟急臣初十日行抵信陽卽將河北鎮餘丁五百名分駐三關以壯聲威復飭光山等縣添募壯勇加意堵截俟確探賊蹤所向卽與鎮臣分投馳勦均奏入

上命軍機大臣傳諭僧格林沁德勒克色楞西凌阿崇恩曰據英桂奏前派馬隊一千五百名於荆襄一帶地勢不甚相宜請截留改撥等語此項官兵據僧格

林沁奏派常亮等帶赴信陽防次業經起程卽可毋庸折回改撥其續調山東兵勇共二千名務卽挑選精壯步隊飛催前進馮官屯賊匪爲數無多我兵圍剿月餘尙未殄滅實深焦急據奏水攻之法尙須趕造水車用人力掣灌不免又稽時日總須著力攻勦勿徒恃水攻方爲妥善

上又命軍機大臣傳諭英桂曰據奏荆襄一帶馬隊不

能得力欲請飭僧格林沁截留改撥自爲相度地勢起見惟此項官兵已據該大臣奏卽日兼程前進自應仍赴楚北以資攻剿至豫南防堵緊要本日據僧格林沁奏選派兵勇共二千名前往河南交英桂調遣以防賊匪北竄俟此項官兵抵豫後或可與常亮所帶馬隊官兵互相調換以期得力現在賊踞德安南汝光商均屬接壤英桂已抵信陽卽可就近調度

邱聯恩現赴三關堵禦著飭令該總兵加意嚴防以
固邊圉

同日托明阿陳金綬雷以誠奏言據分防浦口
總兵武慶等稟稱三月初七日水陸鎮將等約
會吳全美王鵬年李德麟等聯艘齊進一面卽
沿北岸水陸進攻武慶等督帶陸路官兵由三
板棹地方直擣九洲葉常春等率領兵勇快

船與李德麟等徑取橫江箠練但見賊隄及守
練之賊船齊開槍礮我師分投迎擊立毀賊隄
數處轟沈賊船多隻乘勢奪取賊箠將賊練全
行斬斷吳全美等卽督紅單拖罾各艇由江心
搶上並有六合浦口各勇暨分防觀音門之守
備彭常宣等駕船協勦共擊沈賊船三十隻奪
獲賊箠三十餘座又據焦山水師總兵周士法

等稟稱於初七日進攻金山賊營瞭見瓜州江
面賊箠隱動又有賊從北固山隄內開礮我軍
隨卽分隊一面迎擊賊隄一面泝流直上專攻
賊箠縣丞周閑等奮勇搶近槍礮齊發賊勢不
支淹斃無算奪得賊箠四隻該逆復由鎮江大
馬頭駛出賊船多隻欲搶木箠續被我師擊退
將箠帶回焦山各等因 臣托明阿現與吉爾杭

阿往返札商一俟晴霽卽南北約會分攻瓜鎮
兩城仍飭水師力勦金山賊營斷其接應

同日向榮奏言據吳全美等稟稱日來水勢加
長各船準備進勦三月初六日夜間見下關火
光達旦料賊必因水勢衝激練檔連夜搶修救
護正可攻其不備當知會總兵葉常春等將浦
口局艇助攻策應令山東水勇攻九泐洲賊營

六合水勇攻七里洲以分賊勢初七日王鵬年督領頭隊各船由中流直上吳全美率左隊各船向南岸一帶進攻李德麟領右隊各船沿北岸繼進行近七里洲沙嘴該逆礮臺礮隄一齊開礮我船乘風衝偪大礮疊轟擊倒隄內哨樓數座該逆由關口突出大小礮船八九十隻攔頭抗阻我船齊力轟擊時吳全美左隊各船已

沿南岸抄到擊沈賊船二十餘隻九洲賊匪
礮船又駛出七八十隻同來迎拒經右隊李德
麟各船自北岸衝上兜截兩面環轟賊船紛紛
擊損其時王鵬年頭隊各船將護練賊船擊沈
多隻餘船恃其兩岸礮臺密護拌死開礮拒敵
守練不退王鵬年卽親督把總張占魁等飛駕
三板划船攜偏筭練從狂濶密礮之中立將賊

練斬爲數段砍散檔簿賊船見勢不支揚帆敗
逃下關口又搶出大礮船數十隻意欲抄我後
幫牽綴前隊其頭道賊練敗匪亦蟻聚二道賊
練之下合併拒守吳全美等仍督頭隊斬練船
隻乘風直上適總兵葉常春副將周希濂分領
浦口局艇從兩岸勦洗而來並會同六合山東
之勇由七里洲九洑洲夾攻接應共擊沈三十

餘船該逆敗退我軍頭隊各船已將二道練下
賊船擊覆不少餘船見我師船礮猛烈棄練遠
颺當經遊擊唐國棟等乘勢將二道賊練立時
斬斷該鎮將卽分率紅單三十五隻拖罾六隻
並各三板快艇山東水勇划船全幫駛出上游
乃二練敗竄各船又糾合上面賊船五六十隻
回環開礮復來阻截我師王鵬年督令迎戰吳

全美李德麟各率三板多隻駛進遂將賊船八十餘隻全數沈擊焚燬伏思師船攻出上游卽可節節扼勦惟聞梁山尙有賊匪安設攔練礮船林立蕪太逆黨嘯聚甚衆必須迅籌陸路一軍馳往沿江接應使我船不致孤軍深入方無旣進復退之慮昨據遊擊蕭知音稟稱探有賊船五六百隻由楚皖竄回蕪湖欲分水陸兩途

來犯黃池甯國等語查鄧紹良赴援徽州該逆
聞風遠颺徽境漸次肅清今黃池既有警信自
應移緩就急以固要衝當飭鄧紹良馳回防剿
臣一俟鄧紹良回抵黃池卽統率兵勇出取蕪
湖並抽兵出剿太平金柱關以便迎會舟師合
擣兩梁山之賊至此次斬練前進掃蕩賊船吳
全美李德麟每戰身先均堪嘉獎而已革總兵

王鵬年首先進攻斬斷賊練尤爲奮勇可否請
旨免其前罪仍

賞給五品頂翎

向榮又奏言臣營兵力太單不敷分布又均係
步兵追賊難期迅速可否仰懇

天恩於高唐得勝之師內

飭調吉林馬隊一千名趕緊來江助剿均奏入

上命軍機大臣傳諭托明阿向榮吉爾杭阿陳金綬雷以誠曰紅單各船水陸進攻斬斷賊練兩道焚燬賊船三百餘隻水師初次得手正可乘此聲勢南北約會分攻瓜鎮兩城並嚴飭水師將弁勦除金山賊營以孤賊勢逆匪分踞瓜州鎮江全恃江面賊船往來接應此時師船旣攻出上游卽當節節進扼使南北兩岸之賊不能互相勾結勦辦自易爲力據向榮奏

稱兩梁山尙有賊設攔練礮船林立蕪湖太平逆黨甚多必須亟籌陸路一軍沿江接應自係實在情形著卽設法布置該逆現欲窺伺黃池甯國鄧紹良已帶勇馳回防剿如該逆不敢內犯鄧紹良卽可進攻蕪湖以圖與舟師會合剿除梁山賊匪該逆經此懲創尙恐另生詭計以牽掣我師托明阿向榮仍當督飭水陸各軍一面進剿一面嚴密設防杜其奔竄向

榮請調吉林馬隊一千名來江助剿現在馮官屯餘
匪尙未殄滅近因楚豫防堵喫緊已由僧格林沁大
營抽撥馬隊一千五百名步隊二千五百名交楊霽
調遣此時未便再行抽調俟山東軍務告竣自可酌
量派往如金陵大營需兵緊急可先於托明阿所帶
馬隊官兵內商調數百名渡江協剿該大臣等雖分
剿南北兩岸之賊實則共辦一事務當統籌全局迅

掃賊氛

上諭內閣曰托明阿等奏浦口各營獲勝焦山水師攻獲賊箚並向榮奏師船斬練攻出上游著托明阿向榮等督飭各營水陸會剿克復瓜州鎮江並著將江面上下游賊船一律剿除已革廣東碣石鎮總兵王鵬年前因玩視捕務革職治罪據向榮奏此次帶兵斬斷賊練尤爲奮勇著加恩免罪並賞給五品頂戴

賞戴花翎

同日何桂清奏言據石景芬稟報該員於克復
徽州歙縣兩城後卽紮營城外固守嚴防二月
二十四日賊由萬安街退至休城石景芬卽飛
飭各隊進逼休城唐寶昌等帶勇六百名約定
初更進勦時城門未閉出其不意一擁而入賊
匪驚竄殺死甚多該縣縣丞張奇炳守備汪連

升亦先後趕到帶勇分勦追擊三十餘里卽於
是夜克復休甯縣城等因現在該逆已竄回夥
縣臣咨行鄧紹良石景芬商定機宜步步爲營
進紮漁亭以上務期迅速攻勦免致勞師糜餉
署休甯縣知縣唐寶昌於縣城失守後在嚴鎮
隨勦克復郡邑兩城茲又恢復休甯功過似足
相抵署歙縣典史申協烜於縣城失守後迎接

浙兵隨同克復尙知奮勉可否仰懇

天恩免其治罪並均留原官以爲帶罪圖功者勸再二

月十一日嚴鎮之戰川營把總黃萬魁外委彭

玉貴同時陣亡十三日歙縣失守該縣廉驥元

城亡與亡洵不愧守土之官相應籲懇

聖恩飭部一併從優議卹奏入

上諭內閣曰徽州賊匪自我軍克復郡城後竄往休甯

知府石景芬等帶隊進剿一擁入城賊匪驚竄殺斃甚多卽將縣城克復著何桂清卽行督飭石景芬等迅速肅清徽境毋稍遲延署知縣唐寶昌署歙縣典史申協烜於縣城失守後隨同收復郡邑城池功過尙足相抵均著免其治罪並均留原官仍准各署原缺以爲帶罪立功者勸陣亡之把總黃萬魁外委彭玉貴著與歙縣知縣廉驥元一併交部從優議卹

二十一日癸未英桂奏言臣馳抵信陽後據探盤

踞德安之賊於三月十二日全數竄至孝感縣
小河溪地方德安僅有空城楊需剋日馳赴德
安一帶進剿賊匪於十三日由孝感縣雙橋鎮
分股北竄大興店等情查賊匪既麇聚小河溪
難保不意圖北竄該處至信陽羅山皆屬通行
大路兼有小徑多處防不勝防前蒙

聖恩飭調北路馬步精兵四千名來豫防堵經臣咨明
孔廣順帶步隊前赴信陽旋因荆襄喫重不能
不先其所急飭由南陽馳赴荆襄茲信陽羅山
各關密邇賊氛防堵萬分喫重楚省正圖攻勦
前項官兵豫省固未便截留然軍情旦夕異宜
又何敢稍存拘泥致誤事機已飛咨孔廣順帶
領步隊二千五百名仍由信陽出關赴楚一轉

聞

移間不特先聲所播可絕賊匪竄越之心且楊
需卽日馳赴德安調遣亦較爲迅速奏入報

二十三日酉乙楊需奏言臣行抵棗陽後卽趕緊

催調兵勇派都司施鴻恩等由平林市進攻德
安署提督訥欽統帶兵勇隨後策應賊匪於山
坡港馬平港等處築牆設卡抗拒兵勇疊次進

攻皆伏匿不出三月初一二三日等賊數百人
赴陳家巷等村莊擄掠有伏勇百餘人先後爲
賊所擄欲乘間縱火接應外兵初八日朱百行
等督率團勇紳士進破賊卡圍西北兩門初九
日夜半乘月黑潛偪城下賊匪各懷驚疑遂由
東門擁出兵勇乘勢追逐適署隨州知州嚴樹
森帶勇於交界處所防堵探聞馳往會擊殺賊

數十人朱百行等卽入城搜捕餘匪尙存伏勇
十餘人乘亂逃出詢悉前情施鴻恩等卽督兵
追勦賊分三路由雲夢孝感應城散竄署撫臣
胡林翼現督兵勇駐紮金口王國才駐紮石嘴
兵勇口糧目前暫足敷衍不至卽虞潰散其下
游賊匪據署黃州府知府許廣藻稟稱團風續
到賊匪千餘並大小船數十隻當卽督勇進勦

賊卽反奔竄至江邊紛紛下船船少人多落水
覆溺者甚衆隨派署團風巡檢高禮帶勇赴南
埠堵勦拆去賊浮橋一座太湖賊匪竄犯英山
經羅田縣知縣彭仲芳帶勇馳赴應援賊分三
路進徧慶戰數時之久殺賊一千餘名英山解
圍彭仲芳帶勇回縣適蘄水賊匪五六千人竄
至接壤地方肆行擄掠彭仲芳仍折回防堵殲

斃二百餘名二月二十四日賊匪萬衆直犯羅
田聲言復仇彭仲芳帶勇迎擊賊匪後隊大至
彭仲芳力戰陣亡查楚北賊情始以我軍急攻
漢陽漢口遂意圖北竄襄陽旣北竄未遂仍必
竄回武漢胡林翼王國才之兵前偏武漢之羣
寇後有崇通之伏莽腹背兼顧勢恐不支臣惟
有竭盡心力相機勦辦不敢稍有延誤

同日王履謙長臻奏言淮河南撫臣英桂函稱
楚北逆氛復熾豫南邊境喫重擬卽移紮信陽
並奏請北路精兵四千名前來堵勦臣查河口
僅止小船數隻兵行未便稽遲因札調上南廳
前存拆卸大船二隻趕緊裝修聽候撥赴蘭儀
口應用一面差探前項弁兵於三月初九日陸
續行抵蘭儀渡河臣長臻先期由上游折回臣

聞

王履謙亦於十二日由下游行抵該口查看該
弁兵等按起前進尙無擁擠滋擾情事現已全
數渡竣仍將大船撤回上南廳摘去桅舵以禁
私渡臣等仍不時周巡嚴防賊匪偷越均奏入
報

二十四日
丙戌陳啟邁奏言據林福祥趙如勝等

稟稱饒境賊匪意在窺伺廣信撫建三府大股
匪衆先本屬聚浮梁縣景德鎮旋俱退回郡城
於二月初十日偏近石鎮街圍撲我軍營壘又
分股繞由僻路竄往樂平趙如勝派令程學敘
等帶寶勇六百餘名星夜往勦十二日行抵距
樂平縣城十餘里之韓家渡率衆衝入賊陣掩
殺二百餘人程學敘身受數傷旋卽陣亡該逆

遂竄入德興焚掠其饒郡之賊於十二十三十
四十五等日擄掠下游民船連次攻撲石鎮街
幸林福祥帶勇與趙如勝等協力堵禦均經立
時勦退擊沈賊船數隻另股由陸路抄襲我後
亦經兵勇擊敗林福祥因賊援德興該處與廣
信之上饒興安玉山弋陽連界隘口紛歧信郡
兵力無多誠恐被匪闖入關繫非輕卽商令趙

如勝酌留兵勇千名駐紮萬年以杜饒郡賊匪
內竄安仁餘干之路時署遊擊謝必魁帶領兵
勇一千餘名先往興安上饒一帶堵截林福祥
隨後繼進乃該逆知興安等處有兵防守於三
月初四日自德興弋陽交界之黃柏塘小路竄
入弋陽境內值林福祥練勇行抵弋邑卽時迎
剿殺賊多名惟該府林福祥與謝必魁一軍前

後隔絕彼此不能兼顧現經廣信府知府袁泳
錫自貴溪防所取道興安約會謝必魁迎頭兜
勦並有遊擊常海帶領浙兵六百名赴徽州防
堵於初四日路過貴溪林福祥暫行截留藉資
勦辦臣查廣信爲浙江屏障又與本省撫建二
府毗連今賊衆已入弋邑亟宜迅速殲除隨飛
調羅澤南帶領湘勇三千名並添撥新募平江

練勇剋日馳赴弋陽與林福祥合力痛勦其饒
州股匪擬令都司吳錫光抽撥南康兵勇就近
渡湖先攻都昌次攻饒州與羅澤南兩面夾擊
以期殲滅無遺

陳啟邁又奏言准浙江撫臣何桂清咨會賊由

青陽縣竄至徽州黟縣該省防勦緊要應將留
江協防之浙兵六百名飭令遊擊常海管帶前

赴祁門堵禦查蘇杭爲東南財賦之區萬一被
匪闖入所關非細當飭常海帶兵起程惟徽州
之祁門婺源均有賊擾恐難前進臣飭令該
遊擊馳赴常山玉山一帶探明何處緊急卽往
何處救援其應如何繞赴徽州仍聽浙江撫臣
飭知遵行奏入

上命軍機大臣傳諭陳啟邁曰竄擾饒州之賊意在窺

伺廣信撫建等屬此次連竄樂平德興復擄掠民船
攻撲石鎮街雖經立時勦退興安一帶亦有官兵防
守已由黃柏塘小路突入弋陽境內該邑爲浙江屏
障又與江西撫建二府毗連賊勢分竄腹地滋蔓堪
虞況徽郡游匪餘黨尙聚黟縣浙省不免戒嚴若再
令由廣信逸出與徽賊勾結不但阻梗驛路更恐掣
動蘇杭羅澤南所帶湘勇並新募平江練勇馳往會

同林福祥合勦著卽責令該道府等迅掃妖氛饒州
尙有股匪亦著陳啟邁飭令都司吳錫光就近渡湖
以次攻復都昌直抵饒郡與羅澤南分路夾擊使該
逆首尾不能相顧勦辦方有把握若令其四處紛突
更肆猖獗大局豈復可問該撫因徽浙防堵緊要將
遊擊常海管帶浙兵六百名派往常山玉山一帶探
明何處緊急卽由何處應援自應如此不分畛域

二十六日戊子吉爾杭阿奏言臣於二月初一日

自上海起程行抵蘇州適得鎮江探報該逆分竄高資勢將內犯遂飭劉存厚會同余萬清虎嵩林等相機堵剿臣卽由常州改道馳赴丹陽知高資賊壘已爲我兵掃蕩卽由丹陽句容而至金陵大營與臣向榮和衷籌議該逆注意蘇常必先截其內犯之路以固根本再絕其南北

之援以圖進取二十八日折回丹徒鎮會同余
萬清察看鎮江東南京峴山大營布置頗屬周
密惟自京峴山東北至象山江濱尙多空隙因
與余萬清商定將空隙處所深挖濠溝取土築
牆設法安礮以杜竄逸又會同余萬清渡江前
赴焦山水營總兵泊承陞管帶拖罾船十隻與
總兵周士法等所帶艇師各船聯幫停泊於焦

山北面擬俟象山牆溝工竣將泊承陞所帶拖
罾船移泊於焦山南面象山之下則南北兩岸
下游皆可無虞至南面統帶潮勇之副將站住
言語不通恐有扞格商之向榮余萬清添派熟
悉潮勇性情之遊擊饒永福會同管帶再將現
駐甘棠橋之四川官兵移紮觀音山切近潮營
藉圖鈐制其西路本甚空虛設被蔓延至馬陵

樵樹岡一帶則丹陽可虞常州亦卽震動臣暫
行屯紮樵樹岡勘定離城五里之九華山爲由
鎮江至馬陵樵樹岡總徑虎嵩林劉存厚等統
帶兵勇在九華山東北屯紮東制鎮城北窺金
山爲盤吭拊背之計三月初十三等日瞭見
瓜州賊船連檣渡江而南瓜鎮金山之賊分作
數股傾巢而來另股逆匪奔上九華山北惟時

劉存厚等皆已督兵出隊 臣帶領小隊在劉存厚營前山坡督戰將山梁之賊登時擊退拖營艇師等船亦起柁攻擊北固山甘露寺礮隄以分其勢因南風過甚不能直抵金山賊仍分數股傾巢而來 臣與余萬清督兵分投圍裏斃賊不計其數滿擬四面合圍適大霧瀰漫對面不能相見致大股仍被免脫殊爲可惜現在會商

向榮余萬清或先取金山或徑拔鎮城隨機進
剿以副

聖廬奏入報

聞

二十七日己丑和春福濟奏言三月初九日安慶

援賊二千餘名在城南四十里丙子鋪夤夜築
壘臣等卽率領官兵馳往該逆已築營二座突

見我軍竟敢迎拒卽令鄭魁士等分途攻勦立
將賊壘二座奪獲官軍追殺十餘里約斃賊匪
六七百名是夜有金陵逆匪二三千人在煙爨
集南數里紮營三座初十日黎明臣等統領官
兵馳赴賊衆出營抵拒鄭魁士等揮令兵勇三
面夾擊斃賊多名勢漸不支踉蹌奔逃我軍將
賊營三座焚燬十四十五等日逆匪兩次在西

路二十里鋪度地紮營經常清吉順江忠濬程
智泉等馳往攻勦該逆槍礮不絕拚死抵拒佐
領瑞祥等首先搶進適賊營火藥轟發致被燒
傷旋即陣亡水西南門得勝門北門同時出賊
數百人直撲官軍營盤經珠克登等奮力擊殺
該逆敗退入城查賊匪外援大股驟至兩夜於
西南各處連築營壘意在分我兵勢幸仰賴

天威立時攻破使鬼蜮無所施其伎倆城內逆匪疊次
圍剿雖死力拒守勢難久存亟當趕緊圍攻迅
圖克復青州藍翎佐領瑞祥防禦穆精額驍騎
校賽堪圖卽補驍騎校春慶帶兵搶進賊營以
致捐軀深堪憫惜應請

旨飭部從優議卹

和春福濟又奏言接秦定三來函二月十五日

舒城東門突出賊千餘名直撲勝勇營盤該提督揮令官兵三面夾攻鏖戰多時約斃賊二百餘名又據探報巢縣湯河突來賊船數百隻約賊二三千人上岸焚搶有竄入柘皋攻撲店埠救援廬城之信臣等查店埠爲廬營後路糧臺最關緊要當卽飛咨忠泰趕緊督隊掃除一面揀派鄭魁士帶兵勇一千數百名迎勦賊股竄

踞柘皋半居南市半屯舊營該處鋪戶居民均
被擄掠忠泰等帶領兵勇先圍賊營賊衆驚逸
我軍奮力擊殺多名勇目談家寶奮不顧身衝
入街內被賊圍裏當卽陣亡兵勇盡力擊勦賊
勢披靡紛紛敗逃至勇目談家寶殺賊陣亡深
堪憫惜應請

旨飭部從優議卹奏入

上命軍機大臣傳諭和春福濟曰安慶賊匪及金陵之賊於西南各處連築營壘意在分我兵勢經和春等督兵攻勦斬馘甚衆舒城巢縣逆匪亦被我兵擊敗辦理尙屬得手此時廬州之賊已勢孤援絕正可乘此機會督率各路兵勇奮力攻勦剋期收復其舒城等處並著嚴飭秦定三等督兵進攻毋得日久遷延致該逆又圖勾結應援

上諭內閣曰廬州賊匪被圍外援疊至均被我兵勦擊
獲勝埽平賊壘著和春等迅督兵勇乘勝克復毋任
死拒待援所有陣亡之青州藍翎佐領瑞祥防禦穆
精額驍騎校賽堪圖卽補驍騎校春慶六品頂戴勇
目談家寶衝鋒陷陣力竭捐軀深堪憫惜均著交部
從優議卹

同日英桂奏言據探東竄之賊因知楊需督帶

兵勇不日前來孝感團勇亦聚集二千餘人分
投堵剿遂將所攜糧食錢物盡行上船乘河水
漲發退竄武漢等處近日武昌官兵七獲勝仗
斃賊數千人賊匪營盤盡在塘角等處楊昌泗
劉富成各帶兵勇馳赴德安駐紮查此次下游
回竄之賊祇因官兵失利以致裹脅日衆滋蔓
難圖現在楊需已厚集兵勇力圖進剿西安將

軍扎拉芬已統軍前赴荆襄控制上游副都統
常亮總兵孔廣順復分道赴楚隨同楊需夾擊
蠢茲小醜不難指日蕩平惟光州所屬光山商
城等縣緊與麻城羅田毗連楚省自武漢至黃
州並蘄州蘄水黃梅廣濟等處皆有賊蹤防堵
尤應嚴密臣職任封圻責無旁貸總期殫心竭
慮籌計萬全不敢稍涉大意再准常亮孔廣順

聞

咨所有馬隊官兵已分起渡黃山南陽赴楚其
步隊官兵亦陸續行抵豫境奏入報

二十九日 辛卯 王懿德奏言准浙江撫臣何桂清

咨稱徽州府城於二月十三日失陷江西饒州
府城於二月初四日復失浙省壤界毗連防兵
單薄請於閩省近浙各營內豫備精兵一二千

名以備調遣等因查該逆垂涎江浙已非一日
現在徽州失守浙省四路可通若不厚集兵力
不足以資保障惟閩省山路崎嶇若俟浙江咨
調再行起程深恐緩不濟急自應卽日前往以
壯軍威現於省標暨建甯延平各營內撥兵一
千名派總兵饒廷選參將王煜遊擊高士濬分
別管帶馳赴浙江嚴州府扼要紮營以資援剿

業於三月初八日全數起程再江西饒州府與
浙江衢州相距不遠亦應加意防範臣已飭總
兵富勒興阿督兵嚴防

王懿德又奏言粵匪攻陷江西饒州府後現在
竄擾樂平該縣與閩省建邵兩府壤界毗連僅
隔廣信一府陸路四通八達水程亦相距甚近
防堵萬分喫緊且廣信府暨鉛山縣所轄之河

口鎮均爲入閩要路非重兵防守不足以資保
衛現於建甯鎮標調兵二百名派員管帶就近
馳赴河口鎮防堵又於邵武各營內撥兵二百
名前往廣信府紮營會同防剿奏入

上命軍機大臣傳諭何桂清曰據王懿德奏因聞徽州
警信派令饒廷選王煜高士濬管帶閩兵一千名於
三月初八日起程前往嚴州扼剿約計此時當可抵

浙現在徽郡賊已敗竄浙江兵勇已進勦黟縣嚴州防務似可稍輕而江西之賊由樂平德興擾及弋陽徧近廣信浙江衢州一帶較嚴郡更形喫重雖經王懿德另派官兵前往河口等處仍恐兵力單弱此項赴嚴闖兵自應急援江西爲要著何桂清斟酌情形妥爲調遣如果徽郡尙須添兵卽飭饒廷選帶兵前往會勦廣信賊情較緊卽調往廣信並可與江西

官兵合力進剿饒州何處喫緊卽從何處進兵勿得
株守一隅

欽定勦平粵匪方略卷一百二十五 乙卯年



四月初三日 乙未 西安將軍扎拉芬奏言臣於三

月二十一日馳抵樊城探得該逆由德安下竄
大股賊匪仍在武漢盤踞現在甘肅兵四百名
已於二十五日由水路趕到樊城其西安滿營
頭起馬隊亦於是日由陸路抵樊二起官兵日
內亦可到齊臣卽先帶滿漢官兵一千六百餘

聞

員名由樊城起程會同督臣楊需探明賊蹤相機進剿奏入報

同日何桂清奏言該逆自休甯受創後由黟縣竄陷婺源鄧紹良石景芬於三月初六日拔營前進訂期會剿鄧紹良於十四日接准向榮照會紅單各船已斬練上駛應卽馳回黃池統率

兵勇移出蕪湖以期水陸夾擊鄧紹良以此舉
關繫東南大局隨帶楚勇彪勇立時拔營一面
知會石景芬等迅速進剿石景芬恐該逆窺我
虛實連夜約會周天受馬永清進攻東門唐寶
昌夏寶慶王夢彪由陸路前進石景芬督同汪
勳由水路前進直逼北門賊卽大隊突出我勇
奮力接仗槍礮齊施斃賊三百餘名該逆全股

逃竄遂於十五日克復婺城知縣楊裕仁等率
勇入城查看各衙署尙存倉穀未動石景芬暫
在婺源安撫良民再行回郡在事出力之三品
頂戴鄧紹良可否懇

恩賞還提督原銜前任溫州府知府常恩可否交軍機
處記名俟服闋後以道員用四川川北營遊擊
周天受擬請以參將儘先升用四川儘先都司

馬永清擬請俟補缺後以遊擊升用先換頂戴
至金華府知府石景芬先後克復四城辦理妥
速而該員自以爲因人成事毫無寸功惟統帶
勇首夏寶慶等兩載從軍甚爲得力該勇首等
由休甯前赴婺源迅速蕙事未便沒其微勞當
飭令彙覈應獎各官紳由 臣奏請

恩施奏入

上命軍機大臣傳諭何桂清曰逆賊竄擾徽郡經官軍
協力攻勦將郡縣城池次第克復此後防堵事宜自
應合徽甯兩府通盤籌畫應如何派撥兵勇扼守要
隘之處卽著妥爲布置並著何桂清諭令石景芬等
勸諭該處紳士辦理團練內絕土匪之勾通外杜賊
匪之窺伺其餘一切善後章程均著隨時奏報江西
省賊匪由樂平德興竄入弋陽浙省衢州情形喫重

該撫前後調派兵勇約共五六千名除留守徽州外
尙敷防堵所有閩省派出官兵一千名卽著該撫飭
令前赴廣信與江西官兵合力攻剿

上諭內閣曰逆匪自休甯竄陷婺源縣城鄧紹良石景
芬督率將弁奮勇夾擊當將縣城克復全股掃蕩勦
辦尙屬迅速知府石景芬先後克復四城奮勇可嘉
著賞給振勇巴圖魯名號三品頂戴鄧紹良著賞還

提督銜知府常恩著交軍機處記名俟服闋後以道員用遊擊周天受著以參將升用都司馬永清著俟補缺後以遊擊升用先換頂戴所有出力各員著何桂清覈實保奏

初四日 丙申 向榮奏言據總兵吳全美副將李德

麟稟報師船自三月初七日攻斷下游賊練全幫上駛初八日卽由中洲進泊老西口並探有

賊船一百餘隻裝載糧食停泊上三山江面意圖下竄當會商已革總兵王鵬年派令各船上攻行抵兔兒磯該逆見我船連檣而上均卽敗逃我軍當由烈山夾上口抄出大江適吳全美王鵬年已在芝麻港下面將賊船擊沈十餘隻當與李德麟會合師船扼勦上游疊獲勝仗現在該逆圍護賊糧欲竄金陵與陸路賊營犄角

日與師船對江開礮拒敵請飭南北陸路官兵
會勦等語 臣卽調鄧紹良一軍並飛咨江北陸
兵迅出沿江會勦昨據廬鳳道張光第稟稱已
於十五日帶兵移紮夾山關督飭烏衣鎮官兵
並沿江民團分往策應查北岸江浦縣之石磧
橋一帶爲金陵解運必由之路有賊黨在彼攔
劫軍火並欲斷我船糧運該處極關緊要 臣已

檄令張光第就近先赴石磧橋防勦以便水陸
進扼烏江其鄧紹良由婺源折回之兵計程可
到黃池已飛催鄧紹良選帶兵勇並於秣陵關
抽兵千餘名由大營撥兵數百名併歸統帶出
勦江甯鎮三山營一帶會同師船沿江而上其
黃池秣陵等處仍留軍堵守南北兩岸上下皆
有策應庶師船軍火糧餉源源接濟不致爲賊

阻截臣仍催令乘風上勦痛掃賊艘惟我師船
僅四十餘隻四面受敵不可不早籌保護上年
廣東續調之拖魯船三十隻紅單船二十隻派
令總兵謝焜統帶早報起程迄今未到此時江
面情形喫緊應請

飭催謝焜統帶拖魯紅單各船趕緊來江助勦奏入

上命軍機大臣傳諭向榮吉爾杭阿曰連日進仗情形

各師船甚爲得力大軍沿江上勦必須兩岸陸兵接
應該大臣已飭鄧紹良出勦江甯鎮三山營一帶復
令張光第進紮石磧橋以圖進扼烏江是南北兩岸
官兵均可漸逼江岸與水軍聲勢聯絡此項師船自
回攻九洲後總未遇有順風現在正值風利業已
打過三山江口祇宜有進無退如果因船少無援則
兩岸調撥陸兵或從下游併力急攻均可以分賊勢

著向榮吉爾杭阿妥籌接應務使師船節節上駛突
過梁山以上方能逐漸進剿謝焜所帶紅單各船已
屢次寄諭廣東省飭催迅赴金陵當不至再有延滯

初七日己亥官文載增奏言接署撫臣胡林翼函

稱探聞下游安徽賊匪有回竄楚境之說在武
漢空濠築城爲負隅計大江以南興國州竄匪
擾及通山崇陽蒲圻各縣雖經官兵截擊賊蹤

仍出沒無常嘉魚賴有水師礮船致未竄出大江江以北分竄賊匪擾及德安自雲夢以至漢川皆有賊匪應城之賊前被官兵擊退現經知縣王頌三會合兵勇將德安賊匪擊敗分逃至雲夢以下督臣楊需分隊跟追不日親督後隊由棗陽前進等語臣等查荊州附近各州縣現均安堵惟協領依西布等拏獲奸細訊供皆假

裝買賣前來探信兼欲匿爲內應是該逆意猶
窺伺荊州自應益加防範現在賊蹤下竄已飭
李光榮等移師仙桃鎮等處會合守備穆租索
朗等兵勇相機進徧俟督撫臣會合進軍卽當
以勦爲防協同攻擊至餉銀萬分缺乏懇

恩飭下各省迅爲撥解俾利進勦奏入

上命軍機大臣傳諭官文扎拉芬楊需曰該逆自小河

溪竄回武漢本未大受懲創其去而復來固在意計之中楊需退紮隨州其始意原爲援應襄陽今扎拉芬已抵樊城與襄陽一江之隔所帶陝兵卽可由彼直下而楊需留逗棗陽久未據奏報軍情其坐擁多兵徘徊於隨州棗陽之間跡似居中調度實則進退無據現在常亮所帶馬隊早抵南陽計日當可與扎拉芬會合扎拉芬後起官兵想亦陸續趕到卽著該

將軍整隊前進與楊需合兵下擊不得任令楊需藉口耽延荊州現雖安堵兵力仍形單薄逆匪詭譎異常難保不尙圖窺伺官文當妥爲防禦力保荆郡所需餉銀現在川陝兩省均有續報起程之款著官文催提到楚與楊需軍營通融分用楊需何日由隨州進兵扎拉芬何時與楊需會合均著速行馳奏

官文載增又奏言三月二十日有賊六七百人

由分水嘴上竄沔陽境內之長埭口蕭蔭恩穆
租索朗等迎頭接勦斃匪二百餘名賊始敗退
臣等查賊已由北下竄但沔陽緊接漢陽漢川
誠恐被勦情急復行上竄仙桃鎮爲襄河上游
必由之道已飛咨魁玉等分南北兩岸擇要嚴
防以扼水路復催李光榮等速卽前往相機進
攻漢川奏入報

同日英桂奏言武漢之賊聞武昌官兵連獲勝仗折回孝感縣楊店地方分爲兩股一股復竄小河溪一股復竄花園其劉綰莊楊家岡小河溪等處均有賊匪羅山縣之九里關喫重賊又由小河溪分竄陳家店距府城三十里劉富成等兵勇接仗失利退至應山縣平林市賊匪偪

近德安應山居民逃避一空查楚北逆匪飄忽
靡定豫省緊與毗連各路要隘堵禦不容稍鬆
當派參將瑚圖凌額等帶勇五百名馳往羅山
縣九里關駐紮並飭南汝光道邊浴禮等帶勇
八百名分駐信陽三關協同原派兵勇扼要嚴
防楊需尙在隨州據咨俟北路兵到剋期進剿
以臣意計馬隊由南陽赴楚必經隨州步隊由

信陽出關徑取德安毋須繞道隨州致多紆折
且豫省南路邊境並無重兵擬俟孔廣順到信
會商將此起步隊於關外鄰近交界地方紮營
與邱聯恩互爲聲援一面飛咨楊需厚集各路
兵勇再行知照孔廣順訂期齊進痛掃逆氛續
調之東省兵勇二千名因豫省勇多兵少已咨
照崇恩將東勇一千名截留俾免糜費高唐竄

匪計日蕩平應請

飭下僧格林沁俟官兵凱撤時再行酌撥前來以備防
勦至常亮所帶馬隊早經馳抵南陽東省官兵
尙未咨報起程計算到豫與前起相離已遠無
從調換奏入

上命軍機大臣傳諭英桂曰該逆前由小河溪退回武
漢復折回孝感縣楊店地方分股竄擾逼近德安現

在羅山之九里關及信陽三關情形喫重該撫已派
委員弁添募鄉勇分投防堵尙屬周密其孔廣順所
帶步隊官兵計日可全抵信陽該撫現將此項官兵
暫屯關外與邱聯恩互爲聲援並卽由信陽出關徑
取德安毋庸繞道隨州致多紆折又因豫省勇多兵
少已將東勇一千名截回當俟馮官屯殘匪盡數殲
除再行酌調官兵赴豫協剿楊需現在隨州已諭令

趕緊進剿惟該督所帶兵勇屢經潰敗恐難得力著
英桂卽催令常亮所帶馬隊速赴楊需軍營聽候調
遣仍嚴飭該鎮道等於各要隘加意防備其楚北賊
情仍著確切偵探隨時具奏

初九日 辛丑 駱秉章奏言 臣 因胡林翼一軍甚單

當飭守備譔瓊林等帶勇赴鄂助剿嗣因逆匪
勾結興國通山之賊竄擾崇陽通城蒲圻窺伺

南省之臨湘平江譙瓊林之勇未能卽進三月
十六二十兩日賊撲平江北界上塔市營盤臣
派知縣何忠駿等會合團勇兩次奮擊斃賊三
百餘名賊敗後仍未遠竄現飭各界嚴防至督
臣所慮金口不能駐紮胡林翼等應渡江上扼
漢川以固荆襄門戶奉

諭著臣悉心籌畫以現在形勢言之江西湖南雖屢被

賊擾形勢猶完湖北安徽皆以重兵討賊勝負
尙未可知設湖北水陸兩軍移紮漢川則長江
千里盡委之賊其將置東南於不顧乎曾國藩
塔齊布水陸兩軍隔在江西前後皆賊聲息中
斷更何有直擣金陵之望此 臣所未解者一也
移紮漢川祇能禦上竄襄陽之賊其於荊州並
無輕重逆賊水陸並進荊州門戶何存此 臣所

未解者二也胡林翼等陸軍卽繞道上駐漢川
水軍無所依附勢非退守監利之螺山岳州之
南津港不可爲湖南門戶計尙未爲失然水軍
旣去則武漢黃之克復無期此臣所未解者三
也督臣動謂賊衆兵單不思廣濟失利之初賊
之尾追督臣者實不過千餘督臣兵勇萬餘亦
未爲少乃退黃州未一日卽退漢口退漢口一

日卽退漢川由此而德安而隨州今且退至棗陽矣是北竄者賊也引賊北竄者誰乎督臣又以餉絀爲詞不思自武漢克復後督臣所得之餉不下二三十萬召募川楚無藉之徒姦淫擄掠無所不至不知變計仍隨意召募此臣所未解者四也夫荆襄爲中原門戶而武漢爲荆襄門戶督臣旣知北竄爲重何以舍武漢不守而

徒顧荆襄既謂上扼漢川可以固荆襄門戶何以舍漢川不顧而節節退走且胡林翼王國才等軍若不能克復漢陽又何能繞道進扼漢川武漢黃德既均未復胡林翼等縱至漢川亦以孤軍駐於四面皆賊之地又何能爲荆襄門戶計乎此臣所未解者五也臣以大局關繫非輕不得不披瀝直陳奏入

上是之

同日署湖北巡撫胡林翼奏言自正月初七日
賊踞漢陽北岸已形梗塞二月十七日武昌失
陷南岸又復蔓延自當急攻武漢乃可內固荆
襄惟鄂省素稱澤國非舟師得力不能阻遏賊
蹤上年十二月水師三板百餘隻陷入江西內
湖其泊外江者兩次被襲復遭風擊壞急回武

漢修理湘南紳局添造新船百餘隻復經署臬
司李孟羣知府彭玉麟招集水勇千餘於三月
中旬趕到金口駕駛甚利即可水陸定期會剿
臣之一軍疊次於漢陽進剿頗傷精銳士氣尙
可策勵臣於到鄂時卽遣哨官前往湖南添募
勇二千餘名又經湖南撫臣檄飭守備譔瓊林
帶勇六百名援鄂均於三月二十四五等日到

金口會齊 臣思賊踞武昌於城外增修牆濠安
置槍礮其循江各岸尤爲賊所嚴防僅由一路
進攻難期得力已密飭守備譔瓊林等帶勇二
千人由金口紙坊驛以攻武昌之背 臣率所部
循岸以攻武昌之南與水師會合夾擊副將王
國才等從九江回軍近已添造軍械一律修整
因思漢陽循江一路可以上通沔陽荊州設全

軍集於武昌城外專顧南岸則漢陽之賊必更
滋蔓 臣卽飭王國才等渡江進紮遏賊上竄之
路三月二十四日又進屯沌口沌口山勢可蔽
風濤舟師卽依爲營約期會勦如果一處得手
仍可併力合攻至西安將軍扎拉芬署提督訥
欽所帶兵勇尙未知行抵何處如能迅赴蔡店
以攻漢陽之西則賊勢旣分可期得力 臣等各

營雖口糧缺乏斷不敢因此稽延坐廢時日奏

八

上嘉之

初十日

壬寅

托明阿陳金綬雷以誠奏言三月十

八日臣托明阿督兵由三汭河西岸進剿先以

前隊誘賊賊果出數百人都司富倫布等正與
接仗忽有分股之賊由東面抄我後路遊擊馬

永泰等帶兵迎截殲賊無數我軍陣亡千總董
至善一員二十二日臣等督集民夫趕築土圍
各撥兵勇埋伏以防賊出衝圍日暮收工忽從
西岸出賊數百人沿江繞撲水師總兵陳國泰
督兵開礮賊敗回巢二十三日臣托明阿督西
岸馬步隊臣陳金綬等督東岸馬步隊分路前
進保護築牆逆匪千餘名由王家院竄往虹橋

都司吳奉龍等分隊迎勦該逆死拒不退約斃
賊三百餘人忽西南蘆葦中復出賊二千餘人
我兵奮力迎截副都統德崇額總兵錫綸等帶
隊分路從後抄截忽大雨如注徧地皆水錫綸
身先士卒衝入賊中馬躡墮渠該逆槍矛飛刺
猶躍起揮刀殺賊力竭陣亡時參將羣壽奮勇
往救亦因路滑墮馬中槍殞命侍衛穆克登額

帶馬隊趕到與步隊奮力勦殺賊始遁回瓜州
是日殲賊甚多因深入賊中忽逢大雨致委參
領恩林千總胡其振把總張保寬郭慶成李萬
仁經制外委王甘霖張士奇額外外委高鵬程
與錫綸羣壽同時陣亡應與十八日陣亡之千
總董至善懇

恩一併交部從優議卹二十三日後連日陰雨一俟晴

霽卽與吉爾杭阿約期南北會攻至分築長圍
原期制賊紛竄惟因溝塍環阻非平原可比兼
值農忙多雨未易施工容臣等酌量行止相機
辦理奏入

上命軍機大臣傳諭托明阿陳金綬雷以誠曰此次陸
路官兵經托明阿陳金綬等分東西兩路進攻賊衆
均各敗竄而二十三日之戰鎮將陣亡殲賊雖多得

不償失且分築長圍意在杜其紛竄惟該處溝塍環
阻非若平原曠野較易施工沿江一面亦恐未能堵
截托明阿等惟有與吉爾杭阿等水陸合攻南北並
舉使逆黨應接不暇庶可搗其巢穴托明阿等務當
悉心籌畫力求制勝之方

上諭內閣曰此次官兵接仗殲賊甚多乃因深入賊中
忽逢大雨致錫綸羣壽等力竭捐軀殊堪憫惻湖南

綏靖鎮總兵錫綸署參將都司羣壽與同時陣亡之
防禦委參領恩林千總胡其振把總張保寬郭慶成
李萬仁經制外委王甘霖張士奇額外外委高鵬程
千總董至善均著交部從優議卹以慰忠魂

十一日癸卯向榮奏言總兵吳全美等稟稱我軍

自三月二十四五等日疊將賊划擊退二十六
日會督各船向三山江面進攻該逆卽出礮船

數百隻及大拖快蟹礮船一齊來拒並有上河
口及北岸腰篷洲所泊賊船亦俱蠡擁撲來賊
衆十倍於我各師船分幫迎勦將賊船截爲兩
段該逆首尾來包吳全美手燃大礮擊燬大拖
賊船一隻把總郭定猷等躍過賊船砍斃數賊
力奪大快蟹船多隻該逆且戰且退吳全美仍
督船上下環攻先是李德麟督帶拖罾紅單各

船向北岸六壩迎勦該逆礮船一百數十隻戩
風來拒並有大拖船一隻與後面多槳快船數
十隻尤爲猛烈勇目劉蔣華首先躍過力砍黃
衣賊目一名船戶陳超發與各兵勇相繼躍登
賊船殲賊二十餘名生擒二十二名適有拖罾
船趕到協助餘賊撲江淹溺將大拖船卽行奪
獲其時王鵬年進攻三山大幫賊艘該逆復放

下礮船百餘隻彼此大礮轟打外委鄭榮勳等
奮勇衝上擊沈賊船二十餘隻焚燒四十餘隻
賊匪焚溺尤衆適吳全美李德麟大幫追勦前
來會同三面衝擊逆船支持不住紛紛向香鑪
港敗逃查該逆於上河口三山營腰篷洲一帶
水陸屯踞三面圍截我師今紅單等船以少擊
多一戰而破二百餘艘並奪礮船多隻斃賊無

算力挫兇鋒吳全美李德麟尤爲出力額懇

天恩將該二員先行交部從優議敘至藍翎兵丁梁正

源前次首先斬練奮勇直前與此次奪獲大拖
之六品翎頂勇目劉蔣華均擬請

賞給五品頂戴並賞換花翎以水師千總補用所有出
力之各船員弁兵勇容 臣彙案酌擬保奏現在
該逆上游雖有大幫礮船並竄伏夾江快蟹不

少經此次懲挫似已膽落臣仍檄飭該鎮將等
迅圖攻勦一俟鄧紹良兵出江甯鎮卽會合掃
蕩由三山上勦太平梁山一帶水陸並進以期
肅清江面奏入

上命軍機大臣傳諭向榮吉爾杭阿曰三山礮臺阻我
師船上駛之路非得陸路勁兵不能掃除鄧紹良此
時是否已移師至江甯鎮卽著向榮催令由三山一

帶出勦將該逆礮臺攻毀使水師不致阻礙方能上
扼東西梁山至上游烏江賊船甚多水師尙未能剿
至該處尤須陸路官兵牽制其勢本日和春等奏張
光第已進紮張家集於三月二十日得有勝仗該處
距向榮前奏之石磧橋遠近若何是否已徧江岸亦
著催令迅速扼剿武慶防堵浦口之兵亦當在陸路
接應與葉常春等共清洲地並著咨會托明阿等妥

商籌辦此時水師連次得手正宜鼓其銳氣奮勇直上不可再有停頓著向榮等分飭各處江岸一體進逼夾攻鎮江近日攻勦情形未據奏報焦山師船亦著吉爾杭阿催令乘時進勦

上諭內閣曰總兵吳全美副將李德麟激勵兵勇每戰皆捷此次督船進攻大獲勝仗洵屬尤爲出力著先行交部從優議敘藍翎兵丁梁正源前次首先斬練

極爲奮勇六品翎頂勇目劉蔣華奪獲大拖賊船最
爲勇往均著賞給五品頂戴並賞換花翎以水師千
總補用其餘出力員弁兵勇著向榮歸入前次出力
各員內一併保奏候朕施恩仍著向榮等督飭吳全
美等統帶師船乘勝上駛以期肅清江面

同日和春福濟奏言廬州城內賊匪防備極嚴
必須設法誘出痛勦以圖攻入三月二十一夜

間臣等密將奪獲逆匪衣巾旗幟令川楚廣勇假扮賊援於二十二日由南路而來使城內之賊見外援將次到城出巢接應我軍一面出隊迎敵一面於城外潛伏俟其出城截住歸路前後夾攻冀可乘勢襲取詎意該逆祇在城門兩面駐紮僅黃衣騎馬賊數名帶領五六百人向前詰問因語言不符旋即退走我軍奮力擊刺

砍死黃衣馬賊四名官軍趕至城下約斃賊三四百名陣亡藍翎勇目陳章一名二十五日探得焦湖來賊船數百隻逆匪上岸在施口紮營已竄至長樂集有直撲店埠之信已革知府立誠派外委楊金桃勇目吉學盛帶勇攻擊惟勇少賊多楊金桃手刃數賊力竭陣亡藩司畢承昭派兵勇五百名令遊擊舒亮帶往堵禦臣等

並派吉順鄭魁士嵩瑞輯順等帶領兵勇馳赴
該處逆匪已聞風回營鄭魁士等趕至施口將
賊營緊圍賊衆驚潰紛紛越牆逃出官兵乘勝
殺入營內之賊殲除淨盡立將賊營平毀查壽
春鎮中營外委楊金桃廣東藍翎勇目陳章臨
陣捐軀相應請

旨飭部照例議卹奏入

上諭內閣曰廬州逆匪堅守待援經和春等截擊現在
外援已絕著卽趕緊圍剿迅圖克復陣亡之壽春鎮
中營外委楊金桃廣東藍翎勇目陳章均著交部照
例議卹

和春福濟又奏言准秦定三函稱三月十九日
舒城大小東門各出賊千餘名分三股前來飭
音德布等帶兵勇左右抄擊殺斃多名賊敗入

城二十日大東門出賊數百名兵勇奮殺殲斃
不少二十三日小東門南門出賊千餘分股抄
來秦定三督軍擊退二十六七日派千總聶
桂榮等酌帶兵勇於西南城角紮營遏賊出入
之路該逆屢次來撲均經擊散又准忠泰咨稱
賊竄柘皋後復竄至唐家嘴於東西兩面紮營
焚擄二十二日該副都統同李鴻章帶領兵勇

分途進剿我軍冒險搶過外濠拔去梅花椿擲
拋火彈賊衆驚亂各勇槍上賊壘砍倒數人一
齊衝入將東面賊營平毀維時都司珠蘭泰等
進攻西營賊勢過衆由後抄出珠蘭泰及千總
慶隆陣亡伊林布等趕至救應揮令兵勇奮力
圍剿斃悍賊數十名該逆向湖邊敗逃署守備
李光觀帶兵追剿船賊分投上岸接應李光觀

登時陣亡伊林布李鴻章督率兵勇迎頭截殺
斃賊數十名賊敗退回船查廬州營都司珠蘭
泰署揚州營守備李光覲候補衛千總慶隆臨
陣捐軀深堪憫惜相應請

旨飭部將珠蘭泰慶隆照例議卹李光覲照守備陣亡
例從優議卹奏入

上諭內閣曰此次秦定三督兵進攻舒城城外賊營殺

賊平壘尙屬得手著和春福濟嚴飭秦定三速將縣城克復以斷廬州賊援所有力戰陣亡之廬州營都司珠蘭泰候補衛千總慶隆均著交部照例議卹署揚州營守備李光覲著照守備陣亡例從優議卹

和春福濟又奏言據廬鳳道張光第稟稱探得水師與賊船接仗卽飭帶兵文武由香泉鎮進紮距烏江十餘里之張家集二十日突有逆匪

數千人由芝麻港來撲參將李成虎等分路進
勦另股賊匪六七百名隔水排列徐焯縱馬先
渡李成虎追賊過周家集亦躍水而過奮力攻
擊六品軍功王士美隊長胡慶寅楊克順手刃
多賊力竭陣亡尹軒劉玉豹同時趕到督兵衝
殺李翰華等帶勇截勦又斃二百餘名賊衆狂
奔小洪村大洪村我兵踵至另股賊匪五六百

人從烏江來援葉法等在山口擊退大洪村之賊見援賊已潰於村外乘機四竄官軍直追至距烏江三里餘收隊回營臣等查烏江一帶賊船林立雖出隊獲勝足壯軍威惟防禦尤關緊要仍飭晝夜梭巡實力堵禦

同日僧格林沁奏言逆匪竄踞馮官屯伏巢不出臣開挖引河用水浸灌乃該逆所占之處地

勢較高初時殊不驚懼臣當將圍牆培厚加高
用水車水機水戽盡力澆灌十數日來圍牆以
內高處水深二三尺低處水至四五尺不等現
在該逆潛伏之處俱已有水三二尺穀麥雖尙
充足半被水浸三月二十日後該逆見水勢日
長始行驚慌連次乘夜窺伺向南北礮臺奔撲
均經兵勇隨時擊退水勢已經成圍料難潰脫

但李開芳狡悍異常斷不肯束手待斃並據投
出兩湖人供稱該逆起造木箒長梯意欲捨死
奔撲臣因申諭各營悉力嚴防不准稍涉大意
再俟水漲尺餘該逆卽須懸釜而炊其時自必
情急很鬪正可乘機奮擊現已向東昌府調撥
小船數隻一俟到齊卽選擇水兵合力進攻痛
加殄洗均奏入報

聞

廣州府志卷之八

四

欽定勦平粵匪方略卷一百二十六 乙卯年

四月十四日丙午曾國藩塔齊布奏言目下臣等

一軍分爲四枝陸路兩枝臣塔齊布駐紮九江
羅澤南分勦廣饒相去已在六百里外水路兩
枝臣國藩整理陷入內湖之水師駐紮鄱湖李
孟羣等回援武漢屯紮金口相去更在八百里
外合則力厚分則力薄水軍自去臘十二日輕

舟百餘衝入內湖遂與外江老營隔絕正月初三日李孟羣等回援武漢外江之船愈少初五日彭玉麟等因大風壞船全數開赴上游與內湖一軍相去日遠逮至武漢再陷沿江兩岸數百里復被賊踞而金口水軍與鄱湖一軍乃不復能遽合矣今水陸各軍之在江西境內者傷者平復勞者休息羸弱者汰遣添換仍可復去

秋壯盛之氣惟金口一軍與臣等相隔太遠值
兩次敗挫三次遭風以未經修整之船禦武漢
方張之賊不得一日休息此臣等所深以爲慮
者也屢據稟報彭玉麟等回漢之師一面與賊
接仗一面修整破船次第完好湖南撫臣駱秉
章復以百餘船前往接濟差足重振軍威而陸
軍單薄餉項缺乏岌岌乎有潰散之虞論天下

大勢則武昌據金陵上游爲古來必爭之地論
行兵常道則上下皆賊而臣軍坐困於中段亦
決非萬全之策是以臣等一聞武昌淪陷卽再
四籌商思所以爲回勦之計顧回勦之策有難
言者潯郡據長江之腰膂宜有重兵駐守其間
一經撤退則九江湖口小池口之賊皆肆然無
忌內犯江西上竄岳鄂均不可知軍士進則氣

盛退則氣歉卽勦辦得手未知何日始能重至
九江其難一也現在該逆不特攻陷武漢且窺
伺襄樊自金口以下上下江面皆爲賊踞內湖
水師若徒株守鄱湖不出江面則保護一隅無
濟大局若乘此春漲由湖出江不難於衝出湖
口而難於出江之後一軍孤懸四面無依上不
能遽合金口之水軍下不能速勦安慶之賊艇

其難二也湖南用兵已久庫款旣空捐項亦竭
本年賊蹤上竄胡林翼王國才等之陸軍李孟
羣彭玉麟等之水軍皆仰給於湖南弁勇萬餘
嗷嗷待哺臣等欲再率六七千人前往江西旣
難於供支湖南更無可籌撥大抵兵勇積習久
住不戰口糧尙可展緩若有行役之苦戰陣之
危不可一日無餉狡者藉詞鼓譟樸者亦無鬪

心其難三也兼此三端實乏良策刻下分兵往
鄂已無可再分若臣等自行回劔則須豫籌兩
月之餉臣國藩上年曾奏請四川勸捐助餉頃
已委知縣祥麟赴蜀守催餉銀十二萬兩如此
項有著卽可恃以爲回勦之用否則姑駐江省
境內與其千里馳逐卒以餉匱而致意外之虞
又不如堅扼中段保全此軍奏入

上命軍機大臣傳諭曾國藩塔齊布曰行兵之道合則力厚分則力薄自師船陷入鄱湖賊匪再擾武漢廣饒一帶復有賊蹤竄突該侍郎等水陸兩軍實有不能不分之勢現在金口一軍相隔雖遠昨據胡林翼奏由湖南添船募勇兵威復振曾國藩若竟回勦楚北恐九江湖口小池口之賊勢必內犯江西而塔齊布陸軍亦無聲援至株守鄱湖徒糜軍餉自應乘此

春漲由湖衝出惟出江後既未能遽合金口水軍復不能速勦安慶賊艇不如仍與塔齊布陸軍會合先行攻克潯郡再圖進取前此曾國藩師船遇風敗挫漂失多隻此時鄱湖師船出泊九江能否保護使無意外之虞惟在該侍郎酌度情形妥爲籌畫該侍郎所謂千里馳逐不如堅扼中段所奏不爲無見當此上下皆賊總宜計出萬全勿以浪戰失機勿以遲迴

誤事一切機宜朕亦不爲遙制該侍郎不可因挫失之餘遂至束手無策仍當激勵軍士踴躍用命謀定後動勿負初心以副委任塔齊布攻勦九江近日情形並著隨時奏報以紓懸系

十五日丁未何桂清奏言准衢州鎮總兵富勒興

阿咨會廣信府城於三月二十三日失守玉山縣城於二十七日失守玉山距常山八十里路

徑紛歧惟以曹會關爲門戶該鎮帶兵從開化
前赴堵禦二十八日該逆從玉山北門分黨潛
竄常山我兵奮力攻擊斃賊多名餘匪仍卽竄
回該逆又欲由葉姑嶺繞至五里亭再分兩股
一抄曹會關後路一攻常山縣城德興城內現
有賊匪千餘人其離城二十里外小港地方亦
有賊踞常開兩邑萬分喫重如僅顧曹會關一

面非特常山難保卽開化亦無應援請添兵策
應等情查衢州防兵經臣節次調往不下四千
名而常山開化江山隘口至數十處之多散布
仍屬單薄所調閩兵一千名經督臣前後截留
飭赴江西河口鎮堵禦其省標兵五百名據報
於三月二十六日行抵浦城計日內方可趨入
江山就近截留並咨督臣將前請豫備征兵一

千名兼程前來接應周天受兵一千餘名現駐
徽州可以移緩就急卽飭由威坪赴衢聽候富
勒興阿派撥該逆窺伺浙江已久現在偏近浙
境必須厚集兵力以資捍衛探聞羅澤南已抵
廣信臣已飛札該員分撥勁勇繞赴常山與富
勒興阿會同攻剿惟浙江得力將弁兵勇協防
徽甯已屬不敷現在衢州軍務惟富勒興阿獨

當一面此外無可調派臣已函商向榮請於金陵鎮江大營抽撥勁旅二千來浙助剿以壯軍威奏入

上諭曰羅澤南已抵廣信自可追剿免致蔓延至省城一切暨撥兵籌餉汝之責無旁貸尤應迅速妥辦

十六日戊申楊需奏言臣自棗陽起程檄署提督

訥欽進駐德安聞西安將軍扎拉芬已抵襄陽

卽飭會合籌商進剿據報三月二十七日有另
股賊匪由下游竄至楊店已於二十八日復竄
德安施鴻恩等急回德安戰於陳家巷等處未
能獲勝賊竄入城並分竄應山縣屬之平林市
施鴻恩等恐其徑竄隨棗卽閒道馳赴馬平港
堵扼訥欽仍駐隨州三十日賊竄隨州之洛陽
店經署隨州知州嚴樹森派軍功張華封等分

路圍剿擒斬殆盡四月初二初三等日扎拉芬
常亮先後進駐隨州營於東望城岡探聞德安
賊匪盤踞城中近城各路均有賊設卡拆橋安
置木椿聲言西竄安陸北竄襄陽蓋欲牽掣我
兵東下之策臣通籌大局武昌漢陽賊匪經撫
臣胡林翼進駐石嘴副將王國才進駐沌口李
孟羣水師分駐兩岸已得進攻之勢若北岸兵

勇進至蔡店夾攻必能得手乃該匪惟恐北路
之兵會合夾擊特分股上竄使我軍多所兼顧
若專攻德安相持日久適足遂其牽掣詭謀且
月餘淫雨河湖並漲德安以下如應城孝感黃
陂等處一片汪洋非船莫渡惟有分兵兩路一
由隨州進紮楊店孝感一帶以攻德安一由京
山以西沿襄河進徧漢口兼防襄陽擬令常亮

訥欽楊昌泗李玉田等統帶馬步兵勇六千餘
人由馬平港進攻德安孔廣順帶步隊二千五
百人以劉富成作嚮導爲頭隊扎拉芬帶馬步
二千一百人爲二隊臣督同參將常德等統帶
兵勇二千六百人爲三隊以未到之川兵二千
人爲後隊由京山沿河而行進至漢川以徧漢
陽賊聞漢陽緊急則必返救我軍可乘勢追擊

惟孔廣順一軍初二日行抵信陽經河南撫臣
英桂奏請暫留楚北兵勇屢挫銳氣未復專盼
北路援兵協勦且河南尙有續派之步隊二千
人不日可到防堵似已敷用應請

飭下英桂卽令孔廣順迅速來楚以資厚集奏入

上命軍機大臣傳諭楊霈曰逆賊竄踞德安意圖久踞
乘間北犯該督請以常亮請欽楊昌泗等所帶兵勇

由應山進攻德安而令孔廣順扎拉芬與該督現帶
兵勇沿河進勦漢川意在先復武漢以攻賊之所必
救惟訥欽在德安曾經失利致賊入城未可深恃扎
拉芬孔廣順多係生力官軍以之進勦儘可得力若
該督再同往漢川則德安踞賊非上犯荆襄卽襲漢
川官軍之後殊非善策楊霈著毋庸前赴漢川卽由
隨州星速進兵督同常亮等先復德安將內河之賊

節節掃除再行進徧漢陽其漢川一路卽責成扎拉
芬督同孔廣順等進勦未到之川勇卽作爲扎拉芬
之第三隊兵力亦不虞單薄常亮已抵南陽該督令
赴德安則須繞道而東孔廣順現在信陽該督令赴
漢川則又須繞道而西取路未免不順惟馬隊不宜
於水路不能不爲此調撥仍著催令趕緊趨行或可
以其迅速補其紆折本日已諭知英桂令孔廣順卽

日出關定可馳抵京山一帶如尙未到齊卽著扎拉
芬嚴催前進該督現帶之兵合之原派常亮等軍不
下八九千人務將德安逆賊剋日進剿不准再事遷
延該督何日馳抵德安並著迅速馳奏

上又命軍機大臣傳諭英桂曰孔廣順統帶之步隊二
千五百名前經英桂奏稱於行抵信陽後暫屯關外
與邱聯恩互爲聲援現在楊需擬令常亮等由馬平

港進攻德安其漢陽一路派孔廣順步隊爲頭隊扎
拉芬馬步隊爲二隊由漢川進攻豫省邊防固屬緊
要惟坐守不如迎勦且山東續調之兵一千名卽日
抵豫足敷防堵所有孔廣順兵二千五百名著英桂
飭令卽日起程前赴漢川一帶會合進勦並將口糧
等項剋期豫備毋稍遲誤該官兵起程日期並著卽
行馳奏

十八日庚戌僧格林沁奏言逆匪竄踞馮官屯經

臣用水攻圍極力浸灌圍隄以內高處有水三四尺低處水深至五六尺據投出之人供稱賊窖之內亦有水三四尺不等賊匪雖形驚慌堅匿如前四月初十日調到小船數隻十一日先令投出之人向內招呼解散脅從並諭與限三日投誠免罪復因逆首李開芳罪大惡極恐其

自盡致逃顯戮假以愛其才幹諭令一併投誠
乃該逆仍觀望不出十二日以前陸續投出兩
湖等處人二百二十二名逐一查看尙係真心
來歸自應仰體

聖主好生之德寬其一綫當卽收錄 臣豫料李開芳必
藉此另生詭謀當與德勒克色楞西凌阿等嚴
密防範該逆果於十三日令夥匪一百四十餘

名夾溷在平高唐難民數十名齊出投降並有
李開芳心腹僞先鋒黃大漢卽黃近汶一同投
出臣仍佯爲收撫將投出之人全數渡出除在
平高唐之人嚴看外其餘一百四十餘名全數
誅戮籌計李開芳見詐降之人均將渡出重濠
必以爲墮其術中隄防或懈遂密傳令齊隊進
攻詎該逆防守如常我軍僅偪近該逆土塹燒

燬賊窩鋪數處仍未能擣穴擒渠十四十五等
日兵勇奮攻大礮轟擊該逆萬分窮蹙仍敢求
讓一路逃往南省再不北犯等語當卽一面呵
斥不准一面督令兵勇極力圍攻該逆勢不能
支於十六日全行投出就擒除將該逆李開芳
及曾受僞職之黃懿端謝金生並李開芳親隨
李添佑譚有淮韋名傳曹得相劉志澂等八名

卽派貝子德勒克色楞已革侍郎培成天津道
張起鵬檻解赴京交惠親王辦理外其餘逆匪
一百餘名悉數正法其被擒收錄復投賊巢之
僞土將軍劉子明一犯情罪尤重當卽凌遲處
死臣仍督飭各營兵勇前往逆窟嚴密窮搜並
無一名漏網再此股竄孽旣經蕩平現統各營
除受傷患病必須遣回休養外其餘官兵並投

誠義勇尙可挑選精銳臣擬卽督帶赴南協勦
惟江南皖楚近日何省待兵尤殷不能深悉亦
未敢專擅伏乞

訓示遵行其應行遣撤之兵擬先飭令起程挑贖投誠
義勇酌給川資給予免死護照分遣回籍各安
生業所有在事出力文武各員可否由臣量請
獎敘之處出自

天恩奏入

上命軍機大臣傳諭僧格林沁曰馮官屯逆匪窮蹙之餘猶思負隅久踞經該大臣等戮力同心勦除淨盡並將首逆李開芳等檻送京師現在北路肅清僧格林沁卽請督兵南下足見忠勇之誠惟該大臣督兵勦賊已歷年餘辛勞倍著朕嘉尙之餘實深眷念僧格林沁著卽馳驛來京陛見所有各營官兵及投誠

義勇自應分別留撤惟現在兵勇究有若干該大臣所挑精銳兵勇及應行裁撤各數目著詳細查明迅速覆奏西凌阿仍著統帶各營酌留兵勇暫行駐紮馮官屯聽候諭旨

上諭內閣曰此股逆匪由高唐竄踞馮官屯經僧格林沁等疊次殲勦引水圍困連日用礮轟倒賊巢房屋該逆計無所施於十三日遣夥匪百餘名溷入難民

內擁出鼻水奔降並有逆首李開芳心腹僞先鋒黃
大漢一同投出我軍將逆衆全行渡出除荏平高唐
難民外賊匪一百四十餘名盡數伏誅我軍遂逼近
土埕焚燬賊窟擒獲賊匪十名十四十五等日兵勇
用大礮轟擊該逆萬分窮蹙我軍奮勇向前生擒逆
首李開芳及受有僞職之黃懿端等八名餘逆百餘
名盡行正法其前次投入賊巢之僞土將軍劉子明

一犯同時擒獲凌遲處死窮搜餘匪並無一名漏網
實足以伸國法而快人心科爾沁博多勒噶台親王
僧格林沁自授爲參贊大臣後督師勦賊均合機宜
忠勇之誠深堪嘉尙前此殲滅連鎮賊匪卽迅速移
兵圍剿高唐迨匪竄踞馮官屯堅匿不出復多方設
法將逆黨首要各犯悉數殲擒北路一律肅清厥功
甚偉前經賞給親王著加恩世襲罔替並賞坐肩輿

伊兒二品頂戴台吉琅布林沁著賞給輔國公伊弟
四等台吉崇格林沁著賞給二品頂戴並賞戴花翎
貝子德勒克色楞前在勝保軍營未能迅速奏功本
有應得之咎自隨同僧格林沁幫辦軍務後極知奮
勉克成厥功著賞給貝勒銜並賞戴三眼花翎察哈
爾都統世襲輕車都尉西凌阿幫辦軍務疊著戰功
著賞給三等男爵所有在事出力文武各員並著僧

格林沁等查明保奏候朕施恩現在馮官屯逆賊全
數蕩平著僧格林沁挑選精銳官兵分起南下該大
臣卽馳驛來京陛見以慰塵懷

上又諭內閣曰現在馮官屯賊匪悉數蕩平北路一律
蕭清奉命大將軍惠親王總理巡防一載有餘勤勞
懋著著交宗人府從優議敘惠親王之子奕詳著賞
戴寶石頂奕詢奕謨著賞給頭品頂戴均著加恩在

上書房讀書以昭優眷巡防王大臣除恭親王奕訢
侍郎穆蔭杜翰業經加恩外吏部尙書花沙納都察
院左都御史聯順戶部左侍郎羅惇衍著一併交部
從優議敘前戶部尙書孫瑞珍著交部議敘

上又諭內閣曰現在馮官屯逆匪全數蕩平北路一律
肅清軍機大臣贊襄軍務夙夜勤勞允宜分別加恩
以昭優眷恭親王奕訢著交宗人府從優議敘尙書

彭蘊章侍郎穆蔭杜翰均著交部從優議敘侍郎瑞麟著交部議敘致仕大學士祁寯藻前在軍機大臣上行走懋著勞勩著一併交部從優議敘其滿漢章京各員均著交部議敘

上又諭內閣曰本日接遞捷報之奏事官松齡著賞戴花翎兵部捷報處郎中扎克丹布著賞戴花翎主事松秀筆帖式寶章均著賞戴藍翎

臣等謹案京師者天下根本也畿輔者京師
屏藩也屏藩無警斯根本不搖溯自粵逆倡
亂勢漸蔓延兩湖三江猝遭蹂躪嗣由皖而
豫而晉擾及畿甸我

文宗顯皇帝獨操廟算倚任親賢高唐連鎮以次掃除
至是而河朔肅清畿疆安謐聲威所懾無復
有一騎敢越黃流然後宣力諸臣得以顯事

東南草薶而禽獮之曾不十稔元惡大憝悉
就削平始知

神謨廣運指示周詳實有以基底定之勳而奠金湯之
固也

同日吉爾杭阿奏言淮浙江撫臣何桂清函稱
江西玉山縣於三月二十七日失守二十八日
賊竄常山交界之河安嶺爲浙兵擊退另有大

股將由間道徑犯常山請兵援應等因查江浙
層齒相依浙江稍有挫失蘇州卽行震動實關
東南大局當於無可抽撥之中酌調現駐丹陽
之浙江副將王楸管帶浙江兵八百名以總兵
都隆阿爲統帶先行馳回聽候何桂清調遣一
面會商向榮在江甯軍營抽撥都司虎坤元管
帶川兵五百名臣又在鎮江軍營抽撥參將魯

占鼇管帶川兵五百名以總兵虎嵩林爲統帶
於初七初十等日分起進發又接浙江撫臣來
函知該逆聲東擊西繞出常山之後於三月三
十日攻陷開化縣四月初二日擾及遂安需兵
甚急臣當催虎嵩林都隆阿無分雨夜迅速遄
行以資援應至蘇州省城爲根本重地切近浙
江必應嚴爲之備正會商怡良設法籌防接准

向榮咨會已另派提督鄧紹良管帶湖南精兵
四百七十名督同虎坤元所帶川兵五百名都
隆阿所帶浙兵八百名馳赴浙江勦辦其虎嵩
林督同魯占鼈所帶川兵五百名應暫留蘇州
藉資彈壓等因 臣仍確探浙省情形妥籌布置
奏入

上命軍機大臣傳諭向榮怡良吉爾杭阿何桂清曰逆

匪於旬日間連陷三城衢郡距杭不遠水路一帆可
達必應於衢嚴一帶進兵堵剿以杜其奔竄之路吉
爾杭阿已飛催虎嵩林都隆阿等帶兵趕緊赴浙向
榮亦另派鄧紹良管帶湖南精兵赴浙援剿惟前據
何桂清奏富勒興阿現駐兵常山之五里亭防兵尙
單羅澤南早抵廣信是否已撥兵會剿駐徽之周天
受川兵是否赴衢均著何桂清迅卽飭催會同截留

之閩兵並金陵鎮江所撥勁旅合力兜勦務將攻陷
開化之逆匪悉數殲除斷不可稍事遷延蘇州兵勇
較單魯占鼇所帶川兵卽令暫留蘇州藉資彈壓仍
著怡良吉爾杭阿嚴飭署藩司楊能格等認真督辦
團練嚴查奸宄豫籌防守以期有備無患

同日向榮吉爾杭阿奏言鎮江近城廟宇民房
雖被賊焚燬牆垣未倒旣阻我兵進擊之路該

逆轉可恃爲埋伏 臣吉爾杭阿於三月二十一
日會同余萬清等督隊前往拆毀適瓜州金山
之逆渡江會合鎮城逆匪傾巢來撲我兵槍礮
齊施擊斃賊匪不計其數賊始狂奔近城未倒
牆垣我軍盡行拆毀四月初九日該逆突出南
門意圖割麥經參將周兆熊帶兵擊退田麥未
被搶割其自京峴山至象山空濠築牆工程官

軍趕辦完竣將總兵泊承陞所帶拖罾船十隻
移泊象山並派參將台斐音帶領兵勇附牆紮
營杜賊東竄南路自板兒橋至觀音山亦有隙
處現並續築濠牆其城之西南隅有虎頭摩旗
兩山相連距城僅半里擬俟南路濠牆告竣卽
抽兵在兩山紮營高築礮臺向城內轟擊該逆
雖欲負隅勢亦不能至銀山當江甯鎮江之衝

該逆於山北聯營死守其山南離九華山僅三四里擬俟虎頭摩旗二山營盤紮定再行設法搶占

向榮又奏言查師船自斬練攻出上游亟盼陸軍會合進攻今吳全美等師船於四月初四日進攻上三山續獲大勝適鄧紹良之兵已到江甯鎮於初六七等日堵剿順利疊報克捷足壯

軍聲其北岸江浦之石磧橋已經廬鳳道張光
第分兵出堵亦俘斬腰篷洲竄匪多名所有師
船糧餉軍火卽可由南岸江甯鎮陸營解運接
濟惟三山賊黨嘯聚賊船未盡掃除亟應趕緊
夾攻悉行掃蕩然後水陸並進方無後顧之虞
臣已嚴飭吳全美等和衷共濟併力進攻直赴
上游肅清江面

向榮又奏言接據何桂清函稱浙省情形危急
非有勇敢大員不足以資統率因檄令鄧紹良
統帶湖南兵五百名由江甯鎮兼程赴浙已報
於十一日起程其江甯鎮諸軍現當攻勦喫緊
臣復抽撥前敵貴州兵五百名交總兵德安帶
往接應與師船會剿三山以免顧彼失此嗣接
吉爾杭阿函稱復調虎嵩林川兵五百名赴浙

援應臣思浙省兵勇添撥本已不少又有鄧紹
良前往統帶足以力遏兇鋒而蘇州接壤浙江
風鶴時驚應卽將虎嵩林一軍截留蘇州駐紮
以安人心惟金陵之兵日分日少設該逆分股
竄突堵剿力有難周一俟馮官屯葺功仰懇

飭調吉林馬隊一千名步隊二千名來南俾資助剿奏

入均報

聞

同日陳啟邁奏言據撫州府知府林福祥等稟稱三月初四日賊匪竄入弋陽境內直撲縣城署弋陽縣知縣王蘭會督兵勇守禦因城垣坍塌被賊由北門撲入城內浙江遊擊常海所帶浙兵六百名初四日已過貴溪林福祥邀令折回會勦常海以舟行已入弋陽境內一經退回

恐被賊襲擬擇地紮營再籌會勦初六日船至
葉家壩誤聞傳言賊匪無多該遊擊卽率其子
六品軍功吉慧出隊行至大水橋見逆匪叢擁
來拒各弁兵施放槍礮斃賊四百餘人追逐過
橋詎賊伏齊起四面圍裹常海吉慧均力戰陣
亡弁兵亦傷亡過半臣隨咨會曾國藩飭催羅
澤南等軍兼程前進茲據羅澤南林福祥會稟

湘勇於十七日抵貴溪十九日羅澤南會同林
福祥由貴溪進駐水門埠廣信府知府袁泳錫
繞赴河口自上游兜勦而下二十日羅澤南與
知府李續賓帶湘勇爲頭隊從九品蔣益澧知
縣唐訓方帶訓字營爲二隊林福祥同趙如勝
率捷勝軍爲三隊已革知縣文明等率寶勇爲
四隊訓導鍾世楨等率志同等軍爲五隊齊向

弋陽進發前隊至大水橋突見賊匪三四千人
至橋南五里亭下李續賓帶勇堵截大水橋羅
澤南帶勇由橋北陳家山冀抄賊尾該逆復以
四五千入出弋陽北門來抄我軍之後羅澤南
飛飭蔣益漴唐訓方協同林福祥趙如勝督勇
往堵北門之賊以中營攻瓦夕橋之賊槍礮之
後繼以刀矛斃賊不計其數餘賊由西門外之

江西橋入城賊之在五里亭者因瓦夕橋賊敗
官兵追至江西橋無路可歸李續賓遂由大水
橋而上羅澤南從上截之殺斃百餘人賊衆由
五里亭之南沿河上竄溺斃無數賊之出北門
者蔣益澧唐訓方先到奮擊林福祥趙如勝督
同戴正才等繼至共殲賊匪百餘人賊衆復全
力來撲其由北門出者以萬計直抵陳家山下

大松林內分作三股李續賓禦於松林之南唐
訓方副之羅澤南禦於松林之北蔣益澧接應
賊屢衝突我軍乘其氣竭一呼而進力斬執旗
賊數十名餘俱潰敗是日殺斃焚斃溺斃之賊
不下三千餘人湘勇把總張以德千總易傳武
喻能益均受礮傷殞命二十一日羅澤南李續
賓督同蔣益澧唐訓方攻西門林福祥趙如勝

督同文明等攻東門該逆猶閉門相抗時廣信
府知府袁泳錫自上游馳至率同弋陽縣知縣
王蘭併力圍攻湘勇先登各軍繼入收復城池
擒獲長髮賊二百餘名追獲三百餘名等情臣
查弋陽股匪妄冀攻撲郡城梗塞江浙要道經
該道羅澤南等分隊進攻兩獲大勝克復縣城
勦辦洵爲妥速在事出力員弁兵勇容臣查明

顛懇

恩施至敗逃餘匪由北門竄出該處路通德興樂平已
令羅澤南等迅速跟剿饒州都昌之賊前擬令
都司吳錫光先攻都昌次攻饒郡茲恐弋陽敗
匪竄饒攻之難克已飭吳錫光迅趨饒郡俟羅
澤南到彼會剿以分九江匪勢署弋陽縣知縣
王蘭被匪攻撲入城咎有應得相應請

旨將王蘭卽行革職廣信府知府袁泳錫失守屬境例
有處分業經協同收復功過相抵應請免其置
議副將銜浙江處州左營遊擊常海力戰陣亡
合無仰懇

天恩照副將例議卹其子六品軍功吉慧及湘勇把總
張以德千總易傳武喻能益並請交部從優議
卹奏入

上諭內閣曰江西饒州賊匪分竄弋陽經甯紹台道羅澤南知府李續賓等分隊進攻勦辦尙爲奮勉仍著陳啟邁督同該員等跟勦將逆匪悉數殲除署弋陽縣知縣王蘭被匪破城咎有應得著卽行革職廣信府知府袁泳錫協同收復地方功過尙足相抵著免其置議浙江處州左營遊擊副將銜常海屢立戰功今在途次陣亡深堪憫惜著照副將例議卹其子六

品軍功吉慧把總張以德千總易傳武喻能益著一
併交部從優議卹

陳啟邁又奏言據武甯防堵委員林懋勳等稟
稱二月十七日興國州賊匪千餘名竄至紐絲
嶺林懋勳商令馬占魁帶兵駐紮芭蕉地方防
守二十都要隘林懋勳親率團勇一千餘名於
十八日馳抵紐絲嶺圍剿殺賊四十餘名焚燬

賊營六座三月初一日賊匪二千餘人竄至路口地方林懋勳馬占魁率兵勇往勦賊衆列陣山頂林懋勳等同時並進該逆礮石齊下我兵無一退卻協力衝殺逆衆奔潰追逐十餘里殺賊一百數十名初四日逆黨三千餘人分三路來撲我營林懋勳等督同把總汪長春等帶勇迎勦行抵大富地方見賊衆漫山而至林懋勳

激勵士卒勇往直前槍礮齊施斬僞丞相劉棕
昆葉佳汝等於陣賊不能支我軍追勦數里計
轟斃賊匪二百六十餘人殲斃三百八十餘人
餘匪逃回興國州等情查賊匪復擾興國通山
等州縣經林懋勳遇事身先不避艱險屢著戰
功不無微勞足錄查林懋勳前因被叅革職合
無仰懇

天恩准其開復原官遇有知府缺出不論繁簡儘先補用以示鼓勵其餘出力傷亡弁兵紳勇查明另行覈辦奏入

上諭內閣曰已革知府林懋勳於逆匪竄擾武甯等處先後帶勇剿捕將賊匪擊退尙屬著有微勞林懋勳著准其開復原官遇有知府缺出不論繁簡儘先補用以示鼓勵

欽定勦平粵匪方略卷一百二十七 乙卯年

四月十九日 辛亥 崇恩奏言臣於上年五月由德

州追賊至高唐州城外紮營親率各員躬冒矢
石奮勇爭先並遴委幹員稽查營務收支糧餉
襄理文案計至今年二月收復州城閱時十月
之久在事各員未便沒其微勞又善後事宜經
臣派定文武員弁會同該州次第舉行迨賊竄

至馮官屯後各將弁隨同圍剿均極奮勉現在
大功告蒞可否容臣擇尤分案請獎之處出自
天恩奏入得

旨允行

同日

上命軍機大臣傳諭僧格林沁曰昨據僧格林沁奏各
營官兵及投誠義勇分別撤留已諭知該大臣將兵

勇數目及應挑應撤各數詳細具奏因思投誠義勇人非一省良莠難齊其中真心悔罪奮勉立功者固不乏人而勢蹙求生仍懷反側者亦復不少該大臣駕馭有方自不至別有他患以後管帶之人卽恐寬猛兩難易滋流弊況此項義勇南人居多儻帶往南省而有劉子明之類溷雜其中尤爲可慮現在該大臣如何挑選其挑選之後是否分隸各營抑仍令自

爲一隊應如何約束以懾其氣誠信以結其心卽著
該大臣於回京之先豫向管帶各員密授操縱機宜
方爲妥善或卽分隸營伍使散而易制將來卽令充
補各營缺額亦屬安插之一法至挑贖之勇昨據聲
稱酌給川資給予免罪護照遣發回籍其是否呈繳
軍械未經敘及儻該勇等原籍尙爲賊踞或回籍後
並無生業可謀又恐流而爲匪加以結隊同行或恃

有免罪執照沿途騷擾亦不可不防兼恐該勇等在
北路軍營日久一旦投入賊營或熟悉道路或洩漏
虛實尤屬可慮該大臣務於解散之中熟籌鈐制之
法不可稍存大意

二十二日甲寅曾國藩塔齊布奏言據羅澤南會

同林福祥稟稱三月十九日自貴溪拔營至水
門埠二十日向弋陽進發羅澤南與李續賓帶

湘勇中右兩營爲前隊蔣益澧帶湘勇左營唐
訓方帶訓字營爲二隊林福祥與趙如勝率捷
勝軍爲三隊文明等率寶勇爲四隊訓導鍾世
植等率志同等軍爲五隊各以六成隊迎敵留
四成隊保護輜重於二十二十一等日由大水
橋至五里亭陳家山等處與賊接仗疊獲大勝
進攻弋陽縣城西北兩門嗣復環攻東門先後

斃賊數千名賊衆敗潰其在城者猶閉城自固
湘勇先登諸軍繼入當將弋陽縣城克復等因
查廣信爲江西富饒之區奏報必由之路保全
廣信則內可以屏蔽撫建外可以進攻饒州茲
幸仰賴

天威弋陽股匪就殲大挫兇鋒卽當跟蹤追剿肅清江
西東路以期漸偪皖境此次出力員弁容臣等

集賢堂卷一百二十一
四
擇尤奏請獎敘以資激勸藍翎候補把總張以德候補千總易傳武喻能益奮勇捐軀懇

恩飭部照陣亡例議卹傷亡兵勇查明照例辦理奏入
上諭內閣曰前據陳啟邁奏官軍克復弋陽已降旨將
陣亡之遊擊常海並把總張以德等分別議卹本日
據曾國藩塔齊布奏甯紹台道羅澤南等各帶兵勇
連獲勝仗現在跟蹤追勦等語所有此次出力文武

員弁著曾國藩等擇尤保奏

曾國藩又奏言自咸豐二年粵匪竄鄂迄今不
滿三載而全軍覆潰大敗者五次其間小敗小
潰不可勝數二年十二月初四日粵匪以地道
轟破武昌城垣逆旗猶未登城而城內外兵勇
已狂奔潰散是爲第一次大潰三年春間署督
臣張亮基等招復潰兵添招練勇稍有起色九

月十三日田家鎮失防水陸兵勇同時回奔是
爲第二次大潰其時 臣函致前督 臣吳文鎔謂
鄂省之兵視奔潰爲故常如再行收集必須改
絃更張另募額兵另招練勇而後可以成軍吳
文鎔未及更改卽被崇綸叅劾倉卒出師四年
正月十五日十三營均被踏毀將弁兵勇盡數
逃散是爲第三次大潰崇綸青麀等復收潰兵

並廣募湖南四川之勇支持數月餉盡援絕六月初二日奸細竊發賊旗擁入會垣青麀率兵奔赴湖南沿途逃散大半是爲第四次大潰臣與提臣塔齊布等奉

命東征幸復武漢督臣楊需復收潰兵又招湖北河南之勇數近三萬兵力不爲不厚楊需屢次奏咨亦自敘其戰功之多士卒之勁意謂可簡練精

銳頓改舊觀矣不圖廣濟一敗退至蘄水退至漢口又退至德安棗陽兵勇或從之以行或遇敵不歸是爲第五次大潰夫古今所以激勵軍士者重賞以鼓好勝之心嚴刑以誅奔潰之卒故可用也今湖北兵勇旣不好勝又不畏刑若因循不改其可慮必更有甚於今日者亟宜變易前轍掃除而更張之凡標兵之求歸營伍者

一概不收凡練勇之曾經敗潰者亦不復用大
抵山僻之民多獷悍水鄉之民多浮滑城市多
游惰之習鄉村多樸拙之夫故善用兵者嘗好
用山鄉之卒而不好用城市近水之人臣愚以
爲欲另募湖北額兵宜在襄陽鄖陽等屬深山
窮谷之中招寒苦力作之民擇其英鷲者編入
兵籍假以時日而訓練之與武漢德安等府遠

相隔離絕使向來之潰兵潰勇浮游無歸者不得
改名溷入然後可得一旅之勁兵古之行軍者
克一二名城不以爲喜得一二良將數千精卒
則以爲大喜失一二名城不以爲憂失一二良
將損傷數十壯士則以爲憂卽素稱精銳之師
或積勞而疲或餉匱而散或不和而驕蹇則愈
引以爲憂今日湖北之事省城不遽收復尙不

足患惟通省無一勁兵精卒乃爲無窮之患雖
調他省之兵幸而克復而本省無強兵守之亦
終非可久之道故湖北之急務在於另募額兵
另招新勇目前之收復鄂垣在此異日之保守
楚疆亦在此上年二月間臣具奏江北宜添兩
路勁兵外一路沿江岸而下內一路由蘄廣而
出宿太請

飭袁甲三募壽州光州之勇出漢黃之背不知

皇上已俯准施行否如未蒙

俞允則江北千里極爲空虛無論江面不能清武漢廬
州不能復卽使僥倖而肅清恢復而流賊四散
旁出橫逸截我後路已清之江面不旋踵而梗
塞已復之城垣不旋踵而復失去冬之事卽前
車之鑒伏乞我

皇上廬念南服

神算獨操縱袁甲三不克西上亦懇

飭籌一支勁旅疾出黃州之背並請

飭下湖北督撫另立新軍將前此潰兵潰勇一概革除

蕩滌舊習重振軍威使江之北岸得兩路足恃

之兵可合可分可內可外不特有益於大局卽

臣等南岸之陸兵上下兩處之水師亦皆得所

憑藉有恃不恐矣奏入

上命軍機大臣傳諭楊需胡林翼曰武漢等處屢遭蹂躪可見該省兵勇毫不足恃曾國藩等克復武漢後楊需收集潰兵並招募楚豫之勇爲數不爲不多乃廣濟一敗幾不復振此時必應簡練士卒力挽從前積習惟該督所帶楚北兵勇甚多一時恐未能卽行裁撤另募新兵全在該督等嚴飭帶兵將弁挑選精

銳裁汰疲羸申明紀律信賞必罰庶可轉弱爲強其
首先奔潰之卒卽應處以軍法不得稍存姑息據該
侍郎奏稱襄陽鄖陽民風樸拙招募該處鄉勇自可
得力其宜昌荊州等處當亦可招募以資攻剿前經
諭令該督督同常亮等先復德安節節進剿此時孔
廣順所帶步隊官兵諒已抵楚此項勁旅尙屬可恃
著卽懍遵前旨迅速進剿毋再遷延胡林翼添募水

陸兵勇分布南北兩岸進剿能否得力著加意察看
分別淘汰現在武漢等處如何攻剿情形並著隨時
奏報

二十三日 乙卯 僧格林沁西凌阿奏言 臣等遵查

馮官屯軍營兵勇除哲里木盟等官兵共一千
三百餘員名均經遣撤現存京旗吉林黑龍江
綠營官兵六千餘名投誠義勇三千餘名 臣曾

飭知各統領將傷病老弱官兵詳加查驗擬卽
遣撤歸伍餘存官兵均交臣西凌阿統帶暫在
馮官屯聽候

諭旨並將投誠義勇內直隸山西山東河南之民三百
二十四名先行給與免罪執照賞給川資分遣
回籍各安生業其兩湖等處義勇查有籍隸湖
南之候選知府劉衡籍隸湖北之宣化鎮遊擊

徐廷楷二員歷練可靠當經札委該員等管帶
卽日起程前赴湖北交督臣楊需軍營調遣臣
僧格林沁定於二十二日帶同副都統綿洵侍
衛綳闊赴京跪聆

聖訓並將隨營之巴圖魯侍衛等一併隨帶回京至副
都統那敷德托雲保魁福總兵經文岱均年踰
六旬應請

飭令各回本任以示體恤其隨營各處糧臺直隸糧臺
擬卽裁撤暫留順天糧臺通永道海瑛會同山
東糧臺兗州府知府葉圭書辦理支應奏入

上命軍機大臣傳諭西凌阿曰僧格林沁奏馮官屯現
在京旗吉林黑龍江綠營官兵六千餘名均交西凌
阿統帶聽候諭旨等語該處官兵除裁撤歸伍外尙
存京旗兵若干名吉林兵若干名黑龍江兵若干名

集賢堂卷一百二十一
三
綠營兵若干名暨何省何營統計馬隊若干步隊若干著西凌阿分晰開單詳細具奏現在馮官屯軍務告竣直隸糧臺著卽裁撤其現存官兵著暫留順天糧臺通永道海瑛會同山東糧臺兗州府知府葉圭書辦理支應

僧格林沁西凌阿又奏言馮官屯各營文武歷次進攻晝夜防守著有微勞業蒙

恩准擇尤保奏謹將尤爲出力各員分繕清單恭呈

御覽再訓導劉硯田俊秀劉清溪自備資斧醫治受傷

兵勇痊愈千餘人亦應量予鼓勵可否將劉硯

田以訓導遇缺卽補劉清溪以縣丞選用之處

出自

天恩奏入

上諭內閣曰僧格林沁等奏馮官屯勦賊尤爲出力各

員懇請獎敘乾清門頭等侍衛綑闊護軍參領舒保
均著賞給副都統銜遊擊薩爾善著以參將儘先升
用千總伊靈阿著免補千總以守備儘先升補先換
頂戴千總李永春著賞加守備銜遊擊范維清守備
文鎔千總馬丕基把總吉爾哈奔外委楊文浩高得
順均著賞戴藍翎外委王永太著以把總升用並賞
戴藍翎理藩院員外郎扎克丹著賞戴花翎都司銜

施紹恆守備銜周隆亭均著賞換花翎勇目陶洪順
許錫九均著賞戴藍翎訓導劉硯田著以訓導遇缺
卽補俊秀劉清溪著以縣丞選用

上 又諭內閣曰僧格林沁等奏請將軍營出力官員酌

量獎勵著照所請健銳營副將前鋒參領官福遇有
前鋒參領缺出卽行坐補前鋒校湍多布額外前鋒
校雙興均著遇有委前鋒參領缺出卽行坐補額外

前鋒藍翎長豐伸圖遇有前鋒校缺出卽行坐補以
上四員均著先換頂戴外火器營委烏槍護軍參領
松桂遇有副烏槍護軍參領缺出卽行坐補烏槍護
軍校魁祥遇有空花翎缺出卽行坐補烏槍藍翎長
特克什布遇有烏槍護軍校缺出卽行坐補以上三
員均著先換頂戴以示獎勵

上又諭內閣曰江甯副都統綿洵金州副都統增慶伯

都訥副都統魁福巴里坤總兵經文岱均著交部從
優議敘副都統托雲保齊齊哈爾副都統那敷德吉
林副都統麟瑞均著賞戴花翎

僧格林沁西凌阿又奏言馮官屯逆匪掘地潛
伏我軍難於偏攻籌挑引河自東昌府至賊壘
計程一百二十餘里茲因水勢浸灌軍務及時
告蒞自應將督辦挑河尤爲出力各員開單呈

覽可否照請鼓勵出自

天恩奏入

上諭內閣曰該員等辦理挑河浸灌賊壘軍務得以及時戴功自應酌予獎勵候補內閣侍讀學士瑞禧巡捕營副將史榮椿直隸天津道張起鵬均著交部從優議敘員外郎德克津泰著賞戴花翎通水道海瑛著賞加按察使銜候選知府劉衡著賞戴花翎員外

郎李祐著開缺以知府不論雙單月不入班次遇缺
卽選張琛著開缺以知府儘先選用知縣陸慎言著
免補本班以知州卽補知州曹大綬通判婁鼎知縣
方傳植均著賞戴藍翎通判沈康保徐本璿均著免
選本班以同知選用沈康保並著賞戴花翎遊擊德
克登額著免補遊擊仍留甘肅以參將儘先補用先
換頂戴防禦慶瑞著以佐領儘先補用先換頂戴筆

帖式榮喜著以驍騎校儘先補用先換頂戴委參領
達桑阿薩隆阿均著戴賞藍翎遊擊徐廷楷著以參
將補用張秉鐸著以遊擊仍留直隸不論題選缺出
儘先卽補京營都司李鴻寶著以遊擊補用都司龍
汝亢著免補都司以遊擊補用均著先換頂戴千總
明誠著以守備遇缺卽補先換頂戴

僧格林沁西凌阿又奏言已革布政使張集馨

在營當差深知愧奮奉委辦理引河殫心竭力
茲已軍務告蕺可否量予

恩施奏入

上諭內閣曰已革布政使張集馨著加恩賞給五品頂
戴

僧格林沁西凌阿又奏言逆首李開芳之親隨
李添佑等五名前經奏明一併解京現在劉志

澹一犯因病未能起解業已在營正法奏入報

聞

同日何桂清奏言據衢州鎮總兵富勒興阿等
咨報該逆於前月二十八日分竄常山三十日
全股竄往開化之華埠圖攻縣城富勒興阿帶
兵追剿行至離華埠十五里地方因先被賊撤
去渡船我兵趕紮竹木各箐力圖追襲四月初

一二等日賊由華埠竄至星江薛嶺白沙關一帶現聞該逆退往德興婺源等情 臣節據富勒興阿與金衢嚴道劉成萬將派防情形具報尙非全無準備乃此次聞警後紛紛請餉請兵並將各路兵勇調回常山堵禦 臣以軍情變幻未便遙制當飛致該鎮道探明賊情何處緊急卽從何處進兵乃前接該鎮初一日來咨係在華

畢集國文四卷二百二十一
上諭曰該鎮已回常山而餘
匪自薛嶺白沙關退竄後究竟竄往何方未據
聲明臣惟有嚴飭該鎮道等確探賊蹤合力堵
禦以期仰慰

宸廬奏入

上諭曰該鎮是否退縮無能該道府等有無扶同捏飾
著一併確查迅速具奏勿任貽誤地方

何桂清又奏言前調饒廷選所帶閩兵於四月初四日抵衢廣信玉山均經收復常山開化逆匪仍竄徽饒現飭饒廷選等暫駐常開一帶以防回竄將來如應調赴廣信爲饒郡聲援臣當遵

旨斟酌情形妥爲調度再臣前奏商調金陵鎮江勁旅准向榮咨稱於金陵抽撥川北官兵五百名又

准吉爾杭阿咨稱於鎮江酌調浙兵八百名派
委鎮將都司分別管帶俟到浙後再行派防奏
入報

聞

二十四日丙辰僧格林沁西凌阿奏言前此賊匪

由豫晉北入直境在獨流衆至四萬妖氛甚熾
自王家口被追至阜城連鎮等處被圍被勦殄

除無算逆燄始消內中被脅餘匪欲投出者甚
衆因在河南山西直隸見統兵大臣告示長髮
之人無論捨降一概誅戮是以不敢投出固結
愈堅長驅北犯自准投誠贖罪以來經臣等曉
以大義酌量錄用該勇豈無天良且知

聖恩高厚准予免罪無不感激奮興願效死力打仗陣
亡者極多身受重傷者不知凡幾其爲真心悔

罪卽此可見祇須遵循

聖訓約束以懾其氣誠信以結其心不特反側無虞兼
可使爲我用現將直隸山東山西河南近省之
勇先行遣撤回籍不准攜帶軍械其兩湖江南
安徽之人離家較遠恐其長途滋事現已撥調
赴楚該勇行至相近家鄉之處難免逃回然尙
不致仍投賊營南省之賊蔓延流毒數省臣愚

昧之見若不勦撫兼施深恐兵力未逮粵匪首
先創逆罪不容誅斷難寬貸其餘兩湖及各省
之匪人數過多似宜分別勦撫軍務方有就緒
可否

密飭各省統帶大員體察情形相機辦理奏入得
旨允行

僧格林沁西凌阿又奏言臣現派湖北人六品

藍翎勇目詹啟綸等八名於到楚後暗探賊營一切情形並可宣布

皇仁使兩湖被裹之眾咸知

聖恩高厚或可及早解散奏入報

聞

二十五日丁巳扎拉芬楊需奏言臣楊需前因楚

北兵勇屢經敗挫銳氣未復擇其稍能奮勇者

分派前進以勦爲防終以兵單力弱致賊乘間
復竄德安適臣扎拉芬與常亮馬步隊陸續行
抵棗陽卽會同進駐隨州一面飛咨孔廣順速
由應山前進四月十二日派楊昌泗等由應山
之馬平港進紮長林岡訥欽進駐隨州之浙河
臣楊需督都司棟成遊擊常德駐隨州之望城
岡臣扎拉芬駐隨州之五里墩常亮駐隨州南

門外十三日賊匪大股七八千人分撲平林市
長林岡楊昌泗等分投迎勦先勝後敗兵勇傷
亡數百人退至馬平港十四五等日賊由馬平
港竄至浙河訥欽等與賊隔河相拒槍礮齊發
傷賊數十名賊繞至望城岡訥欽等隔河尾追
賊終不退臣等見賊後隊繼至急催常亮接應
常亮派二百騎過河衝殺失利退回將步隊衝

亂賊遂乘勢過河官兵退至五里墩臣扎拉芬親督馬步連環轟擊楊昌泗等亦均趕至殺賊七八百名賊始敗竄追至浙河而返查隨州地方馬隊原難施展常亮當危急之際輒因地勢不便全軍撤退殊屬應援不力相應請

旨將西安副都統常亮摘去翎頂以示薄懲惟馬隊既不得力扎拉芬一軍亦僅二千餘人尙有步隊

五百名未到兵力實單應請

飭下孔廣順迅速帶兵星夜由應山前來援應

楊需又奏言楚北地多湖澤陂塘水田相望於
馬隊實爲不便不若將常亮馬隊遣赴豫省防
守三關另請

飭僧格林沁將步隊官兵酌派二三千名來楚庶彼此
均可得力

楊霈又奏言四月十六日賊自浙川悉衆來撲
扎拉芬營盤 臣卽飛調防堵洛陽店之棟發知
府崔蘭馨軍功樂九成紳士張華封速帶團勇
來援扎拉芬親督馬隊接仗劉富成隨同力戰
殺賊千餘人賊匪愈聚愈多圍裏數重抵死不
退扎拉芬令各兵均入營盤內堵擊劉富成仍
至營盤外據橋扼守又斃賊匪千餘人賊圍漸

遠訥欽等屢次突圍均不得入兵勇傷亡潰散者數百人延至半夜槍礮聲寂探知劉富成由南路潰圍而出時崔蘭馨樂九成張華封均未趕到扎拉芬面受槍傷裏創力戰已由南路赴襄陽查扎拉芬後起步隊尙在襄陽一帶糧臺又在襄陽或卽赴該處整頓隊伍調治槍傷再圖進剿扎拉芬精細勇敢所部馬步隊亦最奮

勇若趕緊整頓會齊後隊振旅而出必可得力
一面將現有兵勇趕緊收集分扼厲山官灘等
要路臣與常亮駐紮唐縣鎮以遏賊之西竄並
飛催孔廣順速由應山前來救援至唐縣鎮以
上道路紛歧更屬防不勝防儻賊匪分道狼奔
我兵備多勢分愈難堵禦惟有竭盡心力圖保
襄樊斷不敢稍有懈弛奏入

上命軍機大臣傳諭扎拉芬楊需曰此次賊匪大股分
撲平林市長林岡楊昌泗等迎勦先勝後挫常亮所
帶馬隊退回時反將步隊衝亂扎拉芬營盤被圍該
將軍受傷潰圍而出現在襄樊一帶情形喫重本日
已諭令西凌阿在山東軍營撥綠營步隊二千名馳
赴湖北聽候該督調遣並諭英桂迅飭孔廣順由應
山前往會勦其常亮所帶馬隊卽歸豫省防守三關

扎拉芬現在是否由南路赴襄陽該郡係糧臺重地
且尙有後起步隊該將軍到彼一面嚴密布置一面
仍趕緊整頓與楊需諸軍合力進剿楊需屢次挫失
若再不知奮勉致逆匪肆擾襄樊自問當得何罪現
在荏平縣馮官屯賊匪悉數殄滅投誠之兩湖義勇
僧格林沁已派員管帶回籍交該督等調遣並據該
大臣現派勇目詹啟綸等八名於到楚後暗探賊營

設法解散該督卽當隨時察看情形勦撫兼施妥爲辦理

上又命軍機大臣傳諭西凌阿曰昨據僧格林沁奏兩湖投誠義勇派令知府劉衡等管帶赴楚交楊需調遣本日據楊需等奏武漢賊匪上竄德安常亮所帶馬隊接仗失利楚北地勢於馬隊不甚相宜請飭酌調步隊赴楚助勦等語著西凌阿於馮官屯官兵內

挑選綠營步隊精兵二千名配齊軍裝器械揀派得力將弁管帶卽日前赴楊需軍營聽候調遣

上諭內閣曰武漢賊匪竄至隨州之平林市等處經楊昌泗等分投迎剿殺賊二百餘名扎拉芬派隊會同楊需等於望城岡進剿西安副都統常亮帶領馬隊經楊需催調接應旋因失利退回實屬應接不力常亮著摘去頂戴拔去花翎以示薄懲

同日英桂奏言據探逆匪直犯隨州四月十六日在隨州城外祖師廟地方與官兵接仗西安將軍扎拉芬等率馬隊殺賊千餘名大股退踞浙河由應山至隨州之平林市馬平港節節有賊十八日派防平靖關守備蔡元輔解到奸細一名訊據供稱賊匪一股竄擾棗陽一股上竄襄陽樊城儻不能前進卽乘便窺伺信陽等語

正在飛咨楊需等派兵擊勦復接楊需來咨催
令孔廣順迅由應山徑赴隨州當咨會孔廣順
卽日督師進勦如逆匪中途埋伏或分股阻拒
務須節節準備以期會合夾攻至德安接壤豫
疆此時北兵進赴隨州信陽防堵更關緊要臣
惟有嚴督文武實力巡防不敢稍涉大意奏入

上命軍機大臣傳諭英桂曰此次逆匪分股上竄德安

據河南所獲逆犯訊有欲由隨州棗陽竄往襄樊之
供南陽一帶極應加意嚴防該撫已知會孔廣順卽
由關外拔營向應山進發急宜迅催該提督徑赴隨
州會勦力遏楚北賊鋒卽以保護豫省邊界至常亮
挫失半由所帶馬隊於地勢不宜不如飭令常亮將
馬隊退紮三關以防豫境本日已諭令西凌阿挑選
步兵二千名派員管帶赴楚應援此項官兵行抵河

南該撫不得截留楚省軍情仍著隨時奏聞

同日西凌阿奏言 臣隨同僧格林沁在營以來
每見僧格林沁辦理軍務殫竭心力一切賞罰
無不公允惟於藩邸親隨多所引嫌二月二十
八日逆匪施放地雷攻奪礮臺僧格林沁聞警
帶領親隨數名趕緊前往詎料該逆將僧格林
沁隨帶之三等護衛巴薩拉礮斃僧格林沁因

係親隨不肯入奏茲軍務告蒞謹據實陳明可
否

飭部覈給卹典出自

天恩再科爾沁四品台吉伯彥都古拉喜來營省親隨
同進仗甚屬奮勉臣察看該台吉才堪造就而
僧格林沁因係胞姪不肯請獎又四品頂戴藍
翎護衛瑪勒洪阿奇蘇阿勒騰桑五品頂戴藍

翎護衛鄂奇爾額普圖等皆疊次隨同打仗卓
著戰功僧格林沁亦未敢奏請

恩施奏八

上諭內閣曰僧格林沁隨帶之三等護衛巴薩拉前在
馮官屯軍營打仗出力中礮陣亡著交部照例議卹
科爾沁四品台吉伯彥都古拉喜四品頂戴藍翎護
衛瑪勒洪阿奇蘇阿勒騰桑五品頂戴藍翎護衛鄂

奇爾額普圖皆疊次隨同打仗各有斬擒伯彥都古
拉喜著賞戴花翎瑪勒洪阿等五員均著賞換花翎

欽定勦平粵匪方略卷一百二十八 乙卯年

四月二十六日 戊午 和春福濟奏言廬城經官兵

合圍逆匪不能竄出外援疊至均經隨時擊退

臣等於四月初七八九等日親督官軍晝夜圍

攻並用大礮轟城逆匪憑城抗拒力攻三晝夜

賊仍死守當令官兵收隊仍以大礮轟擊初十

日將水西門城牆外面攻陷丈餘卽督飭官兵

奮進該逆用木植堵塞槍礮甚密我軍尙隔城
河因雨後水漲不能越過當飭令四面合圍暗
襲明攻無論何處得手卽乘勢登城詎逆情詭
譎又值不時大雨連攻五晝夜扼守如故十四
日探得煙墩集地方有賊匪二千餘人紮營三
座臣等於十五日統領官兵馳往該逆分股出
迎吉順鄭魁士嵩瑞等分途擊勦賊衆死力抵

拒鏖戰甚久斃賊無算餘賊驚潰卽將賊壘三座先後奪獲追殺十餘里約斃賊匪三四百名現仍設法圍剿以期迅圖克復奏入

上諭內閣曰廬城賊匪外援疊至均被官兵擊退城中餘匪情形已極窮蹙著和春福濟督率兵勇迅速合圍力圖克復

二十七日己未楊需奏言據都司來福在棗陽遇

營總烏爾袞布等詢知將軍陣亡情形會同面稟臣始知扎拉芬於十六日在營外督隊面頰受傷卽將隊伍撤入營內裏創督戰復受槍傷自顙貫腦後傷重難支入帳稍歇猶恐軍心惶懼復強起督隊擊賊自燃槍礮斃賊多名入帳密諭烏爾袞布等鎮壓督率相機帶護兵丁出營延至酉刻因傷身故額外錢邦彥將屍身埋

於營中烏爾袞布等仍傳令嚴堵至三更後賊
圍漸遠遂帶兵潛出營盤於松林內埋伏逐漸
渡河由南山小路行走賊匪知覺追趕松林內
吶喊開槍賊不知我虛實遂不敢追烏爾袞布
等徑至棗陽將赴襄陽馬步兵丁有至棗陽者
有至襄陽者有迷失路徑尚無下落者臣卽委
烏爾袞布收集滿營馬隊委都司定安收集各

營步隊再行查明傷亡員弁兵丁分別辦理並
派幹弁設法覓取扎拉芬屍身如禮殯殮查西
安將軍扎拉芬強毅勇敢馭將統兵恩威並著
此次力戰兩日殺賊二千餘人身受重傷猶復
裹創督戰臨歿密諭將弁傳令鎮壓護出兵丁
實屬謀勇兼全遽爾陣亡殊堪痛惜應如何從
優議卹之處出自

天恩臣與扎拉芬分南北兩路擊賊知扎拉芬營盤喫
重將兵勇全數派往並催調常亮馬隊赴援乃
常亮已遠赴唐縣鎮迄未前來罪無可道應請
旨將常亮革職臣救援不力並請

飭部將臣議處奏入

上命軍機大臣傳諭楊需曰扎拉芬於五里墩與賊接
仗楊需近在數里並不實力救援反因礮聲已息疑

其已赴襄陽迨經敗兵馳報始知該將軍因傷身故
種種貽誤殊出情理之外楊需現統兵勇爲數不少
著將撲竄隨州之賊迅速殲除以期進攻德安至扎
拉芬所統陝兵均屬勁旅除潰亡以外所存尙有若
干並著楊需設法招集隨營攻勦不得俟孔廣順之
兵到齊始行前進儻再不知愧奮則畏葸貽誤之罪
斷難倖邀寬宥也

上又命軍機大臣傳諭西凌阿曰現在湖北荆襄喫重著西凌阿速赴湖北就荆州襄陽所有之兵辦理防剿事務卽將起程日期先行具奏其馮官屯現存官兵著西凌阿選派得力大員暫行統帶聽候諭旨

上又命軍機大臣傳諭官文載增曰本日已將官文補授湖廣總督並諭西凌阿馳往荆襄一帶籌辦防剿事宜現在湖北逆蹤上竄隨州其荆襄等處及河南

邊境地方極形喫重常亮所帶馬隊官兵現經楊霈撥赴信陽三關扎拉芬所帶官兵多已折回棗陽襄陽無人統帶著官文速往隨州接印任事楊霈軍營兵勇屢敗必得加意整頓挑選精銳方資得力前由僧格林沁軍營撥往投誠義勇並著妥爲駕馭俾知感德畏威以助攻勦新授荊州將軍綿洵到任需時所有將軍印務著載增暫行署理該處防守事宜卽

著妥爲布置孔廣順所帶官兵現馳赴應山協勦著
卽星夜趨行遏賊北竄扎拉芬所帶官兵卽交孔廣
順統帶

上諭內閣曰西安將軍扎拉芬由頭等侍衛賞副都統
銜授爲烏魯木齊領隊大臣調任副都統辦事厯練
諸臻妥協上年經朕授爲西安將軍復因楚北逆氛
上竄命該將軍統兵徑赴襄陽一帶會勦四月十三

十五等日賊由平林市等處直犯隨州扎拉芬迎擊於五里墩殺賊千餘人身受槍傷猶復裹創督戰將賊擊退旋因傷重溘逝殊堪痛惜扎拉芬著照將軍陣亡例賜卹准其入城治喪任內一切處分悉予開復應得卹典該衙門察例具奏該將軍有無子嗣並著該旗查明具奏

上又諭內閣曰湖廣總督楊需前因武昌失守降旨革

職仍暫留本任迨逆賊上竄德安該革督以防守襄樊爲名由隨州以至棗陽節節退守疊經嚴旨催令進剿復以兵勇未集遷延觀望迨西安將軍扎拉芬由陝帶兵行抵隨州於五里墩地方與賊接仗被圍該革督坐擁重兵近在數里並不實力救援反催調相去較遠之棟發知府崔蘭馨等前往接應以致該將軍力竭陣亡實屬懦怯無能有心延誤該革督自

廣濟兵潰以後湖北逆匪復肆猖獗其貽誤之罪何堪悉數朕僅予薄懲方冀其振刷精神力贖前愆乃數月以來毫無布置辜恩溺職實堪痛恨楊霈著卽革任仍交官文差遣儻再不知奮勉卽行從重治罪西安副都統常亮於奉調往援時已遠赴唐縣鎮地方臨陣退避可惡已極常亮著卽革職仍留營效力以觀後效

同日陳啟邁奏言據都司吳錫光稟稱率領兵
勇自南康起程三月二十七日行抵離饒州十
五里之雙港駐紮探知郡城賊匪近又新添數
千人並於北門外山坳內埋伏二千餘人以圖
援應二十八日吳錫光派府經歷胡應奎等督
率戰船沿河進攻令吳邦柱等堵截山坳伏賊
兼攻北門又令石玉等帶勇由西北進攻匡鳳

岐等由西南進攻周定邦等由東南進攻劉青雲等由正西進攻教諭黃振成帶勇由正南進攻協力合圍逆匪始於城內望樓放礮拒敵繼見我軍近城突出五大股約有六千餘人來撲吳錫光督率各路兵勇奮力迎戰斃匪三百餘名乘勢進薄城根衝殺入城該逆復於大街分爲七股拌死巷戰我軍亦分隊截擊殺賊一千

二百餘名餘匪均由東北門逃出胡應奎等帶
領水師上岸攔剿黃振成等自城內追出夾擊
敗匪四散狂奔自石門都昌而去現在布置防
守安撫居民等情臣查逆匪竄饒州後卽分股
擾及樂平德興弋陽等縣經吳錫光等收復郡
城自應乘此聲勢移師都昌相機剿辦臣已調
知府耆齡遊擊遮克敦布帶龍南練勇赴饒防

守俾吳錫光得以帶兵進剿其廣信等處之
仍令羅澤南林福祥勦辦此次尤爲出力之都
司吳錫光等自應先行開列奏懇

恩施已革署饒州府知府曹燮坤署饒州營參將遊擊
文忠署鄱陽縣知縣林蔚地方被陷均屬咎有
應得業經隨同克復可否准其功過相抵出自

天恩奏入

上諭內閣曰逆匪自竄踞饒郡後分擾樂平德興弋陽等縣經吳錫光帶領兵勇分路進攻大獲勝仗克復郡城辦理尙屬妥速在事出力各員自應量予鼓勵吳錫光著免補都司以遊擊儘先補用並賞給鏗僧額巴圖魯名號把總艾連陞盧洪升均著以千總儘先補用並賞戴藍翎把總蔡康業外委石玉吳邦柱李玉興周定邦均著以千總儘先補用教諭黃振成

著以知縣分缺閒選用候選府經歷縣丞胡應奎著
以府經歷縣丞不論雙單月分缺前先用黃振成胡
應奎並著賞給六品翎頂隊長吳邦淮著以外委補
用並賞戴藍翎已革署饒州府知府曹燮坤署饒州
營參將文忠署鄱陽縣知縣林蔚地方被賊竄踞均
有應得之咎現在隨同克復郡城功過尙足相抵著
免其置議仍著陳啟邁督飭吳錫光等乘此聲威移

師都昌相機進勦以清江境

同日

上諭內閣曰逆賊李開芳等以邊境莠民甘心從逆輒敢糾領黨與竄擾畿疆實屬罪大惡極現在北路肅清除逆首吉汝元業經殲戮林鳳詳已由連鎮軍營解京正法外所有首逆李開芳現經僧格林沁擒解來京著卽凌遲處死梟首示衆其受有僞職之逆犯

黃懿端謝金生並著凌遲梟示從逆之李添佑譚有
桂章名傳曹得相均著卽行處斬一併梟示以彰國
法而快人心

二十八日 庚申 陳啟邁奏言據羅澤南等稟稱徽

州婺源縣逆匪萬餘人於三月二十日竄至興
安該縣狄上林因賊踞弋陽先期帶領兵勇於
興弋交界隘口守禦致被賊撲入城狄上林卽

知會署遊擊謝必魁督帶河口防兵前往會勦
二十二日齊抵興安圍攻東西兩門該逆力不
能敵盡由北門竄逸當將縣城收復謝必魁復
回河口鎮防守賊匪由北繞竄廣信該郡防兵
本不滿千二十三日賊匪四面圍攻署上饒縣
知縣蔡中和會督同城文武員弁嬰城固守開
放槍礮斃賊無算適逢大雨火器難施賊遂乘

兩薄城緣梯而上蔡中和猶親督兵勇分投截
殺力竭被執罵不絕口被戕甚慘府學教授雷
封及其子文童雷發鳴同時殉節門斗周國書
家人羅勝相繼而死署廣信府經歷姚益謙上
饒縣典史江錫綸貴溪縣縣丞洪立成千總楊
錦鳳玉山汛把總周得鳳鉛山營把總陳炳榮
投效候選從九品沈岳齡等均力戰被害府署

家人吳春胡升楊喜亦俱被戕羅澤南林福祥
與廣信府知府袁泳錫於二十二日探聞婺源
股匪上竄信郡卽留林福祥等暫駐弋陽二十
三日羅澤南等各帶兵勇馳抵興安知郡城已
失二十五日直抵城西之烏石山羅澤南等營
於山之左右賊見我兵築營未就糾衆從西北
南三門來攻我兵鼓勇而前擊斃執旗賊十餘

名賊遂大潰追至城下共擊斃八百餘人傳令
收隊劉希洛帶平江勇自弋陽倍道來郡協勦
二十六日賊衆萬餘復分三路而出羅澤南登
高瞭望知松林內有伏飭令蔣益澧帶勇隱伏
右路之高岡下劉希洛帶勇顯據右路之平岡
排陣以待復令湘勇誘賊近前又令精銳之勇
截其伏路賊不敢進惟於營前一里許施放槍

礮相持許久羅澤南督勇由中路出唐訓方從
中路之右出李續賓從左路出三營齊進殺悍
賊數十人劉希洛蔣益澧督勇繞出右路賊之
伏於松林者又皆爲我所襲賊衆大敗羅澤南
知賊必宵遁擇敢死之士四面巡邏二十七日
飭令各營奮力圍剿袁泳錫亦率兵勇衝殺入
城賊從東門遁去自相踐踏及墮水死者以數

百計敗匪於二十七日竄至玉山攻撲縣城署
知縣張鳴岐等率領兵勇登陴固守斃匪七人
該逆繞由北門向浙江開化之華埠小路竄逸
署廣信營參將玉格於二十一日聞賊陷興安
卽行出城不知所往旋據呈稱前經報明帶領
兵丁在於興弋至郡之朱溪橋堵勦二十三日
賊竄至朱溪橋因寡不敵衆退至城下門已緊

閉不能進城等情查羅澤南移師赴郡連日進
勦均獲大捷卽將城池克復勦辦尙屬妥速惟
探聞該匪復由開化分竄德興自應卽行進勦
業經臣咨會曾國藩飭令羅澤南帶勇馳往德
興與浙軍合力兜擊林福祥所帶各勇暫駐信
郡兼防玉山至代理興安縣知縣狄上林廣信
府知府袁泳錫防範不力咎有應得相應請

旨將袁泳錫狄上林一併革職留任署廣信營參將玉
格當賊蹤入境並不在城固守難保無逃避情
事應請將玉格革職究辦署上饒縣知縣蔡中
和府學教授雷封等協力守城同時被害應請
一併

飭部從優議卹蔡中和死尤慘烈並請於郡城建立專
祠雷封等一同附祀以慰忠魂奏入

上諭內閣曰賊匪由婺原竄陷興安廣信郡縣城池經
羅澤南等督率兵勇剋日收復辦理尙爲迅速在事
出力員弁著陳啟邁等擇尤保奏仍嚴飭各該員弁
等將逃匪搜除淨盡廣信府知府袁泳錫代理興安
縣知縣狄上林防範不力均著革職留任署廣信營
參將玉格著革職拏問嚴行審辦如係先期逃避卽
以軍法從事署上饒縣知縣蔡中和廣信府學教授

雷封署廣信府經歷姚益謙典史江錫綸貴溪縣縣丞洪立成署廣信營千總楊錦鳳玉山汛把總周得鳳鉛山營把總陳炳榮從九品黃依先沈岳齡從九品銜趙震范焜雷封之子雷發鳴門斗周國書家人羅勝吳春胡升楊喜協力守城同時被害深堪憫惻著一併交部從優議卹蔡中和死尤慘烈並著於郡城地方建立專祠將雷封等附祀以慰忠鬼

二十九日辛酉英桂奏言探報扎拉芬由隨州望

城岡派兵自長林岡進擊未能得手勇先潰散
以致建昌官兵被圍扎拉芬營盤不支隨州旋
卽失守賊由隨州西竄現在浙河唐縣鎮萬家
店厲山等處均有賊匪並於隨州池北各鄉擄
糧等情查唐縣鎮與南陽府屬之桐柏唐縣毗
連萬家店厲山等處均與豫境接壤水陸交通

情形實爲喫緊當飭鎮臣邱聯恩卽日拔營由
桐柏唐縣一帶相機堵禦惟邱聯恩原駐西雙
河營盤兵祇六百餘名本屬單薄不得已於九
里關防兵抽撥一百餘名武勝關防兵抽撥三
百餘名一併隨赴南陽以資悍禦德安密邇豫
疆現在賊蹤仍踞郡城三關防堵亦難稍鬆臣
擬將續調之山東官兵駐紮西雙河並分撥數

百名以補武勝等關原數昨據報曹州營兵五百名卽日可到兗州官兵已到一百五十名尙有三百五十名業已飛速迎提至楚北情形自武漢以至德安自德安以至隨州水陸兩路皆有匪蹤孔廣順由應山前進尙須沿途擊勦方能與楊需會合而襄樊重地久爲逆匪垂涎該處爲豫省咽喉路通川陝旁達荊州非常緊要

楊需所帶兵勇率多烏合遇仗輒逃今隨州之
失聞亦壯勇首先潰散軍裝火藥多爲賊有如
逆匪直犯襄樊於大局關繫匪細臣愚以爲須
調重兵自北而南始能大加懲創馮官屯殘匪
現已蕩平合無仰懇

聖恩飭撥得勝精兵四五千名或由南陽取道入楚或
由陝西馳赴襄陽合力攻剿臣惟有激勵兵勇

實力堵禦不敢稍有疏虞奏入

上命軍機大臣傳諭英桂曰豫省南路接壤楚北自德安告警信陽已形喫重況隨州更被占踞南陽密邇賊蹤自應添撥重兵以資捍禦昨已有旨諭令西凌阿赴荆襄一帶防剿本日復諭該都統迅速起程將留駐馮官屯各營官兵六千名全數帶往抵豫時留兵一千五百名著卽由英桂派令相機堵禦加以常

亮移紮三關之馬隊及邱聯恩等之兵儘可擇要分
防英桂惟當竭力堵遏嚴飭在事文武勿稍鬆懈以
固疆圉

上又命軍機大臣傳諭西凌阿曰現在河南省南路邊
防極爲喫緊湖北攻勦之兵尙形單弱均非厚集重
兵不足以資勦辦所有馮官屯軍營存兵除步隊二
千名業經派員帶往湖北並令健銳營內外火器營

官兵分起回京外其餘四千名著西凌阿迅卽一併
統帶悉數起程路過河南著截留一千五百名交英
桂調遣此外官兵該都統卽帶赴湖北會同官文等
合力攻勦將竄踞隨州之賊趕緊殲除前僧格林沁
奏兩湖投誠義勇汰令知府劉衡等管解前往湖北
此項義勇卽歸西凌阿統帶尤應妥爲駕馭不可稍
涉大意

上又命軍機大臣傳諭官文曰本日據英桂奏隨州已
爲賊踞業經降旨令西凌阿統帶馮官屯得勝官兵
四千名卽日赴楚援勦合之前調綠營步隊二千名
並劉衡等帶往之勇統計兵勇爲數已屬不少兼有
孔廣順帶領兵勇由應山等處進攻隨州賊匪該督
務須恪遵前旨飛催各路兵勇併力進攻其劉衡等
所帶投誠義勇是否業已抵楚此項義勇駕馭頗難

西凌阿到楚後卽可歸其管帶至扎拉芬帶往陝省
官兵初到時接仗頗爲得力現雖潰散著卽行招集
以資攻勦北路兵勇到楚需時該督當就現有兵勇
相機進勦並將近日布置情形迅速馳奏

同日官文載增奏言據探署撫臣胡林翼於三
月十六日進屯石嘴副將王國才及臬司李孟
羣水軍均屯沌口離武漢城各三十里署撫臣

於十八至二十二日數攻賊巢在八步街油坊
嶺等處各殺賊數十名進屯離城十五里之袁
冢河王國才於三十日出隊賊衆五六千人來
撲參將恆泰外委李奇剛直入重圍攻進土城
同時陣亡幸李孟羣暨知府彭玉麟等飛駛礮
船接應上岸衝突斬獲數百名落河淹斃者無
數直追至漢陽西門外卽在潮關屯紮四月十

二日署撫臣督兵連踏金沙洲白沙洲賊營大
獲勝仗殺斃二百餘名王國才連毀漢陽城外
賊營李孟羣礮船亦至武昌鮎魚套直下襄河
攻塘角青山燒賊船二百餘隻至德安敗匪在
孝感縣屬小河上下裹脅萬人於三月二十八
日直竄應山應城回踞德安及阜市一帶督臣
於二十九日赴隨州西安將軍扎拉芬亦抵隨

州接仗未能得手三十日至四月初六等日賊
匪由鄆家灣楊林溝先後竄至仙桃鎮均經兵
勇擊退副都統魁玉守備穆租索朗等現仍在
仙桃鎮防勦扼其上竄臣等惟有認真防禦力
保荊州並疏通川楚要路不敢稍形疏懈奏入

報

聞

欽定勦平粵匪方略卷一百二十九 乙卯年

五月初一日 壬戌

上命軍機大臣傳諭西凌阿曰昨因逆匪竄踞隨州諭令西凌阿帶兵馳赴湖北本日復授西凌阿爲欽差大臣督辦湖北軍務所有馮官屯現存官兵四千名著該大臣挑選馬隊官兵二千名交克興阿都興阿史榮椿統帶仍駐紮馮官屯聽候調遣其史榮椿所

帶巡捕營官兵二百餘名著卽撤回歸伍其餘官兵
該大臣卽統帶前往由河南馳赴湖北會同官文等
相機進剿至河南需兵防堵該大臣路過河南仍酌
留兵一千五百名交英桂調遣孔廣順所帶官兵計
已早到統歸該大臣調度其劉衡等帶往之投誠義
勇應如何示以恩信使之感激用命西凌阿在營日
久必能妥爲駕馭湖北兵勇屢經潰敗多不足恃必

當加以挑選方可留營不至徒糜軍餉

上又命軍機大臣傳諭桂良崇恩曰昨據英桂奏湖北隨州被賊占踞德安賊蹤未退本日已授西凌阿爲欽差大臣統兵赴鄂督勦著桂良於直隸省挑選精兵三千名崇恩於山東省挑選精兵二千名聽候調遣

上諭內閣曰察哈爾都統西凌阿著授爲欽差大臣頒

給關防統帶馮官屯得勝官兵馳驛前往湖北督辦
軍務

初二日癸亥會國藩塔齊布奏言據羅澤南等疊

次稟報三月二十一日克復弋陽後餘匪竄踞
興安當以興安爲入廣信要道不可不急爲撲
滅卽帶湘勇由貴溪馳赴興安二十三日訪知
興安縣之賊係另股由安徽婺源而來冀與弋

陽之賊共攻廣信並擄船百餘將分股以掠河
口二十一日初至興安是日我兵破賊於弋陽
該逆尙未之知也現聞弋賊大敗興安股匪不
及待弋賊來會已於二十二日由北門逃竄其
兇悍者東上廣信徑至府西三十里之坑口大
路口一帶羅澤南卽由興安馳赴廣信復令劉
希洛帶平江勇八百倍道前進與湘勇同赴廣

郡羅澤南探聞廣信已於二十三日淪陷卽帶
湘勇訓勇馳至廣信城西之烏石山並飭安慶
府知府李續賓營於山左知縣唐訓方從九品
蔣益澧營於山右防賊數路夾擊賊見我兵突
至築壘未就遽統大衆來撲始以數千人由西
門出攻我軍之中營繼由北門出數千人爲一
股攻右營又以一股由南繞出攻左營訓勇營

勢極兇悍我軍整隊以出排列山岡不速與戰
俟賊力竭然後鼓勇而前斃賊十餘名賊遂大
潰共擊斃八百餘名二十六日賊衆萬餘忽分
三路而出又以數千人埋伏樹林深處羅澤南
瞭望賊伏所在卽飭蔣益澧帶勇伏右路之高
岡下劉希洛帶勇據右路之平岡又派精銳之
勇約百餘人爲一隊分途潛往截其埋伏之路

賊之三路來者於營前一里許放槍數次相持
已久羅澤南知彼氣已衰遂督湘勇中營由中
路出唐訓方帶訓字營從中路之右出李續賓
帶湘勇右營從左路出三營齊進殺賊千餘人
劉希洛蔣益澧之勇皆從大路繞出賊之藏伏
樹林者亦爲伏兵所襲乘勝追勦沿途殺斃者
又千餘人餘賊遂閉城以拒忽大雨如注城上

敵不能開我軍冒雨圍攻無一退者日暮收隊
防賊宵遁暗使敢死之士四路巡邏二十七日
飭各營再行圍剿賊潰從東門逃出又於鄉間
捕剿四百餘人當卽克復郡城按察使銜甯紹
台道羅澤南轉戰千里審幾度勢謀勇深沈每
於未築營壘之際猝遇賊至能從容鎮定以寡
勝衆應請

旨交部從優議敘奏入

上諭內閣曰此次官軍克復廣信郡城按察使銜浙江甯紹台道羅澤南著交部從優議敘

同日托明阿陳金綬雷以誠奏言據遊擊鄧鳳林等稟報本月初十日金陵賊船十餘隻駛至江浦紛紛登岸該文武督帶兵勇迎勦斃賊多名餘賊遁回南岸十三日大幫復來鄧鳳林等

卽帶隊迎截殲斃無數復據江浦浦口六合等處稟報武慶等聞賊大幫撲往江浦正撥馬隊馳往應援忽於十四日有南岸賊船一百號開礮直轟浦口當經總兵葉常春副將周希濂督兵開礮當酣戰時又有另股逆黨由寶塔根登岸直撲浦口營盤武慶西昌阿伊興額督率馬步各路迎擊追至江邊復斬多名十五日賊船

又復來撲經葉常春等督帶八艇船迎勦擊沈
賊船數隻賊且戰且退我師順流追近觀音門
又有賊船數十隻自七里洲小河暨觀音門口
內各路蠡擁而來總兵陳世忠與守備彭常宣
等飛駛迎截葉常春等亦由上夾擊賊船披靡
金陵賊匪復率多船撲至寶塔根上岸武慶等
豫分三路截勦殺斃甚多並轟沈賊船多隻二

十一二十二二十三等日臣托明阿等督兵進
攻疊有斬獲賊匪深匿不出臣等接吉爾杭阿
來函現在鎮城外之摩旗山已築一營乘高據
險俯瞰鎮城當可乘此機會南北並舉兼飭焦
山舟師得有順風同擣金山賊營與吉爾杭阿
剋期會攻

同日胡林翼奏言三月三十日副將王國才等

約會知府彭玉麟帶領礮船至鮎魚套口燒燬
賊船數隻該逆乃從營後民房擁出二千餘人
襲我後隊參將恆泰力戰陣亡正危急時彭玉
麟在鮎魚套督戰遙見北軍退卻卽督水師登
岸彭玉麟張啟基等自鸚鵡洲截賊之尾鮑超
王明山等自鸚鵡洲前衝賊之中賊衆始亂是
役也彭玉麟保全之功甚大四月初二日臣復

督兵前進該逆先以悍賊伏於街外民房欲待
我軍深入而襲其後臣派黔勇哨長姜映等六
百人堅立後隊以備之派把總余玉興等力攻
白沙洲賊營殺賊五十餘名該逆果由兩路分
撲臣中路一軍堅立不動其隄外兵勇復從沿
江兩路併力衝殺斃賊九十餘名生擒僞司馬
張亞潰等多名初九日臣復督兵前進見八步

街左右賊幟如林較前多至數倍我軍將近賊
巢伏賊盡出與中路一軍拚死鏖戰千總劉凝
俊陣亡一軍洶洶欲動把總余玉興軍功丁銳
義保升把總吳璘等先經臣派由江岸沿隄而
進見賊攢聚於中路卽率外委楊琢珩等由隄
外梟水來援馳至中路直衝賊隊有黃衣騎馬
賊目最爲兇悍被軍功周玉成等躍至馬前截

死多賊餘賊敗潰是日之未致挫敗則余玉興
楊琢珩等之力也水師是日出隊旋以東南風
大作卽行收軍十二日飛飭水路各軍合力出
隊王國才出攻漢陽賊匿不出彭玉麟以武昌
之下塘角所泊賊船爲其老巢必由鮎魚套小
河口兩處直下塘角焚奪賊船則賊失所恃而
鮎魚套等處乃可得手卽率千總張榮貴衝冒

槍礮直下塘角而以鮑超張啟基截小河口之
賊劉培元王明山截鮎魚套之賊何越珽段康
侯爲後隊接應彭玉麟至塘角守備孫昌凱千
總張榮貴首先撲近賊船擲放火毬火箭頃刻
煙燄蔽天計燒船二百餘號燒斃溺斃賊匪四
百餘人鮑超見有賊船逃往下游卽同曾秉忠
帶師船三十餘隻乘勝窮追直至青山地方不

料南風陡轉急欲收隊回營而水勇逆流搖槳
精力已疲急難上駛賊於上河口開出快蟹數
隻攔江橫截彭玉麟等見下游危急卽與張榮
貴悉力救援而武漢兩城之下賊礮齊發我水
師以江心溜急必須傍岸而行遂致中礮傷死
甚多弁勇裹創力戰無不以一當十衝圍而出
是日自辰至申攻勦四時之久弁勇奮力攻撲

擊破賊營一座殺賊數百名賊始敗退聞督臣
已帶北路勁兵陸續行抵隨州唐縣鎮等處儻
能迅由楊店蔡店直撲漢陽約會臣營同時進
攻當更得力均奏入報

聞

同日

上諭內閣曰荊州將軍綿洵著馳驛前往湖北西凌阿

軍營幫辦軍務

初五日丙寅署湖北按察使李孟羣奏言准撫臣

胡林翼行知咸豐五年三月初三日奉

上諭湖北按察使著李孟羣署理當此勦賊愈緊之時

臣惟有勉策駑駘隨署撫臣並在事文武和衷

努力共濟時艱現由湖南添設礮船百餘隻選募水勇千餘人由金口進紮軍山沌口一帶連

獲勝仗約會兩岸陸軍剋期進剿以遏逆賊上
竄之路其兩岸裏河湖汊紛歧並派撥戰船隨
處搜剿不令旁擾蔓延惟臣等一軍與侍郎曾
國藩聲息間隔其一切奏報軍情調兵籌餉事
宜總理乏人伏懇

皇上簡派統領前來以資節制奏入

上命軍機大臣傳諭胡林翼曰前因賊匪復擾武漢經

曾國藩派令李孟羣回鄂援剿現已由湖南添備礮船百餘隻選募水勇千餘人由金口進紮軍山沌口一帶連獲勝仗該員水軍本歸曾國藩統領現在曾國藩戰船尙未駛出鄱陽若仍待曾國藩調度難免貽誤胡林翼現駐江夏縣屬袁家河相距較近李孟羣所帶船勇卽著胡林翼就近統帶會齊兩岸水陸各軍迅卽克復武漢毋任該逆再圖上竄

初六日丁卯向榮奏言據鄧紹良稟稱賊匪數百

至江甯鎮一帶窺伺該鎮已督兵馳往迎剿據

總兵德安吳全美李德麟等先後稟稱四月十

六日風色正順水陸知會進攻德安將兵分作

三隊齊向三山賊船攻剿該逆遙見我軍水陸

並進卽將礮船截風拒敵吳全美揮令紅單各

船兵勇放礮轟沈賊快蟹船多隻並將賊壘哨

樓延燒陸路兵勇亦各爭先擁撲槍上山梁遊
擊楊瑞乾不避鋒鏑爭先躍登賊壘兵勇亦相
繼由缺口爬越痛加焚斬時把總李起高見賊
營火起飛駕三板登岸帶同兵勇搶至營前砍
殺點礮之賊數名吳全美揮令各船弁兵復由
山右登岸衝入賊卽冒火脫逃竄入山腳賊營
德安親督兵勇乘勝圍攻勇氣百倍李德麟督

領紅單拖罾各船在江面指定賊船轟洗沈碎
多隻先後奪獲九隻乘勢攻進山腳用鐵火箭
射進賊營延轟火藥壘內棚帳俱燃逆匪驚亂
棄壘外竄我軍衝突縱擊俘斬極多一面搜山
追捕一面將賊營賊卡礮臺礮隄盡行焚燬其
王鵬年督領快蟹水勇在江往來轟勦亦擊沈
逆船十有餘隻搜斬竄伏匪夥二十一名三山

江面一律掃蕩無遺是日之戰焚破賊壘三座
毀平礮臺七座賊卡十餘處轟沈賊船七八十
隻焚溺擊殺之賊不下二三千人擬卽會合舟
師相機攻擊大勝關賊營礮臺卽步步水陸進
扼攻赴上游以圖太平至於金陵巢穴疊次進
攻賊皆負嵎不戰十八十九等日賊由龍脖子
潛出臣派隊往擊賊卽遁回奏入

上諭內閣曰此次官軍水陸會勦盡掃三山賊壘大獲全勝金陵逆賊亦於十八十九等日竄撲龍脖子等處均經官軍擊敗水陸各軍正可乘勝上勦著向榮督飭在事各員弁相機設法步步進攻俾江面早就肅清

同日西凌阿奏言臣奉

命帶兵前赴湖北當卽在馮官屯現存官兵四千名內

撥出馬隊官兵一千五百名交克興阿都興阿
史榮椿統帶聽候調遣史榮椿所帶巡捕營兵
二百餘名同京旗官兵一併分起撤回撥出馬
隊七百五十名交副都統麟瑞帶往豫省馮官
屯現存山東本省兵三百餘名 臣酌量將該兵
丁等撤回本省糧臺飛咨該撫另選步隊五百
名派員帶赴河南同麟瑞所帶馬隊一併交英

桂調遣所餘馬隊一千七百餘名酌定初四日
起飭令營總平海帶領頭起營總格綳額帶領
二起總管德楞額協領巴揚阿帶領三起營總
德連帶領四起間日起行臣卽督同第三起於
初八日起程馳驛前往湖北會同官文相機勦
辦

同日官文載增奏言據探賊衆由德安直竄隨

州副都統常亮等接仗失利賊已竄過隨州偏
近唐縣鎮有趨棗陽之勢臣查賊勢猖獗難保
不乘機上竄提臣孔廣順步隊聞已抵應山之
平靖關如能繞赴隨州之背從厲山進勦督臣
等收集兵勇卽向隨州進發該逆腹背受敵自
易擊退惟隨州界連安陸可達襄河荆門上下
一帶尤當益加防範前到荊州川兵二千名原

擬令其由潛江至河陽下擊今棗陽喫重飭令
其改道至荆門沙洋地方取道安陸進勦隨州
能先掣回賊勢使棗陽無虞則襄陽可保卽可
會合北路之兵於隨州併力迎擊已飛咨督臣
等互相策應至後起川兵一千名俟到荆時作
爲各路應援以厚兵力均奏入報

初九日庚午楊需奏言查賊匪分股繞出唐縣鎮

後欲犯棗陽當派劉富成同常亮馬隊駐唐縣
鎮誦欽督帶兵勇扼棗陽之興隆集飛飭署隨
州知州嚴樹森督同紳團由南路進攻臣星夜
馳赴棗陽偵知二十一日賊匪分竄安居浪潭
厲山經知府崔蘭馨等擊退嚴樹森於十六日
調集紳士張華封等趕赴五里墩由南門進攻

州城賊匪閉門不出旋聞城中賊匪無多分股
由小路上竄卽帶勇趕赴姚家巖堵截擊斃多
名賊卽敗退二十三日賊匪大股復至巖樹森
將勇丁分伏山谷險隘處自帶數百迎敵誘入
伏中羣起圍勦殺賊五百餘名其落巖墮堰死
者無算賊遂不敢赴鄉擄掠折回城中巖樹森
等遂於隨州城外三路夾擊殺賊數百人適孔

廣順由應山前來行抵隨州賊見兵勇厚集不敢復入城中由望城岡一帶下竄嚴樹森等殲其後隊五百餘名二十九日克復隨州賊分水陸兩路向德安竄走臣飭各軍迅速進攻德安不敢稍涉疏懈奏入

上諭曰逆匪並未大受懲創分竄無定殊深慮

初十日辛未都察院奏言據已革左副都御史袁

甲三呈稱被議革職來京捧讀

諭旨有被叅擅截餉銀冒銷肥己等情革員督師皖省
所需餉銀奉

旨與和春福濟通融協濟會議有按成分用章程兵丁
口糧照征兵覈減支放壯勇口糧照征勇酌量
變通以每名每日給錢三百爲例銷而校定等
差有多有少以贏補絀仍不及例銷數目並以

樽節之餉多募勇數百人各勇領餉實數有帳簿及領字可稽且軍需例有歸地方攤補者福濟亦奏明正銷之外有副銷並攤補之款臨淮軍需凡一切例不准銷之項均於勇糧等第內合計勻支並無副銷攤款卽例銷內仍多節省緣上年桐城之役革員事後曾函責和春等延不應援本年復以廬州未能卽克兩次具奏伊

等銜恨遂捏造蜚語所奉

諭旨匿不行知其錄行各地方官

諭旨內則稱他人奏叅革員浮支兵勇口糧用油簍藏
銀寄回原籍等因旋見邸鈔始知係和春等所
叅既已奉

旨飭查豈肯自認虛誣至廬州發餉章程多與臨淮不
同應請澈底根究以成信讞所叅油簍藏銀如

有其事加等治罪奏入

上命軍機大臣傳諭怡良曰本日據都察院奏革員袁甲三以被叅冤抑呈訴並將廬州臨淮支發軍餉不同情形呈請查辦該革員開銷勇糧按名統計是否於每名三百文外另有浮銷所稱各勇分別等差以贏補絀仍不及例銷之數是否確有實據其收捐錢文是否均歸軍餉支用抑係有肥己情事著怡良提

同經管糧臺各委員逐款訊辦至和春福濟原叅該
革員油簍藏銀寄回原籍並該革員現控和春等將
叅摺捏改他人等情支發軍餉與廬州不同之處著
一併查奏

同日

上諭內閣曰前因逆匪擾及畿疆特授惠親王爲奉命
大將軍並派恭親王奕訢等辦理京城巡防事宜復

命科爾沁博多勒噶台親王僧格林沁爲參贊大臣
統兵進剿現在北省軍務告蕨河北一律肅清本日
舉行凱撤典禮大將軍及參贊大臣均已恭繳印信
關防所有京城辦理巡防事宜著卽裁撤其在事出
力之司員章京等並著巡防王大臣酌量保奏

十一日 壬申 王履謙奏言行抵孟津查勘北岸之

溫孟一帶及虎牢關等處練勇尙屬嚴整復由

河北鎮臣崇安分派弁兵上下游巡並不時親往督查臣與河臣長鑣梭織往來互相稽察或不至別有疏虞惟從前兩岸民渡卽豫省不下三四十處自查禁歸併官渡後有犯必懲現在北路已平擬卽於官渡適中之區各酌設民渡一處撥給小船一二隻仍派委員會同該管廳縣督率盤查祇准本地民人對岸渡送不許上

下往還似於防河便民兩無妨礙私渡亦不絕
自除再南岸如柳園蘭儀等口各設練勇二百
名本以防北匪回竄是防河專在北岸堵截所
有南岸練勇自宜先行裁撤或統歸撫臣英桂
調防豫省邊境至各州縣聯莊會原所以禦外
侮臣聞河北三府及開封府屬往往借團練爲
名抗官滋事地方官平日旣辦理不善臨時又

補救無方以至軍需正在緊要錢漕羣相觀望
甚至圍城鬩署毆官斃差視爲故常雖經撫臣
英桂懲辦稍爲斂跡恐日久相率效尤膽玩益
甚應請

飭下英桂轉飭司道並該管府州縣剴切曉諭不得復
藉聯莊會之名動輒聚衆轉致紛擾奏入

上命軍機大臣傳諭王履謙長臻英桂曰現在北路逆

匪雖已肅清河南邊界賊氛尙近河岸巡防仍未可
稍形鬆懈王履謙所請於官渡適中之區各酌設民
渡一處撥給小船一二隻以供對渡之用係爲便民
起見著准其添設仍會同長臻諄切曉諭祇准本地
居民對岸渡送不得上下往來如有私自行駛卽行
拏究並嚴飭地方河工各文武一體嚴密稽察南岸
柳園蘭儀等口原設練勇亦著照所請卽行裁撤或

應遣散或應調赴何處著王履謙長臻會同英桂妥
商籌辦至近來地方團練原以保衛鄉閭乃河南彰
衛懷及開封等屬抗糧滋事之案層見疊出皆因聯
莊會借團練爲名糾衆抗官相率效尤後患何堪設
想著英桂督飭該地方官剴切曉諭隨時懲辦北路
軍務已平所辦聯莊會是否可以裁撤並著該撫酌
量辦理不得稍涉彌縫以致將來釀成大患恐該撫

不能當此重咎也

新編皇朝通志卷之三十一

三

欽定勦平粵匪方略卷一百三十 乙卯年

五月十四日 乙亥 巡防王大臣奏言賽尙阿因軍

務獲咎議罪自在巡防處差委以來頗知愧奮
可否免罪之處伏候

聖裁奏入

上諭內閣曰賽尙阿前以大學士奉命督師楚粵當賊
匪困守山箐坐擁重兵不能立即撲滅及賊竄永安

纂爾州城又不能剋期攻復嗣後赴援桂林力守長
沙祇能獲全二城未能扼其竄逸以致該逆蔓延數
省荼毒生靈勞師五載有餘糜餉數千萬兩揆其貽
誤情節較之其餘獲罪各員實爲尤重惟現在據該
王大臣奏稱該革員自奉差委以來尙知愧奮自應
量予減罪以示法外之仁賽尙阿著改爲發往軍臺
效力贖罪

同日

上諭內閣曰前因訥爾經額於賊匪由懷慶西竄後未能於直隸各要隘嚴密防守致該逆紛擾畿疆經惠親王等遵旨按律擬爲斬監候已降旨照擬定罪該革員奉命督師毫無籌畫其貽誤事機實屬罪無可逭姑念其由懷慶折回帶兵無多各路所調官兵緩不濟急現值首逆就殲畿輔肅清用特寬其一綫之

路以示法外之仁訥爾經額著改爲發往軍臺效力
贖罪

同日

上諭內閣曰張亮基著卽釋回發往湖北軍營交西凌
阿差遣委用

十六日丁丑陳啟邁奏言據義甯州知州葉濟英
等稟報四月十五日有大股逆匪由湖南平江

縣越過該州南樓嶺來撲白沙嶺營盤經防隘
官兵督率練勇迎勦賊稍退卻該逆於十八九
等日由古石嶺杭口竄越入境州城被圍 臣查
贛州府知府耆齡贛標中營遊擊遮克敦布帶
勇已抵饒郡堪資守禦當卽札飭都司吳錫光
選帶在饒勇丁一千名速往援應又飛飭防守
武甯之已革知府林懋勳代理武甯縣知縣汪

寶樹酌撥該縣兵勇一千名督帶倍道前進一
面飭催吳錫光等星速遄行痛加勦洗其武甯
邊界仍令都司馬占魁堵禦以杜興國逆匪闌
入至廣信敗匪四月初一日由開化竄往婺源
而去弋陽敗匪散匿於德興樂平浮梁一帶並
有數千人聚集樂平浮梁交界之湧山欲圖回
竄弋陽經樂平縣營督同紳團進勦該匪旋即

退往浮梁縣之景德鎮現經羅澤南帶領湘勇
取道興安至德興樂平搜拏餘孽就近徑赴浮
梁相機勦辦奏入

上命軍機大臣傳諭陳啟邁曰自武昌失守後湖北崇
通等縣復爲賊踞裹脅日多現有大股逆匪由古石
嶺杭口竄入義甯州境圍困州城湖北大軍現在攻
勦武漢之賊崇通一帶不能兼顧以致賊勢擾及江

境該撫先後派撥兵勇前往堵剿現復札飭吳錫光帶勇千名馳往援應並飛飭知府林懋勳等統帶兵勇倍道前進卽著嚴飭該員等迅速進剿以解州城之圍如兵力不敷仍當酌量添兵助剿饒州業經克復耆齡遮克敦布所帶練勇亦可察看緩急相機調撥如剿辦得手卽當不分畛域越境追擊以助湖北兵力之不及務將此股逆匪盡數剿除其德興等處

餘匪仍飭羅澤南等極力搜捕毋令餘燼復燃

十七日 戊寅 崇恩奏言查西凌阿奉

命赴楚將馮官屯東省糧臺駐守步隊三百餘名撤回

奏明令 臣 另選步隊五百名派員管帶同副都
統麟瑞所帶馬隊赴河南交英桂調遣並經該
大臣札飭遊擊王鳳祥帶領起程現在遵

旨挑備兵一千五百名各營搜索不敷已以餘丁五百

名充數此外實無堪以再調之兵除咨
臣外並飭遊擊王鳳祥來省候示奏入

上命軍機大臣傳諭崇恩曰西凌阿前奏調山東步隊
係交英桂調遣之兵現在豫省防勦尤爲緊要著崇
恩卽於備調官兵一千五百名內挑選精銳步隊五
百名派委得力將弁管帶馳赴河南一帶交英桂調
遣

二十日 巳 辛 西凌阿奏言 臣遵

旨前赴湖北會勦當將所帶馬隊分起前進 臣卽督同
第三起馬隊於五月初八日由馮官屯啟行十
四日馳抵汴梁副都統麟瑞所帶馬步隊七百
五十名遊擊王鳳祥所帶山東步隊五百名係
交英桂調遣該撫現紮信陽 臣已飛飭該副都
統等帶領隊伍向信陽前赴該撫軍營至湖廣

總督官文現在何處紮營由何面進攻臣再行
酌量程途督兵馳赴會同合剿查五營義勇投
誠以來皆知感奮但非餉項充足不足以作其
氣臣起程時僅由糧臺提銀一萬七千兩實形
支絀當行文河南布政使鄭敦謹派委承辦糧
臺幹員來營並由該省寬籌軍需數萬兩旋據
該藩司派出同知陳南金隨營辦理而餉項據

稱無款可籌合無仰懇

天恩飭令該省將臣營應用軍需寬爲籌解奏入

上命軍機大臣傳諭西凌阿曰隨州德安之賊已陸續
下竄總未大受懲創西凌阿所帶兵勇均係精銳之
師必須趕緊會剿兵貴神速斷不可稍涉觀望致誤
事機僧格林沁前奏派勇目詹啟綸等赴楚偵探賊
情該勇目等如探明逆匪情形該大臣察看確實卽

皇朝通志卷一百三十一
可相機布置並將所探情形隨時具奏現派綿洵幫辦該大臣軍務業經起程並帶銀四萬兩前往該大臣馳抵楚省所需軍餉可先與官文通融辦理

上又命軍機大臣傳諭英桂曰西凌阿所帶兵勇約數千名由馮官屯起程僅帶銀一萬七千兩若不豫爲籌備稍有支絀所關匪細現在河南藩司鄭敦謹已派同知陳南金隨往行營辦理支應著英桂督飭該

藩司無論何項迅速籌撥數萬兩解赴該大臣軍營以備接濟英桂現駐信陽距楚較近所有楚北近日賊情務卽偵探明確飛咨該大臣相機進剿該大臣已留馬隊兵七百五十名步隊兵五百名飭令副都統麟瑞等帶赴信陽聽候該撫調遣卽著妥爲布置至各省解項行過豫境並飭該藩司不得任意截留以致顧此失彼

二十一日壬午托明阿陳金綬雷以誠奏言瓜州

逆匪由東岸賊營突出大股一千餘名直撲觀
天橋地方臣陳金綬臣雷以誠立飭東路各營
迎擊賊見官兵卽退至卞家莊副將鞠殿華率
領都司袁得名千總哈桂湘等各帶官兵步步
進逼殲賊一百餘名賊至尹家橋忽由左邊出
賊六七百名抄我大隊袁得名分隊截擊被賊

槍透左臂鞠殿華卽率遊擊馬國陞等接戰復
殲賊一百數十名又從右邊來賊一千數百名
徑撲我隊經都司趙樹棠等分帶官兵迎敵賊
死戰不退臣雷以誠飛飭把總胡德義等率勇
擊斃賊二百餘名復經臣陳金綬親督遊擊王
建功等將馬步分爲三路奮力衝擊賊見兵勢
愈盛敗退狂奔自辰至申共殺賊四五百名又

據分駐江浦之遊擊鄧鳳林等稟稱四月十六日有賊划箠泊西江口登岸竄擾經文武帶領兵勇追截斃賊多名五月初五日鄧鳳林石皓曾勉禮等率領兵勇前往巡哨突見高旺一帶
有賊一千餘名分三路撲來立即會同該處民勇分路迎截適副將吉連與直隸州知州徐曉峯等由西路協攻前來武慶馬隊與曾勉禮練

勇由東路夾擊賊始敗回追至江濱該逆拌死
爭舟望南逃竄其落後之賊盡被擒斬撲江淹
斃不計其數又據焦山水師總兵泊承陞等稟
稱五月初四日瞭見瓜鎮江面有賊船下至金
山周士法卽派守備鞠耀乾帶快艇各船先行
進駛至八號口迎賊船箠開礮奮攻賊不能支
卽回帆敗遁我師緊追見南北兩岸與金山賊

三皇圖之田卷二十三
一

箛齊放大礮鞠耀乾等冒火攏近賊箛連斃數
賊餘皆撲入江流旋有賊船多隻紛來救應兵
丁孫漢章馬紹先等先後躍上賊船殺賊多名
餘船飛奔竄回查鎮江自撫臣吉爾杭阿帶兵
到彼督勦賊勢極蹙難保不渡江北竄恐浦口
觀音門水師單薄已酌撥陳國泰所帶紅單船
六隻派賴鎮海管帶駛赴浦口一面飛飭泊承

陸周士法酌撥戰船上駛協防至金陵至瓜鎮
各要隘師船過單前已咨商吉爾杭阿等續調
上海拖罾船五隻趕緊來江以備調遣並飭儀
徵六合與浦口江浦各文武嚴防北岸奏入

上命軍機大臣傳諭托明阿陳金綬雷以誠曰此次東
西陸路官兵續攻瓜州逆匪雖殲斃多名究未能直
搗賊巢剋期收復且該逆堅匿不出我軍仍無從著

手必須設法進攻或誘賊離巢痛加勦洗斷不可再
事遷延至上下游江面賊船往來無定復聞金陵逆
匪多造船箠欲順流衝突爲下援瓜鎮之計此時急
務必應嚴飭水師各船合力堵勦使瓜鎮之賊不能
互相援應一面督飭陸路諸軍奮力進攻紅單拖罾
各船分防各隘旣屬過單續調拖罾五隻卽飛調來
江以資攻勦其儀徵六合浦口等處均屬北岸扼要

之區著該大臣等嚴飭帶兵文武各員實力防範托
明阿自到揚州以來打仗未嘗不力然往往勝負參
半葺爾瓜州並無城池可守何至被賊久踞攻勦費
力竟與堅城相等恐調度或未盡善抑帶兵諸將恃
勇而不濟以謀耶著托明阿會同陳金綬雷以誠悉
心籌畫謀定後動務操勝算毋得以小有斬擒數日
一奏視若奉行故事也

二十二日癸未英桂奏言已革副都統常亮帶馬

隊一千五百名副都統麟瑞帶馬隊七百五十
名並山東巡撫選撥步隊五百名陸續來豫查
馬隊長於衝突宜用之曠野平原而信陽光山
一帶地多水田並有山徑小路馬隊實難施展
且當此糧餉支絀之際經費尤宜撙節馬隊較
步隊口糧多至倍蓰臣恐以有用之兵置之無

用之地難收實效徒耗餉糈可否仰懇

天恩將常亮所帶馬隊一千五百名麟瑞所帶馬隊七百五十名或派赴別路軍營利用馬隊之地或撤令歸伍之處伏候

欽定奏入

上命軍機大臣傳諭英桂曰山東撥往馬隊於豫省不甚相宜著英桂卽撥出一千名飭赴金陵交向榮調

遺其餘一千二百五十名卽撥赴安徽交和春福濟
分撥布置所有前項馬隊卽著統歸麟瑞管帶俟馳
抵安徽軍營交明後再將金陵軍營之一千名帶往
應由何處渡江著與托明阿妥商前進英桂卽一面
傳知該副都統一面飛咨金陵安徽及沿途地方以
便趨行

英桂又奏言查投誠義勇三千餘名由山東撥

赴楚北軍營調遣經過豫省地方先經 臣派員
沿途小心照料會同各州縣妥速應付出境毋
令滋事現據報頭二兩起已過省城行走尙屬
安靜 臣思軍營募勇原以助兵力之不逮旣需
駕馭得宜以服其心尤必口糧充足以鼓其氣
楚北兵勇雲集需用浩繁與其支絀於將來不
若綢繆於先事而此項義勇尤須寬爲接濟應

請

旨密飭西凌阿於到楚後察看情形如投誠義勇有情願歸農者不若撤令回籍以免他虞否則或分派各營期與兵力相輔並諭管帶員弁妥爲約束俾安反側奏入

上命軍機大臣傳諭西凌阿曰據英桂奏撥赴楚北義勇如有情願歸農者請撤令回籍此項義勇人數衆

多良莠不齊原難保其必遵約束惟現在楚北幾於
徧地皆賊該義勇等又恐無家可歸若紛紛遣散必
至仍流而爲匪祇可就其自願回籍者遣之使歸其
願在行間者或分派各營使兵勇相輔而行不致難
於約束仍須示以恩信有功者酌加獎勵以堅其自
效之心而消其反側之念西凌阿卽遵本月二十日
諭旨統帶精兵會合官文探明賊蹤痛加勦洗仍將

勇目詹啟綸等所探逆情並該大臣抵楚後勦賊情形一併迅速具奏

二十六日 丁亥 胡林翼奏言臬司李孟羣副將王

國才於四月二十六日約會兩岸陸師齊發一

攻鮎魚套一攻漢陽賊舟自辰至午排礮轟擊

賊以戰艦橫截鮎魚套口及漢陽河口我師從

江外攻之斃賊五十餘名王國才等卽攻漢陽

西門賊壘寂不聞聲王國才知賊計詭譎嚴飭
兵勇毋許輕進俄頃伏賊盡出王國才佯卻以
誘之於賊營三里之外民房牆穴豫安木礮迨
賊追至自燃引綫轟斃賊目二名斬擒甚多臣
於是日督隊力攻南岸賊營分兵三路各攻一
壘千總何紹彩等帶勇力攻江邊白沙洲各營
其齡勇恆勇寶勇安勇分攻江隄八步街各營

該弁等知賊營牆濠高深豫選壯士各持斧鍬掘濠拔蠶直逼其壘賊營槍礮如雨江邊各勇中傷三十餘名仍堅立不動江隄各勇始則攻撲甚猛同時中傷五十一名創甚稍卻因扶掖帶傷勇士隊伍雜亂賊遂悉銳乘之適水師知府彭玉麟遙見中路勢將不支卽飭江邊陸師趕回橫截自率水勇協助何紹彩周得魁伍典

三營亦四面前來援應由隄下湖蕩鬼水衝上者數百人其大隊又繞上三里涉淺橫衝殺賊三百餘名後路賊匪數千已被橫截中分爲二先行奔潰惟時援兵已上隄岸而隄岸之勇目亦督隊回殺無一賊得脫者二十七二十八五月初二初六等日水陸復出隊力攻或以數十人誘之或以大隊偪之賊終不出接督臣棗陽

魯次函稱西安將軍力戰陣亡德安一帶賊氛
尙惡可否懇

恩迅催塔齊布孔廣順進兵援楚庶大江南北可以速
復而江西湖北水軍不至爲賊中梗

胡林翼又奏言臣力攻武昌一月有餘近日賊
更閉匿不出知其必有奸謀五月初九日適有
投誠降賊探知賊計堅守不戰於初七八等日

潛啟東門夜出大股迂道上竄夜行晝伏定於
初十日陰襲金口以斷水陸餉道 臣軍兵力不
厚金口僅有守護勇丁數百名分防紙坊兵勇
亦僅有一千二百名勢恐不支萬一賊匪竄踞
則後路糧餉軍火必致斷絕又因北岸亦關緊
要已續派兵勇千二百名渡江協勦兵力難以
再分 臣卽日親提各勇飛馳金口紮營未畢而

紙坊兵勇千二百名於初九日三更被賊圍攻
力戰一夜初十日業已潰散賊之全隊直犯金
口分五路來撲 臣軍豫分三路埋伏以待而以
三路接戰千總何紹彩等各率百餘人誘賊而
以大隊旋轉繞之殺賊一百八十餘名偪溺內
湖淹斃者約二百名戰至黃昏數路之賊均經
敗退我軍亦收隊修整牆壘並據水師彭玉麟

鮑超張啟基等稟稱是日下游有另股賊匪循
江上竄我軍過江轟擊各用三板排礮攻之斃
賊甚多賊敗下走十一日賊復四路來撲遙見
樹林埋伏尤多臣飭各營登高審視按兵不動
專派長字營六百人深入誘之賊果大至伏賊
亦起我軍仍分六路應之何紹彩周得魁伍典
丁銳義等各率練勇分投勦殺斬首二百十三

級溺斃約百人尙有賊千餘經署臬司李孟羣
督飭水師遊擊何越珽率勇登岸擊退此次賊
匪欲抄襲各營後路官軍未爲所乘水陸併力
禦之故連戰皆捷臣仍督飭各營實力攻勦迅
殄逆氛奏入

上命軍機大臣傳諭胡林翼曰武漢賊勢尙形猖獗該
署撫所帶兵勇旣嫌單薄自未便再行分撥所稱選

派精卒委臬司管帶渡江協勦係恐賊由漢沔上窺
荆襄繞出水師後路但此時隨州已復沔陽一帶賊
匪亦經擊退孔廣順所帶官兵已由棗陽一路進勦
德安西凌阿所統官軍不日可出豫境當可遏賊上
竄若李孟羣再帶兵渡江恐該署撫兵力愈單金口
一帶不能堵截轉致該逆沿江上竄未爲得計仍著
該署撫酌量緩急相機辦理塔齊布在九江未能卽

時攻克萬不能分身來楚致賊肆行出江孔廣順進
攻北岸必須將德安之賊掃除方能進擣漢陽該署
撫惟當就現有兵力速籌勦辦如江北肅清西凌阿
等自能進兵與南岸夾擊也

二十九日 庚寅 王履謙奏言河 臣 長臻上年因感

受寒溼 臣 見其肢體稍減精神尙堪支持詎意
交夏後日甚一日於五月二十四日申刻在蘭

儀工次出缺所有河督關防臣暫時封固收存
其巡防及工程要件臣仍督飭沿河文武益加
慎重不敢稍涉大意奏入

上諭內閣曰河東河道總督長臻由部員外任知府洊
厯監司自簡任河督以來辦理隄岸工程諸臻妥協
前年因賊氛滋擾督辦防河諸務不辭勞瘁茲聞溘
逝軫惜殊深長臻著照河督軍營病故例賜卹任內

一切處分悉予開復應得卹典該衙門察例具奏

同日向榮奏言准浙江撫臣何桂清咨稱江西

景德鎮賊股復竄入徽州祁門一帶於四月二

十二日突陷休甯縣城臣檄調遊擊蕭知音帶

兵五百名馳往勦辦奏入報

聞

三十日

辛卯

載增奏言荊州係南北咽喉重地防

守最爲緊要本年正月逆匪上竄臣卽與官文
籌商分派兵勇會合團練布置城外各要隘聲
勢尙爲聯絡惟荊州滿營額設官兵祇四千餘
員名除派防隨征外存留荊州城內者僅一千
五百餘員名實形單薄新任左翼副都統富森
本月十一日履任臣與熟商於郡城內外親督
巡防不敢稍存諉卸至西陵阿所帶官兵較厚

擬俟其到楚時於荆襄適中之地擇要扼紮相機進剿兼爲水陸各路策應臣亦得就近會商一切新授荊州將軍綿洵不久亦當到任自可因時審勢會籌妥辦奏入

上諭曰西凌阿抵楚後專爲剿辦逆匪礙難趨於無賊之地駐紮徒糜餉糈綿洵亦係幫辦軍務尙無到任之期荊州防剿事務汝須循照官文辦法勿稍廢弛

仍可與該督往返函商也

--	--	--	--	--	--	--	--	--	--

三十三

三十三

欽定剿平粵匪方略卷一百三十一 乙卯年

中央民族
學院圖書

六月初四日 乙未 陳啟邁奏言湖北崇陽 通城

匪圍攻義甯州城當經抽調武甯饒州兵勇馳
往救援探報義甯賊匪邀集武昌等處黨與萬
餘在城外紮營十餘處並於各要路分布攔截
四月二十一日守備藍玫帶兵勇行抵州境之
夏源坑遇賊出敵奮力迎剿殺賊十餘人因跟

蹤追擊遇伏失利退回梁口駐紮二十六等日
知府林懋勳添撥兵勇協同進攻鳳凰嶺等處
賊營互有殺傷五月初二日都司張全孝巡檢
吳元理帶勇進攻北岸賊營斃賊四五百名燒
燬賊營三座因深入遇伏均力戰陣亡其圍攻
州城之賊自四月十九日起百計攻撲經知州
葉濟英委員陽秉鏞激勵兵勇竭力堵禦屢挫

賊鋒五月初三等日派兵出城協同鄉團夾擊
每次殺賊數百先後焚燬賊營數座詎該逆於
初九日在西門偷挖地道用地雷轟塌城牆逆
衆擁入葉濟英陽秉鏞署州同蔣啟華吏目王
秦州及在防文武員弁紳士數十人血戰陣亡
葉濟英家屬四十餘口同時殉難是時遊擊吳
錫光自饒郡帶兵往援聞信倍道前進至湘竹

禁營十三日派八成隊進攻州城以二成守護
老營逆衆萬餘分十數股來拒吳錫光所帶陸
勇不滿二千名分路迎敵殺賊千餘逆衆奔潰
乃該逆另股暗襲湘竹老營縱火焚燒吳錫光
率兵勇回救被賊前後包裹吳錫光陷陣衝突
又殺賊數十人力竭被害此股逆匪勢甚臨張
難保不乘勝窺伺省垣分擾毗連郡縣亟宜痛

加勦洗適新任贛州鎮總兵劉開泰自金陵來
江臣隨撥寶勇六百名志同軍五百名交該鎮
統帶取道奉新沿途收集潰兵相機勦辦惟兵
力尙屬單薄現在廣饒二郡餘匪已竄徽州羅
澤南一軍駐紮景德鎮防堵自應移緩就急業
經臣咨會曾國藩飛調羅澤南帶勇兼程來省
爲劉開泰後路策應以期速殄羣醜克復州城

並可保衛省垣所有陣亡殉難之知州葉濟英
等暨該知州家屬應請

旨飭部從優議卹並於州城建立專祠以慰忠魂其餘
陣亡員弁紳士兵勇另行查明請卹奏入

上命軍機大臣傳諭曾國藩陳啟邁曰義甯州城失陷
遊擊吳錫光陣亡賊勢益熾恐南昌省城人情震動
該撫飭調劉開泰帶勇前進兵力究嫌單薄吳錫光

所帶之勇著劉開泰收集統帶藉壯聲勢逆匪復陷
休甯其饒廣一帶原未可稍形鬆勁惟此時省城急
需兵力著卽照該撫所請速調羅澤南一軍兼程來
省以爲後援省城布置周妥羅澤南仍當星速出省
與劉開泰合兵進剿不可專以保衛爲名致成株守
曾國藩水軍近在吳城船隻業已齊備旣不能迅克
都昌扼賊往來之路卽當保衛省垣先固根本豈可

專恃羅澤南陸軍而置水軍於閒地著與陳啟邁妥
速布置俾羅澤南到省後卽可進攻義甯不致牽掣
該處與湖北通城湖南平江等處均屬接壤萬不可
令其日久負隅致三省聲勢隔絕勦辦愈難得手饒
州一帶仍著該撫飭令趙如勝等妥籌防勦毋得稍
有疏懈

上諭內閣曰義甯州城被賊攻陷各員弁血戰捐軀均

堪嘉憫候補知府義甯州知州葉濟英委員候選直隸州知州陽秉鏞知州銜升用知縣署義甯州州同蔣啟華六品翎頂升用府經歷縣丞義甯州吏目王秦州銅鼓營都司張全孝八疊司巡檢吳元理遊擊吳錫光均著交部從優議卹並著於該州城建立專祠以慰忠魂葉濟英家屬四十餘口同時殉難尤堪憫惻著一併附祀其同時陣亡紳董員弁兵勇均著

查明請卹

陳啟邁又奏言四月二十九日興國州賊匪千餘人竄至武甯縣境把總彭應魁等率領兵勇進剿斃賊百餘名五月初四日復有逆匪四五千人由橫路上坂直撲我營馬占魁等分投設伏三路夾攻殲斃逆首畢家森及匪黨千餘名生擒僞總制陳碧山等五名正法奪獲軍械多

件餘匪竄回興國州武邑不致被擾在防出力
員弁請彙入前次勦匪獲勝案內一併請獎仍
令加意嚴防毋稍鬆懈奏入

上諭內閣曰興國大股逆匪直犯武甯經在防員弁紳
士豫爲準備合力迎勦大挫賊鋒地方不致被擾勦
辦尙爲妥速所有出力員弁准陳啟邁彙入前次勦
匪獲勝案內一併請獎以昭激勸仍著飭令該員等

加意嚴防毋得以餘匪遠竄稍形疏懈

初六日

丁酉

湖廣總督官文奏言臣於五月二十

五日行抵襄陽接印任事准前督臣楊需咨稱

五月十六日賊由浙河上竄經兵勇迎勦殲斃

賊目數人並焚燬馬平港賊巢數處斃賊多名

餘匪下竄相機進剿等語至德安賊匪無多已

有下竄之意惟連接安陸府並潛江京山等處

稟報賊已分股竄撲天門阜市地方並京山縣屬之潘家集等處意在橫竄襄河仙鎮賊匪聚集甚衆各請添兵救援前來查德安賊匪被北路官兵迎勦屢勝其鋒已挫勦辦非難而天門京山偏近安陸道路處處可通兵力甚形單薄儻被竄入襄河勾連仙鎮以下股匪不特荆襄在在堪虞且恐上游各處仍可北竄防勦更覺

費手就現在情形而論襄河一帶較隨棗尤覺
喫重臣再四籌思若不分路進兵四面圍勦該
匪詭譎多端必致此擊彼竄滋蔓難圖當飭隨
帶川兵一千名先赴天門並催楊昌泗常恩兵
勇千名會合川兵由阜市進擊一面飛飭駐紮
安陸衛守備葉椿帶勇一千名前往京山防守
再留川兵二千名駐紮安陸以爲天門京山兩

路援應相機前進合攻應城首尾兜擊以免竄
越現在西凌阿督兵行抵汴梁指日南下臣已
飛咨該大臣來楚由北路進兵迅復德安使賊
無北竄之路並咨孔廣順督同劉富成等管帶
兵勇堵禦如有隙可乘卽合兵進取德安復知
會訥欽將棗陽大營所部兵勇選擇精銳自興
隆集進兵合剿以爲後應如克復德安卽留該

提臣分兵駐守北兵遂可出府河進攻漢口行
知楊需令其權在棗陽督辦後路並飭漢陽府
知府栗耀前往棗隨督飭團練如此嚴密布置
北路似可無虞一俟西凌阿有信到楚臣卽親
督兵勇從襄河兩岸水陸並進會督仙鎮兵勇
直擣漢川進攻漢陽一路居中策應南可與金
口消息相通北可與北軍聲勢聯絡上可保護

荆襄下可進擊武漢較勝偏守一隅仍隨時會
商西凌阿並署撫臣胡林翼激勵士卒協力進
勦至投誠義勇駕馭頗難經臣面爲開導尙知
感激擬查明情願回籍之人陸續遣散其真心
效順者卽與酌留示以恩信兇頑難化之徒分
別懲辦暫飭赴孔廣順大營安置俟西凌阿到

楚卽遵

旨歸其統帶妥爲約束奏入

上命軍機大臣傳諭西凌阿官文曰德安賊匪經官兵
截勦意在下竄而天門京山賊已分股竄撲該處偏
近安陸道路處處可通設竄入襄河勾結肆擾不特
荆襄可慮且恐由上游各處再圖北竄自應分路進
兵爲四面兜圍之計官文現派川兵先赴天門並催
楊昌泗等由阜市前進葉椿所帶之勇飭赴京山又

留川兵二千駐紮安陸以爲天門京山兩路援應相
機前進布置尙屬周密西凌阿此時諒已馳抵楚境
卽當迅速前進按照官文所咨情形乘德安賊匪無
多將郡城剋期收復使該逆不敢覬覦北犯庶可節
節進逼由楊店一路進攻漢口官文卽統帶兵勇由
襄河兩岸水陸並進直搗漢川仍當與西凌阿胡林
翼聲勢聯絡合力兜擊以期克復武漢兩城毋稍遷

延致失機會投誠義勇仍著西凌阿妥爲約束毋令
別滋事端

同日何桂清奏言江西浮梁景德鎮各路賊匪
自德興饒州克復後窮蹙無歸併竄安徽婺源
縣境石景芬帶勇迎擊疊勝斬賊目一名逆黨
二百餘名該逆隨竄過浙嶺於四月二十二日
占踞休甯縣城並有祁門嶺外各路股匪越嶺

入徽向祁門黟縣一帶竄擾 臣當卽飛調周天
受都隆阿鄧紹良等各帶兵勇相機勦辦徽州
府同知關從龍帶勇會勦並奏留在徽之知府
程葆綰合歙縣民團助戰五月初九日黟縣股
匪經該邑民團擊敗併竄休甯該逆增高城垣
城內外排釘木椿竹籤並有悍賊二千自安慶
來勢甚猖獗初十日我軍移營距休城五里之

集賢堂卷之三十一
漲山嶺十一十二等日該逆大股疊撲周天受
都隆阿兩營我兵迎擊先後斃賊四百餘名石
景芬程葆各率衆助戰賊鋒大挫十五日各路
兵勇齊到鄧紹良親自督戰將士踴躍爭先拔
樁前進因城上守堅礮密未能得手退伏深林
誘賊賊果分股衝出鄧紹良飛調守營兵勇迎
敵林內伏兵亦出合戰殺賊甚多石景芬帶勇

在東南二門鏖戰賊衆死拒彼此互有殺傷周
天受趕往接應手斃賊目一名賊始驚退入城
旋探該逆疊次受創共斃七八百人其僞檢點
黃姓陳姓及賊目多人亦均殲斃有西竄意鄧
紹良隨派川楚浙兵連夜進攻賊勢不支於五
更時潛出西門由黟縣一路奔竄當將縣城收
復一面拔營追勦沿途斬獲逆匪二百餘名其

退入黟縣之賊亦聞風逃避鄧紹良帶兵從石
埭一路跟蹤勦捕石景芬帶勇前往祁門以防
回竄現該逆竄出石埭勢必歸併青陽臣已飛
咨鄧紹良查探逆蹤力圖攻勦儻已從青陽竄
出大江卽屯兵於青陽石埭之間力保徽甯門
戶兼爲蕪湖大通策應此次在事出力官紳員
弁俟鄧紹良等咨報另行籲懇

恩施陣亡千總陳宗富先行請

旨飭部從優議卹以慰忠魂奏入

上諭內閣曰官兵勦賊獲勝克復休甯尚爲迅速仍著
鄧紹良等盡力攻勦務將徽甯之賊悉數殲除毋留
餘孽所有在事出力官紳弁兵著查明保奏陣亡千
總陳宗富著交部從優議卹

何桂清又奏言臣前奉

旨飭查賊至常開邊境旋竄徽饒該鎮是否退縮無能
該道等有無扶同捏飾一併覆奏查衢州鎮總
兵富勒興阿金衢嚴道劉成萬當衢州設防亦
知講求布置常開之役駐紮五里亭居中控馭
實因道路紛歧不能兼顧該鎮尙非退縮無能
該道亦非扶同捏飾惟常山之曹城開化之華
埠等處被賊蹂躪辦理未能周到應請

旨將富勒興阿劉成萬均交部議處再查台州協副將
豫祺自玉山折回常山調赴曹城防堵又調赴
威坪衢州等處所帶台勇沿途滋事該協不能
約束應請

旨將豫祺摘去頂戴以觀後效如再不知振作另行從
嚴叅辦至華埠之戰有楓嶺營外委葉選陣亡
莊前之戰有金華協左營把總孟夢虎陣亡均

堪矜憫應請

旨飭部優卹又查逆匪竄擾沙安嶺復圖大股分襲常
山其時縣城危在頃刻署衢州府知府馬椿齡
署常山縣知縣李盤以數十名兵勇力保孤城
署西安縣知縣吳來鴻當常開告警之際郡城
弁兵均已調赴行營該員獨力支持激勵紳民
齊心固守又沙安嶺一戰守備蔣廷選千總徐

勇奮勇當先斬獲頗衆可否仰懇

天恩將馬椿齡加知府銜李盤吳來鴻均以同知留於

浙江補用蔣廷選加都司銜徐勇加守備銜出

自

逾格鴻施奏入

上從之

初十日 辛丑 西凌阿奏言 臣擬於六月初四日督

三十一
三十一
三十一
隊由信陽起程入楚適接官文來咨德安賊匪
無多已有下竄之勢囑臣由北路進兵夾擊並
據孔廣順函稱該提督等督兵由棗陽馳抵隨
州確探馬平港之賊全數竄回德安卽派已革
參將劉富成帶兵進攻德安東北派經歷易朝
棟等進攻德安西門該逆堅守不出濠廣城堅
滾木插石周布我兵槍礮不能傷賊繞城挑戰

未能得手已撤隊在長林岡紮營各等情查該
提督所稱德安賊情布置周密尙無下竄之勢
德安偏近豫邊難保其不窺伺北竄以緩急情
形而論自應先清北面再攻武漢今天門京山
應城股匪官文已派兵勇扼要堵剿自能遏其
橫竄之路惟該督擬赴安陸策應距德安較遠
不能合兵共剿且該省糧臺必隨該督大營臣

由北路進攻不惟兵力單薄不敷圍剿而應用軍火口糧無處支領設有掣肘貽誤匪輕應請

飭下官文卽親督兵勇進發德安會同臣合力攻勦庶德安可期收復而天門等處股匪亦可不擊自退至應需藥鉛口糧等項並請

飭諭湖北糧臺寬爲豫備應用以期無誤要需

同日署荊州將軍副都統載增副都統富森奏

言德安府河賊衆自疊經懲創後退匿漢川未
敢上竄魁玉督同帶兵員弁進紮鄢家灣等處
五月二十六日賊隊二千數百人分股撲鄢家
灣大營經各營分起出隊自寅至未鏖戰六時
之久水陸大獲全勝斃賊甚衆惟密探該匪擬
分股一由南岸一由乾鎮兩路直趨襄樊隨又
盤獲賊中女探一人訊係逆首自府河遣出窺

探荆襄道路及官兵消息約會漢川之賊分路
前往襄陽伏思賊情詭譎往往以明攻爲牽掣
之計而分股暗趨別徑乘隙尾抄旁竄使我軍
應接不暇現在鄢家灣等處擊賊得力正須偪
赴仙桃鎮以下進勦萬一賊趨府河別徑而至
天門轉在仙桃鎮之上此軍卽腹背受敵且不
惟慮其橫出潛江更恐直竄安陸則荆襄愈形

喫緊而荆門州屬之沙陽正當其衝尤不可不
以重兵豫扼無如荊州兵力不敷分派其天門
一帶除已札飭該縣多調團勇擇要堵截外查
有署藩司常恩帶赴潛江鄉勇一千名卽飭其
就近相度緩急移師兼顧俾免疏虞至沙陽兵
勇過單已飛函商請官文等撥兵添紮以資得
力

同日胡林翼奏言五月初九日探聞賊匪潛出
大股迂道陰襲官兵後路臣營前已分布兩岸
無兵可分未刻拔營不及半日賊果大至力戰
三日敗賊四散迅卽揀派陸勇會同水師入湖
搜勦並派湖南來援之守備譔瓊林回防六溪
口及岳州等處江路要隘仍恐逆賊勾結崇通
土匪餘燼復燃一面飛飭岳州加意防範臣現

駐金口已退離袁家河三十八里之遠雖竄匪
有應追之勢而臣營無再退之理當俟援勦上
游兵勇回營仍迅速進攻武漢惟是武漢形勢
外江內湖進勦頗多阻隔如北路兵勇速至分
途進攻自易克復第溽暑之時澤國沮洳北來
兵勇水土能否服習尙難遙揣且北路兵勇自
當步步爲營以次漸逼斷不可任其輕進失利

臣謹就武漢之大勢切實思議查去年前督臣楊需將軍官文之兵勇均已進逼楊店蔡店軍山而漢陽之後路已斷岳州屢敗之兵勇又分爲三大枝以全力注於武昌賊畏提臣塔齊布之威不能堅守而塔齊布又繞出淇山乘其思遁而力勦之故兵始到而賊卽敗竄又查二年提臣同榮以重兵數萬分布武昌各門而全力

扼守洪山賊卽遁竄是進兵武昌固必以洪山
爲扼要矣武昌城周二十里城門凡九臣之兵
力攻其一而遺其八兩月以來逐日攻堅迄未
得手誠爲失算卽擬繞出洪山之下尙恐兵力
不敷糧路中斷使賊果出城抗拒尙可力戰以
倖成功若堅閉不出徒以礮石自守官兵將有
坐困之勢此武昌一路之實在情形也至漢陽

城外四面皆水騎兵步卒均阻沮澤賊又四面
皆設陷阱環以溝壘防守倍嚴 臣於正月二月
僅帶勇循江隄一路進剿賊得專力抵禦於牆
隙施放火礮中傷勇士甚多故不得手欲攻漢
陽必須於涓口蔡店先以北來重兵扼其險要
深溝高壘不必交戰而賊之上犯襄河者來去
之路已斷 臣再開濬江隄放水師入湖同陸兵

力扼其西並設法以水師橫出襄河外江內河
同時夾攻漢陽可期速復鄂省之咽喉始通不
難併力專注武昌蓋鄂省十府黃州居其下武
昌居其南其餘八府皆以漢陽爲門戶自來治
鄂者必以漢陽爲重亦形勢然也一俟追勦上
游水陸各軍不日回營卽當咨商督臣迅將南
勇義勇川兵之服習水土者先行前進更當審

擇形勢所宜併力一處先其所急以期仰副
聖主眷念南服之至意均奏入

上命軍機大臣傳諭西凌阿載增官文胡林翼曰官文
前奏咨商西凌阿先復德安扼賊北竄令訥欽進兵
以爲後應該督由襄陽親率各兵勇從襄河兩岸水
陸並進本爲居中策應之法據載增等奏逆賊窺探
荆襄道路約會漢川賊匪分路赴襄若由天門縣繞

越仙桃鎮恐匪蹤橫出潛江直竄安陸已飭常恩帶鄉勇就近兼顧其安陸一路卽著官文前調之楊昌泗葉椿各兵移往駐紮惟官文以隨棗一帶均經布置謂北路可以無虞又聞德安賊匪將欲下竄而西凌阿則稱該逆死守德安經劉富成等帶兵進攻該逆滾木播石布置甚密似無下竄之意該大臣兵力單薄不敷圍剿兼因藥鉛口糧等項無處支領應由

湖北接濟請飭官文會同合剿德安其天門京山等處股匪該督已分派兵勇堵剿若德安克復則餘匪不擊自退現在西凌阿已於六月初四日由信陽赴楚著官文一面飭令湖北糧臺將西凌阿軍營應需軍火等項隨時支應一面酌量情形親自督兵與西凌阿會合攻克德安先清北面以遏賊北竄之路然後與胡林翼會合水陸進攻武漢於南北形勢似屬

相宜著官文通籌大局相機辦理朕亦不爲遙制惟
不可以德安一城委之西凌阿致令兵單力薄未能
一鼓殲除其沔陽天門一帶業經載增等多調練勇
並飭署藩司常恩帶潛江鄉勇就近防堵沙陽一路
正當賊衝仍著官文撥兵援剿以免疏虞胡林翼駐
營金口屢次勦賊獲勝惟無大兵會合未能卽復武
漢據奏欲攻漢陽必以北兵於潰口蔡店扼其險要

並以水師橫出襄河之內方可併力武昌所見尙合
機宜該署撫擬商該督將南勇義勇及川兵之服習
水土者先行前進著官文俟北路進兵漸有頭緒卽
應商同該署撫籌畫進攻武漢迅奏膚公以慰盼望
胡林翼又奏言南北兩岸賊匪迂道上竄臣分
派精幹勇丁各路密探並知會署臬司李孟羣
副將王國才水陸進攻五月十五日賊匪大股

分六路來撲每路約一二千人臣豫派千總周
得魁等分路迎勦連斃執黃旗悍賊數名騎馬
賊目四名賊黨百餘名賊卽退卻我軍奮力爭
先伏兵兩路齊起抄襲賊俱奔潰殺斃淹斃賊
匪七百餘名生擒三百餘名其循江下竄者經
署臬司李孟羣知府彭玉麟伏兵截擊斃賊百
餘名生擒十二名偪入大江淹斃者二百餘名

我軍乘勝追剿三十里次日探聞賊匪敗回者
仍住紙坊地方我軍大隊直擣賊營乘南風大
起施放槍礮火器力戰移時賊乃大潰連踏賊
營二座斃賊甚多餘匪分股逃竄周得魁等帶
勇追剿直逼武昌小東門賊匪狂奔入城我軍
暫在城外駐紮並於紙坊金口犄角立營計兩
日之戰殲擒淹斃及薙髮解散者不下三千餘

名賊膽已寒軍氣倍壯惟是逆匪詭譎異常其上竄之賊尤恐勾結崇通餘匪必應卽時搜捕除飛咨岳州加意嚴防並派水陸弁勇入湖雕勦外臣仍駐金口老營會商李孟羣王國才彭玉麟等俟上游勦匪事竣卽行併力進攻以期克復武漢仰慰

聖懷此次尤爲出力員弁兵勇可否仰懇

天恩先行獎勵以勸後來奏八

上諭內閣曰武昌漢陽賊匪經胡林翼等疊次勦辦乘勝進攻殲擒淹斃及薙髮解散者不下三千餘名賊鋒已挫著胡林翼等乘此聲威督飭諸軍奮力攻勦以圖克復所有各營員弁兵勇屢次打仗出力自應先行獎勵以昭激勸外委何紹彩千總周得魁均著以千總留於湖北補用並賞加守備銜把總余玉興

著以千總超補並賞戴藍翎從九品銜丁銳義著以
從九品選用並賞戴藍翎哨官楊光日著以外委卽
補並賞戴藍翎州同銜伍典著以州同選用並賞戴
藍翎哨長周玉成向德明劉英傑周有元秦裕昌楊
琢珩武生吳璘六品軍功姜映姜紹清姜八斗劉忠
彭再榮均著以把總補用並賞給六品翎頂勇目何
致魁李清濂朱希廣何紹凌胡贊勳周邦裕周占魁

均著賞給六品翎頂哨長姚大典楊七保張勝奎黃
上玉吳志秀蕭登高均著以把總拔補

十二日癸卯會國藩塔齊布奏言四月十三日臣

會國藩水軍由吳城移紮南康前隊戰船進泊
青山地方南康老營下則攻湖口之賊冀欲力
破此關上則防都昌之賊擄船而襲我後路二
十一日派定湘營何啟長往勦都昌陸賊二十

二日抵馬家堰圍燒該逆接濟湖口糧船百餘
號至徐家埠復燒賊船五十餘號又至都昌城
下燒賊船百餘號至土塘燒賊船四十餘號生
擒長髮賊五名焚斃溺斃數十名五月初八日
聞逆匪復在都昌擄船掠糧又派孫昌國前往
搜剿燬賊船二十餘號十三日我軍派船九十
餘號至青山一帶放哨適賊船自姑塘上犯由

西岸斜渡東岸勢甚兇悍我中營賀虎臣定湘
營何啟長帶船渡至東岸迎敵而留蕭捷三等
三營於西岸抄賊後路該逆力撲東岸賀虎臣
等揮旗力戰賊勢已卻又因西岸各營來抄賊
復回拒攢礮對擊鏖戰兩時之久斃賊約三百
人東西兩岸之賊紛紛敗竄臣曾國藩上游接
應師船亦同時駛至該逆迷亂失措我軍列礮

環攻追奔二十餘里至驪山以下燒燬賊船三
隻始行收隊查該逆前恃民船數千震人耳目
其能戰者不過戰船數十小划數百上年冬間
始聞其在皖修船習戰不謂遽爾操練成熟梟
悍異常賴內湖水師奮勇決戰倖獲全勝所有
出力員弁籲懇

天恩容臣等擇尤保獎再湖口之賊時欲撲我水營潯

城之賊時欲撲我陸營近日賊船由上游駛下者甚多灣泊潯江聲言大舉臣塔齊布陸軍晝夜嚴防擬趁該逆出巢乘勢痛剿至羅澤南一軍自景德剿賊後經臣等飭令仍回饒州都昌與水師會攻湖口並可與九江陸營聯爲一氣三路合師軍威無難復振乃因義甯失守經江西撫臣調羅澤南速回省城湖口東岸旣無陸

兵則水師之孤懸可慮三路之會合無期是以
不免掣肘奏入

上命軍機大臣傳諭曾國藩塔齊布陳啟邁曰曾國藩
等水陸兩軍必須聲勢聯絡方可得力自師船阻入
內湖塔齊布一軍孤懸無助現聞賊勢猖獗而該處
又無兵可撥甚爲可慮曾國藩水師固應速出湖口
而此時姑塘青山一帶賊船蟻聚若非剷除淨盡則

內患未除何以禦外著曾國藩督飭將弁先將湖內
賊船盡力掃除方能出江與塔齊布會合至羅澤南
一軍爲賊牽掣未能卽歸九江著俟義甯勦辦得手
後卽行調回與曾國藩塔齊布等併力會勦現在塔
齊布兵力稍單總須攻守兼施不可稍涉大意此外
江西省有無可調兵勇並著陳啟邁悉心籌畫酌撥
前往塔齊布軍營助勦或先克九江或先將鄱湖賊

船悉數掃除則水陸兩軍可併而爲一庶逆氛漸就
肅清該侍郎等務當通籌大局謀勇兼施以副朕望
上諭內閣曰內湖水師奮勇擊賊疊獲大勝所有出力
員弁著曾國藩等擇尤保奏候朕施恩

十三日甲辰署吏部左侍郎沈兆霖奏言查安徽

一省在江北者爲安慶廬州鳳陽潁州四府六
安滁和泗四州在江南者爲池州太平徽州甯

國四府廣德一州而安慶以省會居南北之中
故能控制裕如今江北之安廬和江南之池太
皆爲賊踞皖撫駐營尙在廬城東北徽甯廣三
屬距撫臣駐紮之所中隔池太安廬和五屬之
地文書往返必經江蘇浙江兩省動輒月餘故
徽甯廣雖隸安徽幾爲撫臣號令所不及事急
則向浙江請兵請餉事平則泄沓如前不加整

頓官吏之賢否皖撫不及知浙撫雖知之而無
黜陟進退之柄亦難越俎而謀兼之浙省派兵
勇駐彼防堵主與客各存意見不肯協力守禦
莫若暫設一皖南巡撫使之專轄四府一州庶
足以飭吏治而固民心蓋甯池徽太廣五屬雖
設兵備道一員而一切皆須稟命督撫不能專
決遷延守候必致坐失機宜設巡撫則權有專

屬令可必行道府既有所稟承士民又得所歸
向內可度地險以設防外可奮兵威以協勦皖
撫得以專心於江北浙撫不至牽掣於皖南似
亦救時之一策可否

發交廷 臣集議妥爲區畫但期事有實效不妨暫議更
張且據今日徽甯廣言之卽不另設巡撫亦宜
急籌善法俾民心不至散渙是否有當伏乞

聖鑒訓示奏入得

旨著軍機大臣大學士會同該部妥議具奏

十六日丁未官文奏言准署荊州將軍載增咨稱

魁玉現奉

旨補授江甯副都統臣查魁玉帶兵在襄河鄢家灣一

帶勦匪疊勝甚屬得力刻下江甯尙未克復楚
北防勦正值喫緊可否仍留該副都統在營辦

理軍務俟武漢肅清再行前赴新任出自

聖裁奏入得

旨允行

十七日戊申托明阿陳金綬雷以誠奏言瓜州賊

匪踞險固守專望外援五月十四日有金陵大

幫賊船載米接濟瓜州滋擾北岸經浦口江浦

文武率兵勇截剿先後燒燬賊船三隻擊沈二

隻又沈燬賊划多隻奪獲十一隻殲斃溺斃賊
匪無數餘匪登舟竄逸又探聞上游沿江屯有
賊箚十餘座均長數十丈兩旁密排長木如城
外有礮船民船數十號又下關七里洲亦有賊
造箚船數座麕聚大小多船是其蓄謀下駛尤
爲顯然臣等一面密飭各路嚴防一面督率水
陸緊攻瓜州二十四日派知州雷鳳鸞孫懷德

各帶練勇由東路虹橋誘賊出巢而以官兵隨後接應殲斃虹橋對岸守卡賊匪十餘名擠溺水中多名進勦至丁橋遇賊四五百名來撲復截殺數十名追過浮橋忽從瓜州玉皇閣出賊千餘臣雷以誠卽派水勇過河接應殲賊甚多餘匪四散我師甫撤賊復偪進戰至虹橋東岸又有賊二三千名從西岸衝來徑行渡河經東

北兩岸兵勇齊出斃賊不計其數賊始潰竄六月初一日臣托明阿由陸路進攻總兵陳國泰等帶領紅單船夾攻兩岸賊壘賊衆開礮抗拒師船乘風回環攻擊礮力所到土石齊飛不知殲賊多少自卯至巳風力已微水師次第撤隊陸兵進至五里莊一帶因久雨江漲賊營之外一望沮洳馬步均難立腳賊匿不出雖放礮遙

擊賊壘不能得力隨即撤隊初四日鎮江小牖
口有大小賊船數十隻接應瓜州經焦山水師
總兵周士法率守備鞠耀乾等擊退查瓜州逆
匪連營踞險溝塹重重計誘不出上游賊聚簿
船時思下竄江浦浦口六合儀徵一帶在在需
防而鎮江與瓜州對岸尤易偷渡自非掃除逆
船肅清江面則北岸二百數十里無論何處有

警均須分我兵力屢次進攻不能著手多由於
此現據上游探報吳全美等進攻上河口芝麻
河等處賊船疊獲勝仗臣等復與向榮知會皖
省令道員張光第等嚴守烏江石磧橋一帶與
江口互相聯絡以固北岸藩籬凡探得南北賊
情均與向榮吉爾杭阿熟商妥爲防範總期南
北兼顧速滅賊氛奏入

上命軍機大臣傳諭托明阿陳金綬雷以誠曰金陵賊船裝載米石欲赴下游接濟雖經官軍水陸截擊並未大受懲創而上游逆匪箛船尙復連檣屬聚官兵防不勝防又不能迅速攻克處處牽掣何時可了據該大臣等奏瓜州溝塹重重計誘不出直欲待江面肅清進攻始能得手試思江浦等處賊船所以不能肆擾者皆因未容登岸無險可踞故截勦易於爲力

若瓜州賊巢能卽攻破則雖賊箠下駛亦易防剿該
大臣等不知賊船之敢擾北岸由於瓜州之不克而
轉謂瓜州之難攻由於江面之未清豈得謂操勝算
著卽督飭水陸將弁設法速攻不得藉口天雨沮洳
逆匪堅拒再事耽延亦不准待逆賊出撲始行截剿
總宜謀勇兼施迅圖克復毋得視爲誥誡之虛文也

中
國
書
院
藏
書
印

中
國
書
院
藏
書
印

欽定勦平粵匪方略卷一百三十二 乙卯年

六月十九日

庚戌

何桂清奏言賊匪併股竄擾

境官軍克復休甯後由黟縣出嶺追勦探知逆
匪前隊已至石埭踞守縣城欲犯甯國後隊由
祁門一帶竄去提督鄧紹良親督川楚官兵馳
往石埭距城五里紮營該逆見我軍追至卽分
股撲出東門直趨太平之路我軍各路義勇及

甯國團勇同時趕至會勦千總楊國正等迎頭
開放槍礮斃賊極多鄧紹良揮兵將賊隊衝爲
兩截併力勦殺賊之後隊逃奔回城前隊被我
軍殲斃無遺該提督飭各路兵勇圍城周天受
蕭知音馬永清攻西南門江長元楊國正等攻
東北門兵勇或奮力登城或奪門直入賊衆慌
亂我軍分投截殺斃賊二千餘人生擒一百七

十餘人間有奪路逃出者復經追殺至城外之琉璃嶺斬首七十一級生擒二十一名當將縣城克復吳應霖等進城將餘匪搜捕淨盡其逃往祁門之賊亦經我兵追勦竄出各嶺徽州一律肅清仍飭派防文武員弁嚴密巡防不得稍有懈弛查提督鄧紹良力矢公忠保衛大局在事文武官紳無不爭先效命擬會商鄧紹良分

別奏請

恩施奏八

上諭內閣曰逆匪自休甯敗走復敢由黟縣竄踞石埭
縣城窺伺甯國提督鄧紹良督兵出嶺追勦會合甯
國官紳克復城池聚殲悍賊二千餘人不留餘孽勦
辦尙爲妥速鄧紹良著交部從優議敘其餘在事出
力文武官紳人等著何桂清會同該提督查明分別

保奏候朕施恩

同日

上諭內閣曰前因粵匪滋事疊次諭令各直省督撫大吏督飭地方官會同紳士舉行團練比年以來各該省紳民人等均能深明大義志切同仇現在北路肅清直隸山東山西等省距賊較遠地方自應量予裁撤以息民力河南省除與皖楚毗連之州縣仍宜舉

行團練藉資捍衛其餘各州縣所辦聯莊團練著該撫出示曉諭酌量裁撤俾小民各安農業無妨生計並著直隸山東山西各督撫各就地方情形斟酌妥辦其辦理聯莊團練尤爲出力者著各該省督撫查明酌量獎勵以昭激勸

二十日 辛亥 辛 向榮奏言自師船掃蕩三山扼斷江

面所有上游之賊紛紛嘯聚梁山蕪湖不時關

入清水灣沘節經防堵知縣曾承禧督勇擊退
五月二十三日探報蕪湖賊匪糾黨萬餘欲犯
甯國黃池東壩情形均甚喫重臣抽撥得力兵
勇揀派總兵明安秦統帶馳往督同黃池各軍
嚴加堵禦並飛檄鄧紹良由石埭回援甯國一
面飭催吳全美等督帶師船會商總兵德安陸
軍速攻太平梁山以綴蕪湖之後使賊不敢內

犯二十七日蕪湖大股賊匪水陸竄犯灣沚經
鄧紹良曾承禧督帶各勇分投迎戰都司虎坤
元帶兵接應併力奮擊焚沈賊船十餘隻斬擒
溺斃賊匪二三百名賊卽敗退二十八日吳全
美李德麟王鵬年師船自三山乘風攻上烏江
二十九日進至采石三十日攻近和州先後奪
獲賊船十餘隻斃賊數十人攻至金柱關外大

江收隊扼泊六月初三日吳全美等督領全幫
戰船乘風上駛德安親領兵勇分攻太平各門
水陸夾擊該逆一見我軍卽棄城奔赴金柱關
併力拒禦我軍追殺數十人當將府城克復德
安移營城北黃山扼賊越竄之路吳全美等揮
令各船乘勢直上先後擊覆賊船二十餘隻已
刻攻進東梁山江面該逆由夾江搶出礮船百

餘隻開礮迎拒我船分兩翼衝鋒大礮環轟立
沈賊船三十餘隻焚燬十餘隻斃賊無數該逆
敗奔夾江吳全美與李德麟會督礮船向賊壘
轟擊賊皆伏匿而西梁山逆船遙擁來應並聯
絡東梁山以上逆船攔江阻截又於東西洲岸
土臺分布賊黨排列擡槍夾岸施放時值東風
愈勁我船分幫截勦擊碎賊船五六十隻沿岸

掃蕩而上復擊卸土臺多處轟斃溺斃賊匪不
下千餘逆船皆挂帆逃竄我師乘勝進追復沈
數船水勇駕駛划船將沿江賊匪小船焚燬淨
盡初四日風微溜急師船在泊弋磯有悍賊千
餘來偪江沿施放火箭被我軍擊退登岸追殺
斃賊多名初五日明安泰由黃池督領兵勇馳
近蕪湖距城數里將賊卡兩重一鼓破入殺賊

集賢堂卷一百三十二
六

數十乘勝攻東南兩門與賊接仗我兵勇氣百
倍擊斬數十人初六日舟師仍阻風弋磯二更
時該逆突於南岸放出火箠堆積火具由上流
挂帆而下後隨多船意圖焚襲我師吳全美等
督令師船一齊駛開大礮轟擊沈毀賊船四五
十隻火箠亦被擊碎餘逆逃歸小河我船仍整
隊扼泊分撥划船巡堵以防該逆詭謀查蕪湖

爲賊匪往來要道若能攻克卽可斷絕賊源於
勦辦全局皆有把握然非水陸悉力大舉不足
制賊死命現催明安泰進兵清水河直逼蕪湖
屯紮飛檄鄧紹良移兵策應一面札飭德安統
兵由太平繞赴蕪湖會同明安泰吳全美等水
陸兩路合擣賊巢以期克復蕪湖掃蕩賊船肅
清江面奏入

上命軍機大臣傳諭向榮吉爾杭阿曰此次師船由烏
江直上突過東西梁山其江甯鎮一軍亦已收復太
平黃池一軍又已進抵蕪湖沿江一帶似有起色但
東西梁山賊營尙未全毀師船上駛僅係乘風衝突
德安旣紮營太平城外卽應設法將東梁山賊壘全
數掃除一面會合和州烏江兵勇併力掃蕩西梁山
賊壘則太平之守可固不至旋得旋失然後繞赴蕪

湖與吳全美等水軍明安泰陸軍力籌攻克自可斷
逆船往來要路蕪湖當江皖之衝一經克復賊必悉
力來爭萬不可稍有疏失重煩布置師船自入江以
來大小數十戰始能上抵蕪湖正宜得尺則尺有進
無退不得因風色稍差致有退駛鄧紹良已由石埭
馳回甯國正在蕪湖之後著卽督飭兵勇策應陸軍
以爲水師聲援本日復諭知和春福濟酌撥兵勇或

由江北夾擊或徑渡江協剿如能合力齊攻自可剋期制勝就所奏情形而論沿江而上賊之礮臺愈多船簞愈密進攻固屬較難而攻克以後陸軍之屯紮師船之進止尤須步步留意始能乘勝長驅該大臣等務宜統籌全局與江北軍營聲勢聯絡爲肅清江面之計北路得勝官軍前曾撥出馬隊二千餘名由副都統麟瑞管帶以一千二百五十名交和春等分

撥布置以一千名交向榮調遣此項官兵到營後應
赴何路攻勦著向榮與和春等妥商分撥鎮江近日
軍情似已漸有把握能否卽行克復連日是否進攻
情形若何並著吉爾杭阿隨時速奏

上又命軍機大臣傳諭和春福濟曰向榮奏師船由烏
江攻勦而上突過太平梁山連破賊船直至蕪湖江
面德安統帶陸軍攻復太平明安泰亦由黃池會勦

已催飭明安泰進兵清水河直逼蕪湖屯紮並飛檄
鄧紹良德安移兵會合與吳全美等水陸兩路合擣
賊巢以期克復蕪湖等語蕪湖爲該逆往來要道若
能攻克扼守斷絕賊蹤勦辦庶有把握惟該處爲逆
賊必爭之地援應甚多非水陸併力大舉恐難剋期
攻復現在軍威頗振此機誠不可失恐陸路諸軍仍
形單薄必須於江北速撥精兵接應會合夾攻可期

決勝著和春福濟於皖省現有之兵就近迅速籌撥
選派得力大員管帶星馳前往該處或在江北策應
或令渡江協勦斷不可有誤事機前據英桂奏山東
撥往馬隊於豫省不甚相宜已諭令撥出一千名交
向榮軍營其餘一千二百五十名交和春福濟軍營
此項馬隊均歸麟瑞統帶前往諒已早抵廬州應如
何分撥布置之處卽著和春等妥籌辦理

二十五日丙辰官文奏言臣欽奉

諭旨督兵與西凌阿會攻德安查德安賊匪自孔廣順
由隨州擊退屢挫其鋒未能撲滅六月初八日
復出擾煙墩集地方經兵勇擊敗仍閉門堅守
雖於城上安放滾木插石城外開挖濠溝密釘
竹籤爲負固之計並夜出晝入詭示添兵然屢
接楊需訥欽來函及各處探報均稱城內賊衆

無多半係脅從計孔廣順訥欽劉富成等所帶
兵勇合西凌阿所帶之兵共約一萬數千人兵
力不爲單薄尙足以資防勦此北路情形也南
路胡林翼大營兵勇雖時有裁汰亦不下數千
又有李孟羣水勇三千餘名王國才駐紮沌口
兵勇二千餘名並派防麥山等處一千餘名亦
共有萬餘人奈賊匪前又分竄紙坊崇通逆匪

未靖金口大營不免腹背受敵水師一軍若無
陸軍相輔亦難孤立王國才之軍隔岸孤懸祇
能堵新隄上竄之路竟有朝不謀夕之勢是以
胡林翼等屢次函催臣帶兵進攻漢川速抵蔡
店李孟羣船出涇口先收漢陽該逆脣亡齒寒
武昌亦易圖矣若再久持恐餉乏兵潰更難收
拾此南路情形也至襄河中路僅仙桃鎮李保

邦等之勇二千餘名尙屬得力截殺漢川竄匪
屢獲勝仗惟兵力單薄能堵截而不能進攻况
漢川水陸紛歧湖港太多臣前在荊州已籌思
及此因無兵可調故令魁玉駐紮沔陽錫齡阿
駐紮潛江以防襄河南岸臣抵襄後已飭催常
恩帶勇八百餘名楊昌泗帶勇五百餘名並都
司張萬祿帶川兵一千名同赴天門又派參將

文明募襄勇一千名前赴沙陽諸鑣羅忠獻葉
培等共帶襄勇二千名前赴京山各路要隘相
機堵剿此中路情形也查德安離應城九十里
應城至漢川亦九十里該逆在距應城四十里
之長江華水路運送輜糧上下遊行與江漢之
賊聲勢相聯德安兵勇在賊後路攻其一面賊
得恣意旁竄所以恃而不恐誠不若南北夾攻

方爲上策西凌阿現抵隨州臣一面函商進兵
機宜卽於六月十八日督帶官兵及藏船水勇
由襄陽起程順流下擊其前派赴天門京山各
路兵勇距應城較近擬由長江埠一帶進攻先
將賊路隔斷使上下逆匪兩不相通仍飭川兵
協助李保邦等之勇速擊漢川以截府河之路
則德安逆匪勢成孤立自不難悉數殲除俟與

西凌阿會攻得手卽合兵同出蔡店並令李孟
羣帶水勇礮船由潰口亦繞至蔡店王國才由
南路進攻漢陽 臣等從中路督飭兵勇分攻漢
川漢陽胡林翼攻武昌使逆賊首尾不能相顧
定能一鼓成功至西凌阿大營兵餉新任藩司
文俊已將到襄擬卽委其總辦後路糧臺並留
楊需在襄幫辦再於隨棗設立轉運糧臺源源

接濟北路兵食不至短絀惟火藥鉛彈存留無多一時趕辦不及應請

飭下四川督臣撥解火藥鉛彈各十萬斤運赴荊州山西撫臣撥解火藥鉛彈各十萬斤運赴襄陽以便分撥奏入

上諭曰汝旣與西凌阿會攻德安務期迅速克復勿令旁竄爲要布置以後進剿機宜尙屬妥慎

上命軍機大臣傳諭黃宗漢王慶雲曰官文由襄陽督
師起程會合西凌阿布置進剿惟據稱火藥鉛彈存
留不多隨營糧臺趕辦不及請飭四川撥解火藥鉛
彈各十萬斤運赴荊州山西撥解火藥鉛彈各十萬
斤運赴襄陽等語著黃宗漢王慶雲卽照數迅速籌
撥派委委員解交荊州襄陽兩處以資攻剿

官文又奏言臣前抵襄陽接印後卽令已革督

臣楊需暫駐棗陽督辦後路並彈壓投誠義勇
過境據報全數馳抵隨州現楊需來襄謁見自
稱辜負

天恩僅予革職留營實深感愧求派苦差俾稍盡犬馬
之忱臣見其年逾六十精神衰憊兩耳重聽未
便令其隨營卽派在襄陽幫辦後路糧臺並督
修礮船軍器奏入報

聞

同日王履謙奏言現在下北廳屬銅瓦廂黃水漫溢黃河下游一帶漸成涸轍設南路賊匪關入無險可守亟須豫爲籌防應請

飭下直隸山東河南各督撫分撥弁兵嚴飭所屬扼要堵禦臣仍體察情形督飭沿河文武益加防範至山西朔州官兵及曹縣練勇原爲河口巡防

而設今河流變遷或應移紮何處或應添調分
布容臣會同河臣酌量辦理奏入

上命軍機大臣傳諭王履謙曰黃河漫口下游一帶無
險可恃已諭知直隸山東河南各督撫分撥弁兵各
飭所屬扼要嚴防其上游一帶仍應嚴加防範著王
履謙於河口現有之兵分布屯紮嚴密扼守並飭沿
河文武員弁實力盤查勿令南路奸匪乘隙偷渡

上又命軍機大臣傳諭桂良英桂崇恩曰楚北逆氛未靖河防極關緊要現以銅瓦廂漫口下游漸成涸轍前派防河之山西朔州官兵及曹縣練勇不敷分撥自應添派官兵藉資堵禦著桂良英桂崇恩將濱河各屬現經斷流處所迅速查明各就情形輕重酌撥官兵前往防守與王履謙聯絡聲勢嚴密稽查毋許疏忽貽誤

二十六日丁巳托明阿陳金綬雷以誠奏言逆賊

久踞瓜州無城可守乃圍攻經年靡計不施尙
未克復查瓜州分上中下三處舊時臨江一面
城壘半已坍塌自該逆竄踞後將上中下三洲
分築外石內沙之壘礮彈遇沙卽止不能穿過
較之輒城尤爲難攻又於要路連築數營峻壘
深濠迴環包絡且中隔運河與鎮江對峙互相

應援我軍分圍東西兩路地處沮洳袤延四五
十里路徑紛歧溝坎錯出大隊無從展布或偏
近進攻該逆憑高擊下槍礮如雨隔水則地雷
難掘登陴則無處可梯縱經百計誘引賊終堅
匿不出以故屢次攻戰總未能痛加勦洗現在
吉爾杭阿余萬清合攻鎮城賊頗窮蹙儻併竄
瓜州愈形喫重急應加意嚴防除水路嚴飭師

船實力堵勦外陸路兵力本單沿江要隘過多
不敷分撥 臣等共同商酌不得不於要隘建築
長圍添勇扼守以杜竄擾現值江水盛漲賊營
之外一片汪洋勢難進攻正可乘此暇隙擇要
興築沙頭爲東路門戶而新橋及太平菴三圩
橋等處尤爲沙頭扼要門戶 臣等督率兵勇連
日出隊分堵要隘並多雇民夫自新橋起歷孫

家塚太平菴三圩橋十三圩至都天廟直抵螞
蟻塢江岸一律築就長圍綿亙十餘里與水營
相望聯絡一氣有險可憑一面添募練勇一千
六百五十名逐加挑選悉皆驍勇內有五百名
兼善泅水以備過河攻擊已派知縣雷鳳翥孫
懷德管帶在新橋一帶分紮九營並將藩司文
煜派防沙頭之勇選調六百名協同駐紮該處

偏近瓜城較沙頭又前進七八里沙頭已包在
腹裏以後路坐防之勇調前敵緊要之區門戶
既固堂奧自安在東路更可無虞該勇連日進
攻多有斬獲甚爲得力至運河東岸觀甸橋八
里鋪一帶尙爲積潦所阻未易施工西岸地勢
尤窪現值大雨時行積水無從宣洩須俟漸次
涸出方可搶築惟西路地廣兵單口隘紛歧尤

須防賊西竄 臣等親赴土橋一帶察看該處地勢稍高擬從土橋龍王汭北至樸樹灣烏塔溝一帶先築土圍一道與東路長圍相配以成遙對之勢務期層層因偪相機痛剿迅奏膚公奏

八

上命軍機大臣傳諭托明阿陳金綬雷以誠曰瓜州賊壘旣無城郭之固卽應力籌攻剿乃分圍則藉口於

地勢沮洳進攻則又苦於槍礮難近經年累月徒以
無計不施及堅匿不出等詞搪塞八奏遷延至今又
欲廣築長圍爲坐困之計行軍要著總在因地制宜
瓜州濱臨大江非若高唐連鎮地勢平坦可以專恃
築圍若不力圖進取徒恃坐防則長江一面處處可
通終難斷其接濟恐糜餉徒勞於事無益著托明阿
等一面設防一面激勵各營齊心勦力鼓勇進攻當

此夏秋之交江鄉天氣風雨均所不免豈得以江漲
汪洋遂至束手無策該營兵勇較前已有加增若復
頓兵不戰遷延貽誤該大臣等豈能當此重咎耶

二十八日己未軍機大臣大學士吏部兵部會奏

言臣等遵

旨會議侍郎沈兆霖奏請暫設皖南巡撫一摺查安徽
一省介居大江南北自粵賊占踞江面巡撫督

兵廬州與江以南之徽甯池太廣等屬文報多
阻有鞭長莫及之勢賴浙江巡撫派兵協守撥
餉協濟有急則飛咨向榮同選弁兵前往救援
兩年來所賴於浙省者實多今該侍郎以浙江
兼顧難周擬請暫設皖南巡撫誠爲救時之策
惟立法貴乎因時而於事必求有濟以保守地
方而論則在官員之能否而不在階秩之崇卑

以攻勦賊匪而論則不在文職之增多而在武
弁之得力若添設巡撫則建置經營有需時日
支應經費亦恐難供且疆域旣分轉不免互相
推諉自宜另籌善法 臣等公同商酌皖南原有
安徽甯池太廣兵備道一員擬請暫改爲皖南
道專轄徽州甯國池州太平廣德五屬倣臺灣
道例加按察使銜俾資督率凡此五屬軍務緊

要事件均請暫照臺灣道例准其自行具奏所
有調兵籌餉防堵要隘悉准該道專制官弁有
貽誤軍務及不遵調度者卽許叅劾其安慶一
府本亦該道所屬惟隔在江北距皖撫較近若
統歸道員專奏不特兼顧爲難且於事體未協
或應暫隸廬鳳潁道或遇事徑詳兩司應由安
徽巡撫酌覈具奏至皖南營制原設徽州甯國

池州蕪采廣德五營向歸安徽巡撫管轄並未
設有專闖大員擬請添設皖南鎮總兵一員統
轄該五營以資鎮守所有營伍事宜及地方軍
務亦請暫照臺灣鎮總兵之例准其會同該道
專摺具奏似此通融辦理則事機得以專決不
致遷延而文武均有稟承可期整飭如蒙

俞允將來軍務告竣其皖南道一員仍應改復舊制皖

南鎮總兵一員卽請作爲額缺再徵甯廣德與
浙省脣齒相依本年肅清徽州克復石埭多賴
浙兵浙餉今旣暫假皖南鎮道事權地方自有
專屬恐浙省視爲鄰境轉以越俎避嫌而該鎮
道等草創規模或兵餉不能應手或員弁不敷
差委勢不能向廬州遠請徵調應請

飭下浙江巡撫凡有協防籌餉事宜仍照現辦情形會

同妥辦不得稍存推諉該鎮道等有應行商辦
事件亦令就近詳商俾免稽滯其防勦機宜團
練要務除責成該鎮道專辦外仍准浙江巡撫
隨時稽查覈實舉劾以佐兩江總督安徽巡撫
所不及如此互相援應庶事權各有專責而畛
域仍不至遽分於皖南全局浙省邊防均有裨
益奏入

上諭內閣曰安徽徽甯池太廣五屬介在江南當此軍務繁多恐該撫鞭長莫及自應專責文武大員俾資督率著卽照軍機大臣等所議將安徽甯池太廣道暫改爲徽甯池太廣道加按察使銜並添設皖南鎮總兵一員暫照臺灣鎮道之例准其會銜專摺奏事所有該四府一州地方軍務緊要機宜均著責成專辦俟軍務告竣道員仍歸舊制總兵卽作爲額缺以

重地方而符定制至該處距兩江總督安徽巡撫駐紮處所較遠所有現在協防籌餉事宜仍著浙江巡撫不分畛域暫行督辦其餘應辦事宜著該督撫分別妥議迅速具奏

二十九日

庚申

和春福濟奏言廬城賊匪被官兵

合圍數月意在死守待援而外援之賊雖經屢挫愈來愈多六月十一十四等日我兵馳赴林

家大蔭攻勦逆匪以一二千人來迎我兵奮擊斃賊百餘賊卽敗退十六日該逆突來四五千人在大堂店一帶窺探意圖紮營臣等督兵前往力戰斃賊無數十八日南路新到賊匪萬餘有分股攻營入城應援之信我兵分途迎擊奮勇爭先連用大礮轟擊斃賊數十名旋復傾巢而出由兩面抄來臣和春同鄭魁士等率兵左

右衝突奮力擊刺賊皆應聲而倒臣和春槍斃黃衣賊目數名復圍殺悍賊五名鄭魁士等揮兵衝殺逆屍徧野其時得勝門南門大小東門各出賊數百名欲爲外賊接應經托雲布等立時擊退又有西路賊匪數千來撲經程智泉等率勇力擊常清等亦領兵分路截殺斃賊無算逆衆大潰是日兩路共斃賊千餘名生擒十五

名二十日仍有賊衆萬餘由西路攻撲營盤我
軍以逸待勞屹立不動槍礮連環該逆力不能
支當卽敗走斃賊三四百名生擒七名連日督
兵攻勦賊匪匿不出巢現在大股未退 臣等惟
有激勵將士上緊攻勦絕其外援以期迅復堅
城

和春福濟又奏言據已革副都統忠泰函稱六

月十二日探得焦湖來賊萬餘有攻撲巢縣營
盤之信當令各營嚴加防守十三日果出賊數
千人卽督兵迎勦行至萬山口遇賊蠶擁而來
伊林布等分途攻擊斃賊多名賊勢漸卻我軍
奮勇追殺不料平頂山岱峯口等處突出賊匪
萬餘圍撲官兵營盤火器環攻截我歸路兵勇
驚散營盤被毀恐該逆擾竄店埠是以退守西

山驛已收集兵勇千餘名請籌撥軍械添派官兵再圖進剿以贖前愆等情查西山驛距店埠僅三十里店埠爲廬營後路又係北面門戶關繫緊要當卽派總兵吉順帶兵五百名前往又派守備恩清等帶兵五百名卽日起程迅守要隘復派副將嵩瑞等帶兵勇千餘名會同吉順忠泰紮營俟布置妥協仍令嵩瑞等將兵勇帶

回廬州隨勦並飭糧臺迅撥槍礮火藥鍋帳籌
給口糧昨據嵩瑞等具稟已於十八日在距店
埠七十里之柘皋扼要駐紮現在賊退至下皋
情形較緩廬營賊勢日張擬卽帶兵回營進勦
臣等伏查焦湖本已來賊數千合之在城賊匪
不下萬餘我軍兵勇無多實有寡難敵衆之勢
惟忠泰職司督勦未能先事豫防以致兵勇驚

潰營盤被燬咎無可辭相應請

旨交部議處仍令會同吉順帶兵立功以贖前愆奏入
上命軍機大臣傳諭和春福濟曰逆匪外援多至萬餘
而城中出賊僅止數百是廬城賊匪無多已有明徵
自二月初閒經朕將賊匪斷無愈殺愈多之理嚴切
批示該提督等以後奏報總以外援爲詞試思廬城
南面賊營旣經焚燬官軍已四面合圍賊援雖多皆

從南路而來該提督等紮營三里岡緊逼廬城東北
何以不圖三面並舉力拔堅城輒擁重兵坐待賊援
之至耶此次大堂店之戰和春旣親身前往接仗福
濟卽應設法攻城乃僅將出城零賊擊退聊以塞責
無怪賊情之猖獗也巢縣營盤失利已派吉順等前
往接應乃嵩瑞駐紮柘皋又因賊退撤回設使該逆
突竄店埠又擾廬州後路將何以自固藩籬著和春

福濟一面嚴堵賊援一面乘城中賊少之時迅速設法立圖攻克儻仍事遷延致逆匪復占廬城南面或下皋之賊又竄店埠牽掣廬城東北彼時再以進攻棘手爲詞該提督等坐失機宜之罪不能曲從寬貸也

上諭內閣曰已革副都統忠泰督勦巢縣賊匪六月十三日賊衆突出衝撲營盤被毀該革員未能先事豫

防咎無可辭忠泰著交部議處仍責令會同帶兵各員弁殺賊立功以觀後效

和春福濟又奏言蘄水賊匪攻撲英山經官軍擊退後五月十一日復有賊萬餘分路來撲勇目李兆受等帶勇擊卻斬獲無算十二日五鼓該逆乘雨竄至彭家畝我軍火器俱不能燃刀矛相接斃賊數百忽有大股賊匪衝鋒直前我

軍力不能支退回數里賊衆乘勢攻城牆垣低
缺蠶擁而上存城之勇僅數百名衆寡不敵縣
城被陷已革安徽道員何桂珍收集潰勇飛飭
署羅田縣知縣彭惠疇調集團練助勦並飭英
山縣知縣蘇秀槐督練接應二十六日由竹塢
進攻斃賊六七百名餘賊奔回我軍乘勝進逼
賊忽開北門出戰各勇佯退誘賊復殺斃十餘

名賊竄回城時彭惠疇已督勇由樂利河分路
並進賊見旌旗過河接仗我軍由山麓繞出其
前兩路兜圍賊知不敵飛奔渡河我軍梟水追
擊該逆死傷枕藉餘賊復遁入城我軍從西南
兩門連環轟擊該逆膽落全股從南門竄出外
委徐兆達率勇截擊斃賊二千餘名賊衆過河
遁至阜角樹一帶復截殺八九百名餘賊竄瓦

寺前等處又被團練擒斬多名何桂珍當卽入城招撫查英山蕞爾孤城三面受敵因疊遭賊擾居民遷徙流亡各勇口糧缺乏力竭四散城遂不守幸該革道尙知調度迅復城池以免內竄其羅田縣官弁紳民不分畛域帶勇克復實屬可嘉可否擇其尤爲出力者與捐貲供應之英山紳士酌量保奏已革道員何桂珍英山縣

知縣蘇秀槐失守於前收復於後功過尙足相
抵懇

恩免其置議奏入

上諭內閣曰蘄水賊匪驟陷英山經羅田縣官紳等不
分畛域帶勇助剿俾得卽行克復實堪嘉尙所有在
事出力及捐貲供應之官紳義勇人等著和春等酌
量保奏候朕施恩已革道員何桂珍英山縣知縣蘇

秀槐雖經失守於前卽能收復於後功過尙足相抵均著免其議處

三十日辛酉官文奏言據署雲夢縣知縣吳璞稟

報德安官兵屢次獲勝中路兵勇已各抵防所賊衆陸續下竄該縣乘此軍威於六月初九日會同孝感縣知縣李殿華督帶團勇進攻雲夢縣城殺賊三百餘人生擒十一名當將縣城收

復現在搜捕餘匪安撫居民並據署應城縣知
縣王培厚稟報初十日長江埠賊船紛紛下竄
當卽帶勇跟蹤追擊趕至道人橋地方燒沈賊
船數隻斃賊二十餘人生擒二名現在境內肅
清仍紮營長江埠以防回竄各等情查雲夢應
城爲德安至江漢要路現已收復則賊勢不能
聯絡然郡城之賊被攻緊急難保不四出奔突

已飛飭各該縣督飭團練嚴密堵剿並令將長
江埠道人橋兩岸河道用木石截塞以絕賊援
而杜回竄應不難聚而殲旃一俟克復德安庶
可合力進圖武漢現據署藩司常恩稟報德安
城內賊匪不過二三千人其偽副丞相陸姓係
由江南被擄實非甘心從賊屢有投誠之意擬
設法招降免死令作內應勦辦自易得手等語

惟賊情譎詐必須慎密防範免中詭計已飭常
恩就近密籌妥辦 臣現嚴催兵勇一由應城夾
攻德郡一由仙鎮進取漢川並咨會西凌阿由
北路進兵四面圍擊以期迅復城池 臣所帶前
隊兵船已於十八日啟行俟與綿洵晤商機宜
後卽行前進該將軍於二十日抵襄亦卽由陸
路馳赴西凌阿大營會勦奏入

上命軍機大臣傳諭西凌阿綿洵官文曰逆匪踞守德安原圖牽我北路兵力使不能與武漢之師會合今雲夢應城均經收復則江漢道路已斷德安藏匪亦不過二三千人正可迅籌攻克惟賊船下竄道人橋雖經團勇擊敗仍應責成該縣王培厚等實力堵剿西凌阿於初四日自信陽督隊起程綿洵行抵襄陽已由陸路馳往大營官文亦由水路進發該大臣等

務當乘此賊勢中斷之時四路圍擊謀勇並施擣其
巢穴至設法招降令被擄之人作爲內應尤宜出以
慎重勿墮詭計如能先克德安則進兵漢陽不致有
後顧之患漢川爲通達府河之路若所派兵勇隨勤
隨進逆匪勢成孤立無難悉數殲除

欽定勦平粵匪方略卷一百三十三 乙卯年

七月初一日 壬戌 西凌阿奏言 臣由信陽督飭兵

勇馳抵隨州因前四起義勇尙未到隨先令頭
二四起馬隊馳赴長林岡與提督孔廣順聯營
以作應援並先後差探情形查看道路旋奉

諭旨知載增等於鄢家灣等處勦賊獲勝當卽飛咨督

臣官文趕緊馳赴德安會勦 臣督同第三起馬

隊徑至馬坪鎮探得長林岡山路窄狹若馬步兵勇一齊前進紮營恐難聯絡遂輕騎親赴長林岡一帶面見提督孔廣順訥欽詢悉德安賊匪自六月初八初九被勦潰敗後盤踞城內負嵎固守我兵出隊挑誘總不出戰遂商擬提督孔廣順進移沙子岡帶領勇隊之已革參將劉富成進移三陂港提督訥欽在平林市東北應

山縣大路紮營令頭起四起馬隊在孔廣順劉
富成兩營適中紮營二起馬隊在訥欽營盤切
近駐紮其五營義勇於三陂港池南渡口地方
安營 臣擬督三起馬隊與義勇聯絡以作犄角
之勢至德安西門外卽係府河其河西之煙燉
集柴石鋪洛陽店等處已有知府朱百行及易
廷璧等帶領鄉勇駐紮官文遵

言不日由襄會勦可以遏其西竄設有緩急臣與孔廣
順自當撥兵應援免致他虞現在馬步官兵均
已陸續移營前進臣督飭三起馬隊卽日移紮
長林岡俟五營義勇應備軍裝整齊卽同赴渡
口鱗比紮營相機進攻

西凌阿又奏言據提督孔廣順呈報六月初八
日巳刻逆匪二千餘名由德安竄撲煙墩集燒

燬民房當卽飭令已革參將劉富成等帶領勇
練截擊各營隨後接應列隊河岸嚴陣以待並
知會提督誦欽初九日卯刻劉富成帶隊渡河
首先衝入賊隊殺斃執旗賊目三人該匪敗退
我兵乘勢追殺不料黃家寨密林內忽出賊七
八百人抄圍我兵力不能支經守備舒洪元渡
河接應施放擡槍立斃賊匪數名追殺數里斃

賊甚多生擒長髮一名割回長髮首級五顆因
路徑叢雜未敢窮追又據員外郎銜李玉田呈
報逆匪二三千名由漢口一路北上來援德安
占踞雲夢縣城初九日親督練勇攻擊立時克
復並設伏截殺賊匪無數生擒四十一名臣仍
飭令回雲夢城內小心防範奏入均報

同日駱秉章奏言湖南一省南界兩廣西接滇黔東鄰江西北連湖北現在本省南路永州寶慶兩府郴桂兩州所屬地方在在緊急武漢既未克復湖北興國大冶武昌通山崇陽通城各州縣皆淪於賊縱橫數百里閒窺伺平江臨湘巴陵已久自江西義甯失守賊黨積至數萬往來於江西湖北交界本省北路固已防不勝防

而義甯又與湖南之平江瀏陽各縣緊連東路
之防又不可緩近復接據晃州廳各路邊報貴
州鎮遠台拱一帶痞匪勾結苗民滋擾西路又
須戒嚴以一省而兼支五省之寇卽盡調本省
兵勇嚴行防剿尙恐分布難周況本省兵勇之
稍精練者旣調赴江南安徽大營復隨曾國藩
塔齊布東征近如署湖北撫臣胡林翼一軍亦

多從本省召募是一省兵勇既供四省調發而
又須防勦五省之賊實屬不敷分布查甯紹台
道羅澤南一軍於克復江西之弋陽廣信後撫
臣陳啟邁調其帶勇赴省此時江西客兵尙多
而湖南情形甚急相應請

旨飭下曾國藩陳啟邁速飭羅澤南折回湖南以資防

勦奏八

上命軍機大臣傳諭曾國藩塔齊布陳啟邁曰前因羅澤南一軍爲賊牽掣未能卽歸九江諭令曾國藩等俟義甯勦辦得手後卽將該道調回與該侍郎等併力會勦茲據駱秉章奏稱該省兵勇旣多調赴在外復須防勦黔粵楚北江西五省之匪不敷分布必須羅澤南一軍折回湖南防勦自係實在情形惟昨據陳啟邁奏現籌調集兵勇進攻武甯已咨羅澤南等

妥速攻勦該道能否卽折回湖南助勦之處著曾國藩等酌量情形妥籌分撥

初二日癸亥曾國藩塔齊布奏言五月三十日賊

船上犯至姑塘青山一帶水師出隊迎敵該匪從西岸魚貫而上將近我軍逆船斜渡東岸隊伍甚整其領隊頭船係拖罟大船其第二號係長籠花船僞右承宣胡鼎汶黃汶奎李繼遠均

在此兩船中揮旗督戰揚帆直上礮聲如雷意
欲由東岸轉抄我軍之復我軍循西岸而下一
礮不發駛至下游將近賊船之末乃渡向東岸
包抄賊隊羣礮攢轟子如驟雨鏖戰兩時賊之
後隊紛紛敗退前隊數十船陣腳亦亂我軍合
長圍以包之各將弁誓死力戰該逆知難出重
圍卽用三板數隻載僞承宣胡鼎汶等飛槳脫

逃而留僞功勳張百長於拖罟船上與我苦戰
我軍四面環攻船上之賊或撲水或中礮傷斃
四十餘人獨張賊兇悍異常手持刀叉身懷火
彈我軍搶登者多被殺傷各哨官繞舟齊登矛
擗張賊落水奪獲拖罟大船生擒長髮十六人
其第二號花船亦同時奪獲又奪得三板三號
小划二號大礮十八尊方賊目胡鼎汶等駕三

板脫逃時我軍一面圍攻拖罟一面追逐賊目
列礮排轟羣子亂落該逆梟水而遁計礮斃淹
斃二百餘人次早回營知右營哨官蘇光彩中
槍陣亡查水軍自去歲湖北失利以來陷入內
湖各船與外江水營隔絕小船素附大船者皆
不得相見臣國藩特至江西造船添勇另立新
軍方慮士氣已傷難期再振幸仗我

皇上威福兩次獲勝積憤爲之稍申軍心爲之一振若
使此軍果足自立則扼斷長江之腰脅上有金
口水軍以擊其首下有紅單戰船以擊其尾二
千餘里之江面分爲三段勦辦或有肅清之期
此次出力員弁兵勇容臣等擇尤保奏陣亡之
外委蘇光彩請

旨交部照例議卹奏入

上諭內閣曰江西湖內賊匪疊經曾國藩等勦辦獲勝
經此懲創勢已窮蹙著曾國藩督率將弁等迅將湖
內匪艇悉數埽除毋留餘孽所有出力員弁兵勇著
酌量保奏保升外委蘇光彩力戰陣亡著交部照例
議卹

曾國藩又奏言臣至江西數月細觀陳啟邁之
居心行事證以輿論實恐其貽誤江省不得不

縷陳於

聖主之前已革總兵趙如勝係奉

旨發往新疆之員陳啟邁奏留江省派令管帶戰船百餘號水勇四千餘人大小礮位七百餘尊上年紮泊吳城鎮一聞賊至首先逃奔全軍覆沒船隻礮械盡爲賊有其實賊匪無多乃陳啟邁入奏之詞則曰趙如勝奮不顧身力戰終日其所

失船礮並不一一奏明及派趙如勝防堵饒州等處敗逃三次賊破饒州陳啟邁不惟不加以罪並其原定新疆罪名亦不議及已革守備吳

錫光係奉

旨正法之員陳啟邁奏留江西倒填日月謂留用之奏
在前正法之

旨
在後多方徇庇虛報戰功既請開脫罪名又請

賞給勇號正月二十九日吳錫光縱其麾下無故殺死
龍泉勇一百八十七名陳啟邁旣不奏

聞又不懲辦乃取他勇之曾經犯案者縛而殺之以掩
衆人之耳目饒州之賊屯聚於四十里街吳錫
光僅殺賊數十人而陳啟邁鋪張入奏謂克復
饒郡殺賊三千焚船百餘吳錫光與其子姪均
保奏超升卽素在巡撫署內管帳之胡應奎亦

隨摺奏保義甯州之陷實係興國崇通等處土匪居多長髮尙少吳錫光倉猝敗亡並非有大股悍賊與之交鋒也乃陳啟邁粉飾入奏則曰鏖戰竟日殺賊千餘吳錫光薪水口糧較別營獨多乃入奏則曰自備資斧種種欺飾實出情理之外臣等自入江西境後前後所支餉項係用侍郎黃贊湯礮船捐輸銀四十餘萬及奏准

漕折銀數萬皆 臣軍本分應得之餉乃陳啟邁
藉此挾制疊次不肯給餉掣人之肘市己之恩
臣實鄙之羅澤南克復廣信後 臣本欲調回饒
州都昌陳啟邁則調之防景德鎮又調之保護
省城又調之西剿義甯忽又調往湖口忽又改
調義甯朝令夕更反覆無常 臣與陳啟邁面商
江西須辦師船數十號招勇千餘人陳啟邁深

以爲然 臣會銜札委知府劉于瀆董其事業已
興工陳啟邁咨稱停止 臣旣順從因飭劉于瀆
設立船廠專供 臣軍之用陳啟邁忽有咨取廠
內船隻交吳錫光新募水勇之語又飭令廠內
續造船十五號船旣造成陳啟邁又批飭不復
需用無三日不改之號令無前後相符之咨札
義甯團練確有成效屢獲勝仗捐款甚鉅事後

論功陳啟邁開單保奏出力者不得保捐資者
不得保所保者多各署官親幕友陳啟邁署中
幕友陳心齋亦得保升知縣義甯紳民怨聲沸
騰以致解體四月間州城果陷去年四月賊由
醴陵竄至江西萬載縣失守該縣知縣李皓棄
城逃走鄉民彭才三等醜賊馬匹冀免劫掠賊
過之後舉人彭壽頤倡首團練刊刻條規乃彭

才三謂餽錢可以免禍謂團練反以忤賊誣告
彭壽頤恐釀逆案縣令李皓受賄袒庇彭壽頤
遂訐告李皓棄城逃走彭才三餽賊阻團陳啟
邁不剖是非案懸未結不特不爲彭壽頤伸理
冤屈反飭臬司憚光宸勒令該舉人出具誣告
悔結該舉人不從百端陵虐陳啟邁意爲屬員
李皓免失守之處分初不知其釀成冤獄臬司

憚光宸不問事之曲直橫責辦團之措紳以伺
奉上司之喜怒亦屬諂媚無恥 臣既確有所見
不敢不瑣敘瀆陳奏入

上諭內閣曰自上年冬間賊擾江西吳城本年二月復
陷饒州巡撫陳啟邁於疊次奏報摺內悉敘已革總
兵趙如勝陣亡遊擊吳錫光等戰功於失事摺內則
稱趙如勝奮不顧身竭力鏖戰於克復摺內則稱吳

錫光奮力圍攻斬馘數千朕以封疆大吏奏報軍情諒不至有意虛飾茲據會國藩奏吳城之失趙如勝聞賊先逃全軍覆沒饒州之失趙如勝敗逃三次致賊破城與該撫所奏已屬不符吳錫光攻勦饒州僅止殺賊數十該撫輒鋪張入奏甚至將撫署幕中之胡應奎濫行奏保而吳錫光縱勇慘殺匿不奏聞支領口糧又稱爲自備資斧種種欺飾實出情理之外

且於曾國藩軍營需餉屢次不肯發給於水師戰船則忽辦忽止於羅澤南一軍則任意改調朝令暮改反復無定並將各署官親幕友及撫署幕友列入團練保舉而義甯州實在捐資出力之人轉不得與以致人心解體州城失守上年賊竄萬載該縣李皓棄城逃走鄉民彭才三等餽賊財物該撫徇庇不辦轉將首告之舉人彭壽頤坐以誣告之罪並不將該縣

失守處分據實叅奏似此顛倒錯謬堅僻自是實屬
辜恩溺職江西按察使惲光宸於彭壽頤一案不問
曲直將該舉人嚴刑陵虐亦屬有意逢迎陳啟邁著
卽革職惲光宸著先行撤任均聽候新任巡撫文俊
查辦該撫到任後著卽將所叅各情逐款嚴查據實
具奏不得稍有徇隱

同日何桂清奏言本年漁亭之役福建汀漳龍

道徐榮效命疆場被害甚慘業經奉

旨飭部優卹惟念該故員孤忠亮節士民稱頌弗衰咸
思祀典褒崇以彰英烈仰懇

鴻慈俯准於濂亭建立專祠而以同時陣亡之都司許
上達知縣廉驥元按察司知事張穎濱及川浙
各營在徽甯兩府歷次陣亡各員弁一併附祀
徐榮之妾伍氏於二月十五日迎喪回寓投縵

殉節應請

旌表以慰貞魂至徐榮長子候選訓導徐慮善曾在漁
亭隨同徐榮督戰身受重傷該員才具尙堪造
就相應懇

恩俟服闋後以州判留浙補用徐榮第三子刑部七品
筆帖式徐傳善奔喪來浙稟請軍營效力現飭
隨同徐慮善管帶練勇前赴徽嚴一帶聽候張

芾調派防勦奏八

上諭內閣曰前福建汀漳龍道徐榮效命疆場被害甚慘著於漁亭地方建立專祠並將同時陣亡之都司許上達等一併附祀徐榮之妾伍氏殉節自盡貞烈可嘉著照例旌表其子徐慮善著俟服闋後以州判留於浙江補用徐傳善准其赴徽嚴等處帶勇效力

初七日戊辰向榮吉爾杭阿奏言臣等移營摩旗

等山近偏鎮江府城後臣吉爾杭阿與余萬清
商定於十九日午後會同泊承陞水陸並進其
北固山牆垣臣吉爾杭阿會同虎嵩林督飭劉
存厚等攻其西南兩面俾該逆無暇出城衝突
二十二日瞭見鎮江城西南隅女牆微有鼓裂
當卽調集各路兵勇槍礮齊施將城牆轟落數
丈該逆麤聚城頭槍礮如雨我兵不能越登是

日探有江甯賊匪前來衝營應賊當卽商令虎
嵩林督率兵勇出隊步步接應 臣吉爾杭阿卽
會同余萬清親督劉存厚等於四更拔隊起程
直趨高資爲攔截之計署高資巡檢趙希曾等
帶領附近團練居民來會聲勢頗壯該逆卽聞
風潛回惟高資鎮對岸洲地有金山逆匪在彼
盤踞當由團練居民豫備渡船由便民河渡載

兵勇至洲徑撲賊巢該逆竄回金山我兵追至
河濱該逆又在金山開放槍礮遙相拒敵祇得
折回臣等憤急之餘擬爲南北合力之謀臣吉
爾杭阿遂於二十七日夜由焦山渡江至托明
阿營盤察看瓜州情形長圍之外一片沮洳其
間塍埂縱橫止容一人一騎者居多托明阿等
正在移營進逼非急切可以圖功當於三十日

回營適摩旗鴻鵠二山營內大礮業已安竣連
日督飭開放炸彈擊入城中觸物卽炸無屋不
摧目擊城內鼎沸奔避羣趨於東北西北礮力
不及之處我兵見有炊煙地方卽移礮向擊先
後摧燬房屋轟斃賊衆甚多無如城大礮稀該
逆多方趨避尙未能聚而殲之因思潮勇營盤
紮於東門外都天廟下若能移紮廟前山梁安

設大礮與摩旗等山之礮互相轟擊較爲得力
遂於六月初八日馳登都天廟山梁瞭望城中
厯厯在目洵得地勢惟徑對該逆城上礮臺我
兵前無遮護後乏援應祇可爲放哨瞭望之所
不能紮營十三日東南二路補行挑築牆溝工
竣臣吉爾杭阿以驗收工程爲由督同喬松年
劉存厚等直抵象山渡江至焦山覆看其沿江

礮隄自北固山迤西以迄京口折而向南上排
礮位下無立足之地隄係堅土築成爲日旣久
草根盤結頗稱堅固十八日夜會同虎嵩林督
飭劉存厚等銜枚疾走馳抵西門之寶蓋山直
衝而上察看自金雞嶺至銀山之坳被焚廟宇
牆垣林立皆爲該逆藏身之地派撥弁兵前往
查探該逆亦有準備未便輕進撤隊回營二十

二日五更臣吉爾杭阿又親督劉存厚等帶領
兵勇人夫直抵金雞嶺寶蓋山擊散其哨探逆
匪砍斫草木拆毀牆垣金山之逆駕船放礮而
來礮彈直至金雞嶺上我兵開放車礮中其一
船餘船飛駛回山我兵追至江濱水勢浩渺無
從搶登該逆僅在山上遙施槍礮不敢渡江而
南竊思金山兀立江心偏近南岸爲該逆所竊

踞實屬鎮江附近之要區舟師旣難著力必當
於西南二面水勢稍窄處所設法進攻乃前此
劉存厚於四月二十八日潛伏金山南岸江濱
擬欲奪舟而濟今臣吉爾杭阿又親督兵勇一
由山之西面洲地一由山之南面金雞嶺下擊
退賊船直至水涯皆因無舟可渡水師船隻又
爲其礮隄所阻不能駛至金山西南二面致難

得手現在另籌進逼之方以期滅此朝食奏入
報

初八日己巳向榮奏言據總兵吳全美副將李德

麟稟稱我船自六月初六日擊退賊匪木簞後
泊堵弋磯該逆乘我陸軍未至突於六月初九
日分股千餘由蔗山後繞出江濱築壘斷我聲

接當分派各路兵勇登岸分路衝勦截殺數十
人生擒賊目沈可富等八名該逆敗走各兵勇
爭先追擊將賊偏撲小河淹斃甚衆又據各路
陸軍稟稱總兵德安先於初八日由太平黃山
拔隊繞道進兵蕪湖十一日探有蕪賊分兩路
撲來乃將兵勇分三隊迎勦以左右橫截抄擊
千總楊萬青首先衝入賊隊立斬執旗賊首一

名該逆恃衆抗拒各將備督兵極力衝殺復斬
黃衣騎馬賊目並斃賊一百餘名生擒賊黨陳
學政萬德懇二名該逆登時敗退是夜正欲乘
勝進攻適接總兵明安泰函稱已由黃池帶兵
出紮清水河約同次日合攻蕪湖明安泰豫遣
敢死之士數十人乘夜鳧水過溝暗爲埋伏十
二日五更大隊由清水河前進將賊窰溝塹囊

土填築遇水搭板潛進破卡直入殺賊二十餘
名乘勝攻撲蕪湖東南兩門時德安一軍亦經
襲破北門外卡直徧城圍都司虎坤元等督帶
兵勇乘隙登陴殺散守堞衆賊砍開城門三路
一齊擁進殺斃賊匪一百數十人解散裹脅難
民數千餘逆奔出西門明安泰與德安合兵追
擊抄斬多名將城外賊柵水卡一律攻破追至

寶塔根賊營將敗賊窮追落河溺死無算餘俱
竄入水營查蕪湖城甚殘破守禦甚難且城外
賊壘屯紮如林河內賊船甚多賊衆我寡尙須
水陸夾攻方能得力因暫回清水河營盤另圖
進取時鄧紹良由灣沚進兵屯紮距蕪湖二十
里之施家渡地面出隊來會該逆伏巢不戰突
從官軍背後繞出抄來經我軍截殺數十人賊

巢濠塹寬深未能攻破次日復移營較近之老
鴉山以聯水陸聲勢十四五等日探有安慶之
賊萬餘由魯港百家店來窺我營並欲糾合蕪
賊由十里亭來撲鄧紹良卽傳令各營兵勇分
路埋伏抄截一面派隊迎勦十六日卯刻賊果
三路齊至我軍堅壁靜守俟賊將近外濠開放
排槍擡礮前賊擊倒無數我兵槍礮連環轟擊

逆隊敗退各兵勇乘勢撲出賊益驚潰大奔我軍分投追趕三路伏兵並起開槍要截將該逆擊斃三四百名其追赴十里亭一路之賊撲落蕪湖內河淹溺者不下二百名其追赴麻布圩百家店兩路之賊撲落魯港金山湖淹溺者共計約五六百名此外逃逸無幾共斬取逆賊首級三百八十六顆內有僞將軍王潰保一名臣

查蕪湖江口兩岸賊卡重重連紮大小賊營蟻
聚踞守賊船尙有數百隻水陸聯絡萬一上游
賊黨麤至併入踞城下連梁山金柱關之賊首
尾牽綴我軍則不特掃蕩更難尤恐乘虛竄突
當經飛檄明德兩鎮責成克復蕪城妥籌戰守
一面檄飭吳全美李德麟進扼魯港以斷上游
賊援一面令鄧紹良會商各軍約期三路夾攻

水陸併力圍勦並揀派都司李春寅由大營馳往督戰旋據該提鎮等續報十九日水陸大舉明安泰先撲東南城隅賊營越過濠溝鼓行而進該逆猝不及備被我軍斬殺無遺連破犄角二壘直逼城根分攻東南兩門各囊土填濠以進該逆矢石交下又有賊船十餘隻由西門城河衝過橫擊都司虎坤元帶兵繞河迎敵先用

排槍轟勦繼卽施放噴筒焚燬三隻擊破四隻
斃賊匪數十人城上賊俱奔潰兵勇乘閒躍登
東南兩門一時同破大隊擁入其時德安兵早
抵北門督率把總會魁等乘勢攻進千總楊萬
青等督領義勇躍上卡旁瓦屋連破卡隘與明
安泰會合齊出西門都司陶茂森帶勇橫衝堦
至亦將南街賊卡接連破入並攻焚小河北賊

營一座又於寶塔根復出賊黨千餘經鄭濟美
劉秀珠率領兵勇迎戰擊斃執旗賊目三名追
至河干淹斃百餘人大隊圍攻新營焚斬百餘
名餘匪拚命衝出望東梁山一路竄去鄧紹良
一軍偪近河南賊營乘師船緊攻之際與登岸
兵勇將火罐由牆上拋入二卡焚賊藥局轟斃
賊數百人將兩卡踏破逸出之賊竄登港口賊

船守備周萬遠等督飭各兵勇跟蹤追殺並將
內河南岸賊船四五十隻縱火延燒適明安泰
督兵北岸亦燒擊賊船一百餘隻斃賊不下千
餘是日吳全美督船進剿左手受傷仍揮旗催
督進攻各船大礮排轟沈覆賊船數十隻又用
火箭燒擊大小賊船一百餘隻瞭見蕪湖數處
火起陸兵攻至寶塔根賊營復會同督船圍轟

三才圖會卷之三十三
三十一

一面分撥弁勇上岸協攻統計是日之戰水陸
斃賊不下萬餘將賊船勦洗一空克復縣城尙
餘三壘未平該處當江皖之衝實關勦賊全局
關鍵幸將城池克復戰守已有可憑現飭趕緊
修葺城堦分屯扼勦仍檄該提鎮等乘此聲威
水陸併力夾攻務將賊壘剋期踏毀此次出力
員弁可否仍准擇尤保奏出自

皇上逾格鴻施奏八

上命軍機大臣傳諭向榮吉爾杭阿曰蕪湖久爲賊踞
經水陸官軍會合攻勦克復城池各路斃賊不下萬
餘將賊船勦洗一空明安泰吳全美等督率兵勇大
挫賊鋒實屬奮勇可嘉惟蕪湖當江皖之衝爲逆匪
必爭之地且賊壘未平設安慶逆匪分股來援仍恐
得而復失自應一面亟籌守禦一面設法將賊壘盡

數掃蕩其東西梁山之賊亦應趕緊勦除江面可次第肅清金陵之賊其勢漸蹙該大臣自當乘此聲威爲掃穴擒渠之計昨據奏籌勦鎮江賊匪情形布置尙合機宜如能先克鎮江上可翦金陵之羽翼下可斷瓜州之援應於大局方有起色著吉爾杭阿卽照昨奏情形先行設法攻取金山以遏賊勢克復之機當有把握矣

上諭內閣曰此次總兵吳全美等水陸四路斃賊萬餘
賊船勦洗一空蕪湖久陷賊中地處江皖之衝今旣
克復縣城實爲全局關鍵各將弁冒暑從征累戰克
捷奮勇可嘉在事出力各員准向榮擇尤保奏候朕
施恩

向榮又奏言金陵逆匪時於西南各處窺伺卽
經分飭各營嚴防十七日夜逆首羅大綱率賊

五千入出城到三汊河築壘竊踞聲稱欲由杏
花山元山一帶來犯秣陵關以圖內竄查秣陵
關爲大營後路內通溧水蘇常關繫緊要前經
臣抽派廣東兵勇七百餘名在彼防守時慮不
敷堵勦惟大營兵力太單亟難分撥祇得選派
精銳一旅以備緩急馳勦一面札飭秣陵防兵
加意嚴守並檄調殷巷練勇就近策應二十日

探聞賊分兩路來犯當令副將蔡應龍帶兵截
勦黎明該逆前隊已竄至元山離秣陵不遠守
備張揚保等各帶兵勇迎至水口村殺斃賊匪
五人賊仍蠢擁抄來我軍衆寡懸殊該逆鼓譟
圍撲秣陵關各兵勇連開槍礮將前賊擊倒十
餘人張揚保力扼橋道督勇轟擊適把總李桂
芳由殷巷帶勇馳來救應該逆相率驚潰我兵

聞

乘勢壓出擒斬多人逆眾奔逃聞蔡應龍領兵
馳到連夜退回三汊河而去我兵仍守秣陵關
現飭蔡應龍留紮布置並添派參將長桂帶兵
六百名由蕪湖赴秣陵會同嚴防奏入報

同日胡林翼奏言查本年前督臣楊需咨調署
提督訥欽帶兵千餘名防剿粵匪該署提督訥

欽卽坐索行裝銀兩兵不滿千費至萬金以外
又據署襄陽縣知縣王璐稟報提督訥欽帶兵
防堵照例雇備船隻先期伺應忽有兵丁多人
毆傷埠頭提標前營都司多恩帶兵起程聚衆
逞兇毆傷差總王安皆因需索行裝所致臣復
查前西安將軍扎拉芬忠勇激烈一時名將孤
軍力戰二日之久訥欽近在咫尺並不發兵應

援見賊先潰惟恐不速實屬不諳紀律相應請
旨飭下督臣官文就近查辦隨從將弁一併從嚴叅革
其不能得力之兵丁分別裁汰以飭戎行奏入

上命軍機大臣傳諭官文曰胡林翼奏署湖北提督訥
欽帶兵防勦粵匪坐索行裝銀兩署都司多恩所求
不遂卽將差總毆傷前西安將軍扎拉芬孤軍力戰
訥欽不發兵應援見賊先潰請飭查辦等語訥欽以

專闢大員督兵防勦輒敢任意需索縱容弁兵肆行
滋事殊堪痛恨扎拉芬督兵赴楚接仗獲勝因訥欽
擁兵不救以致敗潰尤屬畏葸無能於軍務大有關
繫著官文確切查明從嚴叅辦並查明署都司多恩
劣蹟一併嚴叅其不能得力之兵丁分別裁汰以飭
戎行

初九日
午庚察哈爾都統西凌阿荊州將軍綿洵

奏言 臣西凌阿於六月二十四日由馬坪鎮移
營長林岡駐紮復親赴沙子岡一帶察看馬步
官兵各營聲勢頗爲聯絡提督孔廣順等逐日
出隊二十六日德安賊匪約出二千餘名演隊
該提督等督飭各隊轟擊逆匪退入城中堅閉
不出二十八日 臣綿洵到營面述

聖諭與湖廣總督官文接見該督擬帶兵勇前赴應城

以圖南北夾攻並准該督來咨已由襄陽起程
順流下擊催令各兵勇赴德安西路前進臣西
凌阿現將五營義勇分起移紮渡口卽督帶馬
隊前進伏查德安府城東北係應山大路前令
提督誦欽並二起馬隊扼紮其府城東面尙有
應山大路若由孫家灣走陳家巷亦可直達平
林市爲抄襲捷徑現在馬步兵勇統計萬餘北

面東北尙未聯絡若再分撥東面駐紮殊覺兵
單援應難周擬於應山東面大路令提督訥欽
同二起馬隊移營駐守臣綿洵卽在訥欽營盤
外駐紮臣西凌阿俟義勇備齊移營前進紮於
綿洵孔廣順二營適中如此分撥暫可以應緩
急第兵力究覺單弱信陽州現有防堵兵數千
名德安北路旣經兵勇徧近攻勦信陽防堵稍

緩擬於該處防兵內挑選一千名赴營助剿以
壯兵威奏入得

旨允行

十六日丑丁酉西凌阿綿洵奏言初二日據總管德

楞額等報稱是日辰刻府城出賊萬餘分爲三
股竄撲三陂港等處經已革參將劉富成出隊
迎敵總管德楞額帶領馬隊接應劉富成勇止

千餘衆寡不敵殺賊數名勇力不支全行退下
經馬隊接應力戰斃賊數十名第賊多兵少且
賊由兩旁抄裏幾欲圍住馬隊官兵且戰且退
占住山梁以杜北竄之路營盤已被燒燬維時
提督孔廣順誦欽派步兵二三百名出營二里
許排隊站立並未進前接應迨賊匪撲過步兵
望風披靡守兵越牆逃走所有營盤均被賊踞

臣等一聞警報速飭協領巴揚阿等帶領馬隊由長林岡往剿行至十數里山路紛歧不能前進現在請欽所帶官兵僅有三四百名來營提督孔廣順尙無信息其步隊官兵不知何往劉富成所帶勇隊尙有一千名紮駐長林岡據勇目侯起倫等面稟該五營義勇陸續移營平林市聞逆匪出撲隨即齊隊迎敵忽有千總邢興

未把總周春和等率勇三四百及五六百名不
等齊入賊夥該勇目無法攔阻逆匪尙占平林
市臣等惟有督飭馬隊晝夜嚴防以截北竄之
路已革參將劉富成勇衆退回尙未全行潰散
提督孔廣順請欽未能督兵援應實屬退縮臣
等調度無方咎實難辭應請

旨將提督孔廣順請欽及臣等一併從重治罪

西凌阿綿洵又奏言自逆匪占踞平林市千總
邢興未等擁衆八夥我兵虛實盡被洩漏而五
營義勇渡河赴隨州者十之八九現在逆匪奸
細到處皆有稽察難周府河一路由長林營後
直達隨州兼防尤難爲力惟有暫回隨州庶義
勇潰兵可以妥爲辦理臣等於初五日督帶隊
伍次第回至隨州飭令劉富成將湖南勇隊及

各起馬隊相地聯絡紮營以壯聲勢現在存營
馬隊兵勇僅止三千義勇約二千餘兵力實形
單弱擬請

飭下督臣官文速由隨州一路會剿以遏北竄奏入

上命軍機大臣傳諭西凌阿綿洵官文曰西凌阿統領
諸軍剿辦楚匪乃抵德安後毫無布置並未督兵攻
剿及賊匪撲出營盤輒被燒燬孔廣順訥欽所帶步

兵望風而靡營盤亦被賊踞可見平日旣調度乖方
臨時又不能相機策應如果聯絡紮營互相援應何
至遇賊卽潰耶至五營義勇屢次諭令該大臣妥爲
駕馭乃竟有邢興未等率衆投入賊夥之事我軍虛
實該逆得以周知其患更甚該大臣等因長林岡勢
難久駐退回隨州所帶馬隊兵勇僅止三千義勇二
千餘名兵力愈形單弱本日已諭令都興阿將馮官

屯官兵二千名帶赴湖北軍營交西凌阿等調遣以資攻勦官文前奏督兵由襄陽起程順流下擊此次我兵失利賊勢更形猖獗該督自應馳赴德安會同攻勦使軍威復振逆匪北竄固不可不防然能奮力進攻該逆方自保之不暇何能遠竄若如西凌阿之以嚴防北竄爲詞掩其節節退守之罪是又蹈楊需故轍國法具在豈能屢邀寬宥耶現在存營義勇是

否足恃潰散兵勇應如何分別留撤該大臣等務當
悉心籌畫毋滋他變

上
又命軍機大臣傳諭崇恩都興阿曰楚北賊勢猖獗
必得厚集兵力以資勦辦所有駐紮馮官屯官兵二
千名皆係勁旅著都興阿卽日統帶起程前赴湖北
西凌阿軍營聽候調遣該官兵啟行時所需軍裝口
糧車輛等項著崇恩迅速應付勿誤軍行

上諭內閣曰西凌阿等統兵督勦德安逆匪未能及時
攻取致被賊撲營盤損失軍裝器械實屬調度乖方
西凌阿綿洵均著革職留任以示薄懲孔廣順訥欽
未能帶兵接應亦屬怯懦無能均著革職留營效力
賊匪現踞德安著官文迅速前進會同攻勦西凌阿
總統諸軍毫無紀律頓兵不戰以致爲賊所乘殊堪
痛恨儻再不知愧奮必當重治其罪

同日英桂奏言接據探報本月初二日德安賊匪分股直撲三陂港等處劉富成等營盤被焚義勇投賊現在賊衆仍踞德安三陂港平林市均有餘匪來往西淩阿已退駐隨州信陽三關之外並無勁旅且投賊之勇從前由豫赴楚深知路途難保其不引導窺伺情形愈爲喫重臣惟有殫心竭力親督在防文武員弁嚴密戒備

不敢稍存大意奏入

命軍機大臣傳諭英桂曰楚北官軍失利信陽三關
愈形喫重必得在防文武嚴密戒備不可稍形鬆懈
該撫應否仍駐信陽防堵著卽酌量緩急迅速覆奏
至西凌阿退駐隨州兵勇潰散已多不敷攻剿本日
已諭知官文帶兵前進會同勦辦並諭都興阿管帶
駐紮馮官屯之官兵二千名卽日赴楚助勦該副都

統帶兵經過豫省所需軍火並著英桂隨時接濟毋
令缺乏

續三平四入羅家門三三三

三六

欽定勦平粵匪方略卷一百三十四 乙卯年



七月十八日 己卯 兵部奏言欽奉

諭旨已革副都統忠秦督勦失利交部議處遵查該革員前因巢湖一帶勦辦遷延奉

旨暫行革職留營帶罪自效今復以督勦失利致將營盤被毀咎實難辭經和春等奏叅奉

旨交部議處應請議以革職奏入

上諭內閣曰暫行革職鑲紅旗蒙古副都統忠泰著革職仍留軍營帶罪自效

十九日庚辰和春福濟奏言廬郡逆匪經官兵晝

夜痛勦仍敢恃衆負隅臣等於六月二十六七

等日督同鄭魁士等攻勦南路賊匪並同時分

兵攻擊各門該逆或來七八千及四五千分

股直撲兵勇亦分路奮擊斃賊三四百名維時

得勝門南門水西門各出賊千餘名意圖接應
經常清等痛加截擊先後共斃賊二百餘名該
匪敗退初四日三更該逆在南路乘雨夜偷築
營壘臣等於初五日五鼓帶領官兵馳往逆匪
分路而來當飭鄭魁士等揮兵迎擊兵勇奮力
爭先該逆左右衝突有執旗黃衣賊十數名直
前迎敵經外委蘇興瓏連刺二賊賊衆潰散我

軍追至賊營蘇興瓏帶兵首先越過外濠槍上賊壘兵勇一擁而上盡力砍殺斃賊多名立將賊營奪毀惟蘇興瓏身受多傷旋即陣亡玉崑賊營奪毀惟蘇興瓏身受多傷旋即陣亡玉崑左脅被賊槍傷約斃賊匪五六百名奪獲擡礮鳥槍刀矛黃旗多件初七日黎明臣等率同兵役在大堂店窰築營壘飭令都司吳慶孚等帶兵由北門移紮賊衆節次來撲均經兵勇擊退

先後斃賊數十名初八日卯刻得勝門南門各
出賊千餘人分路來撲經常清等迎剿斃賊數
十名該匪敗退入城驍騎校德慶奮勇前驅受
傷陣亡初九日五鼓臣等督帶官弁兵勇並吉
林馬隊馳赴南路賈家大蔭攻剿突出賊數千
人分路來迎我軍兩面夾攻斃賊無數有騎馬
賊首數名揮衆力拒我軍槍礮刀矛奮力擊刺

佐以火箭噴筒並連開大礮賊勢大潰官兵追
殺又斃多名並將賊匪新築營壘二座同時奪
毀把總蔣萬福首先帶兵衝入賊隊殺賊多名
被賊槍傷陣亡是日鏖戰數時之久約斃賊八
九百名奪獲槍礮刀矛二百餘件臣等惟有激
勵士卒乘勢急攻以期迅復堅城驍騎校德慶
把總蔣萬福外委蘇興瓏力戰陣亡均請

旨交部從優議卹奏入

上諭內閣曰廬州逆匪疊經官軍痛剿仍敢負隅抗拒
經和春等督軍疊加痛剿自己膽落和春福濟務卽
督率將弁乘勝進攻亟圖克復廬城毋得再涉延緩
熱河驍騎校德慶湖南把總蔣萬福候補外委蘇興
瓏素稱勇敢勞績最著茲以首先衝入賊營力戰陣
亡深堪憫惜均著交部從優議卹

福濟又奏言七月初九日副都統麟瑞帶領馬
隊到廬除分撥一千名委吉林營總保廉等管
帶起程前赴金陵外其餘一千二百五十名應
留廬助勦刻值軍情緊急帶兵乏人副都統麟
瑞年壯才優精明幹練且係吉林本任駕馭尤
宜仰懇

天恩俯准留於廬州帶兵助勦藉資指臂之助奏入

上從之

同日駱秉章奏言逆賊自復陷武漢後遣黨勾結土匪刻思南犯經平江官軍團勇擊退之敗賊仍踞通城另股復自咸甯蒲圻前來會合臬司魁聯道員江忠濟分遣楚勇出境迎擊連獲勝仗斃賊二百餘名二月二十七日賊衆分撲楚勇營盤千總江上曉等血戰竟日擊斃賊匪

六七百名餘黨仍踞通城江西義甯州賊又分
股前來會合復竄擾通城北港一帶代理臨湘
縣姚榮卿帶勇迎勦接仗失利力戰陣亡逆賊
由臨湘桃林竄入新牆江忠濟等帶勇行抵楊
安橋遇賊數千攔頭迎擊陣斃賊目八名陣斬
十四名賊始卻退分竄關王橋等處二十九日
已革同知直隸州恩霖等集團勇四萬餘人分

途進攻聲勢浩大賊卽望風而潰追斃賊數十
名燒燬營棚八十餘架連日追至花古園方山
洞等處沿途擒斬不下數百名各路敗匪仍退
歸詹家橋北港老巢臣聞北路警報卽飭委千
總楊虎臣等帶勇馳往相機防勦比至而賊已
敗遁所有帶勇勦賊陣亡之代理臨湘縣事候
補縣丞姚榮卿等應請

飭部照例賜卹奏入

上諭內閣曰疊次接仗陣亡之代理臨湘縣知縣候補
縣丞姚榮卿把總林志祺職員李治纘童生胡際昌
附生李文淳職員袁毓龍童生王拱平李克靖監生
余湘重均著交部照例議卹

駱秉章又奏言臬司魁聯前奉

旨留辦防務乃忽由岳州稟報到省臣以賊陷漢陽

湖北省城危急興國崇通土匪勾煽岳州防勦
萬緊該臬司帶勇駐岳豈可遠離批飭迅回岳
州旋又據該臬司以染患痰喘病證醫治未痊
稟請開缺回旗調理不候批准卽起程赴省 臣
見其精神尙好步履如常當此逆賊縱橫之時
若人人引疾擅離防所大局何以支持旣據該
司屢次瀆請 臣 不得不據實直陳奏入

上諭內閣曰新授湖南按察使魁聯係疊次降旨留辦防剿之員該員帶勇駐紮岳州界連楚北防務正當喫緊乃輒以舊病時發屢向該撫稟請代奏回旗調理且兩次赴省不候札調擅離防所殊屬取巧魁聯著以知府降補仍留於湖南差委以杜規避

二十二日癸未向榮吉爾杭阿奏言查鎮江逆匪

恃金山爲犄角以銀山寶蓋山煙墩山金雞嶺

爲藩籬負固不下經臣等督兵屢攻金山擊沈
礮船並將自寶蓋山金雞嶺至銀山坳內牆垣
擊壞不料該逆銀山下掘有深濠密釘梅花樁
山上有小賊營一座潛匿哨探匪徒銀山東對
西門外之賊礮隄北對金山必應首先進取正
在填濠襲取間該逆連日分作數股或一二百
人或三四百人在寶蓋山金雞嶺煙墩山等處

游弋窺探一經追擊卽去二十九日夜望見銀
山上燈火隱約賊衆增添臣吉爾杭阿卽傳知
泊承陞在北門外水陸嚴堵副都統致祥等在
東北一帶合力防剿一面派知府劉存厚等從
寶蓋山正南參將周兆熊等從寶蓋山西南參
將李占鼐等從寶蓋山東知府丁國恩等從煙
墩山分路進攻都司玉興等管帶車礮分隨各

隊虎嵩林督帶後隊在西門外東嶽廟一帶接
應余萬清等在西門外邀截後路之賊並開礮
專擊城中及由南門並西南隅突門潛出匪衆
臣吉爾杭阿帶領小隊登高督戰視賊所向相
機接應部署甫定瓜州金山鎮江之賊傾巢而
來寶蓋山金雞嶺煙墩山之上蠶屯蟻聚前來
爭踞各山我兵痛加剷洗其敗竄之賊又爲余

萬清等分投截剿殺賊無算查點我兵有四川
川北右營千總周大全勇目陳得勝周肇邵王
得貴記名外委趙良佐在寶蓋山衝入賊隊致
受礮傷陣亡兵勇亦間有陣亡受傷者臣等卽
飛咨托明阿乘其空虛進攻瓜州七月初一日
寅刻仍照前派出隊該逆麴聚寶蓋山巔意欲
修葺舊有賊營劉存厚等督兵先登守備陳紹

業等直上山梁殺賊甚多我兵乘勢一擁而上
該逆力不能支卽行竄逸守備陳紹業額外李
襄成俱受重傷陣亡爾時金山鎮江之賊分路
來援銀山銀山之賊出巢迎拒我兵分隊迎勦
該逆舍命死鬪雖死亡接踵不肯遽退而我兵
勇氣倍增泊承隆周士法督帶拖罾艇師各船
乘風上駛攻擊北固山賊礮隄余萬清虎嵩林

督飭將備專勤後路抄襲敗下逆匪殺賊不計其數賊始敗退初二日仍舊出隊進攻該逆死守不出我兵自下仰攻難以飛越鎮江金山復有賊匪一由寶蓋山一由金雞嶺冒死來援劉存厚等將寶蓋山之賊擊回鎮江丁國恩等將金雞嶺之賊擊回金山又經余萬清虎嵩林沿途截殺頗稱痛勦先是劉存厚相度地勢選勇

填濠進至賊營牆邊互相轟擊賊漸難支正期
得手適鎮江金山賊匪分作數股豕突來援虎
嵩林督兵迎勦賊已有數股抄出其後冀圖裏
襲劉存厚右肩受傷仍回兵接戰賊始披靡另
有一股出鎮江西門而來站住督率潮勇追其
後周兆熊率兵攔其前余萬清等督飭兵勇分
路勦殺該逆散而復聚者數次經玉興等將車

礮向前連環施放每礮必傷斃賊匪數十人賊始潰走我兵分路追剿因城上槍礮如雨未能攻奪臣吉爾杭阿於登高督戰之際遙望瓜州托明阿等各軍隊伍整齊槍礮迅捷分路直撲賊巢其戰甚酣斬獲當亦不少伏查銀山等處向爲該逆哨探之地經我兵轉戰八日殲戮匪徒數以千計始將寶蓋山煙墩山金雞嶺退出

其銀山因舊有濠溝一時不克填平擬與托明
阿等南北同時並舉紮營進逼以期攻克陣亡
守備陳紹業等應請

旨交部分別議卹奏入

上諭內閣曰逆匪因踞鎮江恃金山爲援應其銀山寶
蓋山等處亦藏有匪徒往來窺探吉爾杭阿調派知
府劉存厚等各帶兵勇分路進攻痛加勦洗其各路

來援之賊均經官兵抄截殺斃不計其數奪據險要
卽著向榮吉爾杭阿知照托明阿南比合力迅復城
池力戰陣亡之守備陳紹業外委趙良佐均著交部
照例議卹千總周大全著從優照千總例議卹候補
把總陳得勝著從優照把總例議卹額外李襄成著
從優照外委例議卹勇目周肇邵王得貴均著交部
從優議卹

同日曾國藩塔齊布奏言六月十一日據探潯城逆匪在新壩添築礮臺龍開河泊有賊船四百餘隻臣塔齊布於十三日飭副將周鳳山等帶勇明攻東門爲聲彼擊此之法各營兵勇偃旗息鼓於四更時急赴西路以攻新壩飭九江鎮居隆阿等伏兵於三川嶺之右臣塔齊布率參將彭三元等攜帶板片搭造浮橋搶過濠溝

我軍拋擲火彈延燒賊船二隻賊衆驚覺抗拒
城中之賊隨亦擁出二千餘人我軍開放槍礮
斃賊雖多該逆水陸併拒殊無怯意臣塔齊布
因令兵勇佯爲退走該逆出卡追襲我軍誘過
濠溝遂令嶺左伏兵抄賊後路嶺右伏兵同時
並起佯退之兵回旗轉戰槍礮齊施短兵夾擊
賊衆大潰隄陁狹隘賊黨擁擠爲濠所阻約計

擊斃三百餘名墜濠溺湖者甚多升用副將玉山等先攜大礮伏於龍開河上之水府廟比見逆船退出連環轟擊亦斃數賊彭三元阿達春等見水陸之賊均已披靡乘勝撲卡卡內賊礮子密如雨彭三元阿達春均受礮傷守備黃明魁受傷陣亡隨傳令收隊臣國藩又派令水師前往徐家埠搜捕賊巢並派知縣李錕帶陸勇

四百名會勦所過賊卡拆毀六座已刻到準陸
賊前來抗拒水勇登陸迎勦排槍轟擊賊衆奔
潰我軍逐北數里李錕所帶陸勇亦至乘勝窮
追焚燬望樓數座糧館五處賊船八十餘隻十
五日各營派二十餘船前往湖口探看賊營情
勢弁勇冒險貪功衝出梅家洲賊卡之外三面
被圍鏖戰兩時被賊圍去長龍一號三板三號

千總洪建勳把總李文田同時陣亡姑塘大隊
前往救應該逆始畏怯奔竄臣等伏查潯城之
賊時多時少臣塔齊布之師分剿他處則恐大
營單薄反爲逆賊所乘若台聚一處則日對堅
城久無成功且湖口水軍無陸兵以護之彼此
俱不能得手亟應變計以求有濟臣塔齊布擬
移至青山渡湖之東會勦湖口如能攻破此關

全局固有轉機卽不能遽破亦當由彭澤而下
直趨建德東流以期與下游池太之師聯爲一
氣是亦大局旋轉之一策也陣亡之守備黃明
魁等均請

旨交部從優議卹奏入

上命軍機大臣傳諭曾國藩塔齊布曰該侍郎等水陸
兩軍隔絕已久湖口九江兩處俱不能得手自應速

籌變計以期制勝惟據所稱擬將陸軍移至青山渡
湖會勦湖口意在力通江路如能迅卽攻破則水陸
兩軍分而復合自是勝算儻不能遽破則上游賊勢
方熾豈能遽舍九江徑趨建德東流不特潯郡逆匪
乘我東下有牽綴後路之虞卽大軍移撤後該逆四
出滋擾或竄入江西腹地或上結湖北逆黨均屬可
慮該侍郎等旣已籌議及此自必胸有成竹著再詳

細審度如果確有把握原可照議辦理但不可顧此失彼置九江於不問現在下游師船僅止克復蕪湖該侍郎等卽由彭澤直下相距尙遙恐未能聯爲一氣該侍郎等不可不兼權并計期出萬全也

論內閣曰江西九江等處賊匪經曾國藩等水陸進剿疊獲勝仗著卽督飭將弁兵勇乘勝攻剿力通江路儘先守備黃明魁千總洪建勳把總李文田力戰

陣亡殊堪憫惜均著交部從優議卹

二十三日甲申西凌阿綿洵奏言臣等前令都司

施紹恆查明五營義勇初二日齊隊時逃入賊
夥者六百六名現存二千二百餘名臣等予限
三日速爲收聚初限未及收齊復行展限飭收
除將限內回營弁勇責懲斥革逾限未經回營
膽敢遠遁者咨行各督撫一體嚴拏逾限二次

始行回營之吉林披甲貴山等訊係畏蕙逃避
法難姑容當按軍法辦理其宣化已革遊擊蕙
椿亦係逾限二次回營以帶隊職官既已潰散
於前復敢逃避於後應請

旨按軍法從事提督孔廣順原帶步隊官兵五千六百
餘名內僅擇得可用官兵二千二百餘名提督
訥欽原帶步隊官兵二千餘名內擇得可用官

兵一千五百餘名其餘怯懦不力者撤回原營
現在臣等所帶各營兵勇統計八千餘名兵力
實形單弱已咨行湖廣總督就近札調鄖陽鎮
內四營兵一千五百名竹山協標兵五百名來
營第整備軍械尙需時日誠恐緩不濟急聞隨
州知州嚴樹森團練鄉勇數萬輿情尙皆愛戴
已飭選帶隨同前進藉資攻剿

同日官文奏言臣行抵潛江已陸續將所帶川兵三千名及在京山襄陽募勇三千餘名派往應城漢川分投進剿僅存隨營旗綠兵五百餘名因聞漢川分水嘴一帶復聚賊數千意圖上竄襄河勢甚兇猛正在督催兵勇進攻間忽聞德安大營失利臣卽將派往仙桃鎮川兵令參將顏朝斌撥勇一千名督同前赴應城張萬祿

等所帶川兵襄勇四千名均由應城馳往應援
德安蓋應城距德安九十里若再繞道隨州誠
恐緩不濟急且中路益形空虛賊必恣意竄越
莫若催兵躡賊之後斷其歸路使該逆南北牽
制畏我兵截其後必不敢輕易北竄已飛咨西
凌阿趕緊收集潰散兵勇堅壁堵禦更嚴防義
勇爲賊內應臣添調近路鄉團取道天門亦赴

應城旁抄夾擊以圖先克德安再圖武漢庶可
兼顧連日接據葉培等來稟應城一帶有賊竄
擾該員會合知縣王培厚等帶勇在長江埠連
日與賊接戰均獲勝仗截殺長髮賊甚多焚燬
賊船十餘隻搶獲賊船十隻又探報賊由德安
陸續回竄臣已飭應城雲夢各軍嚴防再會商
西凌阿妥慎布置剋期進剿不敢稍事遷延

官文又奏言接據帶勇知縣李光榮等稟稱本月十二日寅刻乘賊不備督帶礮船由中路進攻分派川南各勇從兩岸夾擊分水嘴賊匪齊出拒敵我勇槍礮齊施鏖戰多時適把總李芳春等帶勇繞至分水嘴背面焚燬該逆木城二座賊始敗退該員等乘勝督勇立將分水嘴賊巢燬盡帶隊追殺至下游蚌湖口地方共殲賊

二百餘人並焚燬賊船十餘隻現由鄆家灣移營楊林溝以圖進兵漢川昨又接撫臣胡林翼來函現督兵攻勦蔡店囑卽遣師進取漢川合兵蔡店共圖漢陽俾我軍南北相通該逆上下隔絕德安之賊勢本孤立勦除不難均奏入

上命軍機大臣傳諭西凌阿綿洵官文曰西凌阿等現帶官兵尙有八千餘名又添調隨州團勇萬餘人兵

勢不爲不厚據官文奏報已派參將顏朝斌撥帶川
兵襄勇五千名由應城進援德安已斷逆賊歸路西
凌阿等正可迅速前進迎頭夾擊使該逆進退無路
則德安賊勢必孤再得官文一軍取道天門從中橫
截自不難於攻克若但株守隨州專待官文兵到是
臨敵旣不能堵禦進兵又專恃應援安用此庸懦無
能之將耶所調鄖陽鎮兵一千五百名竹山協兵五

百名著官文酌量調往總以取道便捷爲要不必繞
至隨州轉致迂緩官文既有先克德安再圖武漢之
議亦著迅速前進現在胡林翼旣進攻蔡店荊州兵
勇又已將分水嘴一路打通漢川前後均有官兵此
正克復德安之機西凌阿官文等萬不可稍事遷延
致賊守益堅攻勦仍難得手湖北兵勇屢次潰散非
嚴行懲辦不足以申軍律劉富成誦欽孔廣順業經

革職留營效力儻再不知奮勉軍法具在不能再邀寬典也

上諭內閣曰已革遊擊蕙椿於德安賊匪撲營時未能奮勇接仗隨同兵丁潰逃又遲久始行回營實屬畏葸無能著卽按軍法從事以申紀律

二十四日酉乙官文奏言准撫臣胡林翼函稱七

月初九日探聞賊匪大股來撲麥山卽派兵親

督渡江前往應援賊衆四五百人直撲營盤幸
撫臣督勇奮擊殺賊無數賊始退去大兵追剿
至豹子嶺十一日移營李家集偪近蔡店十三
日賊匪數千由蔡店分股來撲撫臣衝鋒督戰
適知府彭玉麟等帶水師兵勇亦出襄河水陸
夾擊攻破蔡店賊衆披靡殺斃二千餘人逆賊
喪膽撫臣卽日拔營進偪漢陽派留水師駐守

蔡店囑卽遣撥精兵馳往會合進取漢陽伏查
蔡店爲襄河門戶攻破蔡店據其要隘德安之
賊必思力爭此地亟宜乘機合勦迅圖克復臣
已飛飭李保邦等帶得勝之師卽由分水嘴進
攻先克漢川直趨蔡店並催鹽道常恩帶川兵
豫勇二千餘名隨後接應再探聞德安之賊仍
住城內城外並無賊蹤其爲懼我兵抄後不敢

北竄可知現嚴催參將顏朝斌等各帶兵勇會
合應城縣王培厚約齊團練截賊歸路相機進
攻德郡一面咨會西凌阿督隊前進攻襲德安
並飭隨州知州嚴樹森督團協助由北路夾擊
早圖克復兼防北竄惟投誠義勇反側已露實
爲心腹之憂已密咨西凌阿堅壁勿動善爲籠
絡伺便卽設法聚殲伏祈

飭下河南撫臣增兵防堵以防義勇變竄臣亦卽隨帶

旗綠官兵五百餘名並添調駐防潛江之副都
統錫齡阿管帶荊州滿兵二百名練勇六百名
隨同前赴天門縣岳口地方擇要安營該處與
應城漢川均相距匪遙實爲水陸適中之地兩
路兵勇皆可兼顧以便斟酌緩急隨時調撥奏

八

上命軍機大臣傳諭西凌阿綿洵官文曰據官文奏稱胡林翼於初九日渡江十三日攻破蔡店該督現飭李保邦等進攻漢川直趨蔡店仍飭顏朝斌等進攻德安並親赴岳口地方調度諸軍布置均屬周妥西凌阿一軍昨諭迅速前進克復德安該大臣所帶兵勇足資攻勦不得專待官文所派之兵遷延株守更增罪戾至隨營義勇反側情形現據官文奏稱已密

卷之三十一
三十一
咨該大臣嚴加防範伺便聚殲自係爲亟除內患起見惟該義勇人數衆多殲除未易儻機事不密爲害非細西凌阿前飭施紹恆等隨時查點其願歸田里者著卽資遣若能因此相安自可逐漸解散其有心懷叵測得有實據者卽行正法似此恩威並用妥爲駕馭庶不致激而生變

上又命軍機大臣傳諭英桂曰據官文奏投誠義勇恐

其生變回竄河南請飭防堵等語此項義勇前由馮
官屯赴楚道經河南路徑熟悉現因官軍失利投入
賊營者已有六百餘名之多若輩狼子野心萬一引
賊北竄亦不可不防著英桂嚴飭文武員弁隨時偵
探加意防範

二十六日 丁亥 官文奏言據知縣李保邦等稟稱

於進攻分水嘴後仍督師前進探得漢川城中

之賊正望德安賊匪來助爲拒守計該員等恐
賊匪救至卽督隊前行十四日戌刻趕到漢川
衝破賊營見各門緊閉我軍偪近城垣槍礮齊
施逆匪開礮拒敵正鏖戰間適副都統魁玉督
催後隊兵勇齊到該逆望見勢卻前隊兵勇乘
勢爬城而入逆匪卽開東門奔逃我兵分軍進
城仍督兵尾追殺黃巾賊目數十人轟斃無算

立將縣城克復臣現督飭得勝之軍迅赴下游
接應仍一面飛咨西凌阿等嚴防北路並催顏
朝斌等乘機襲取德安臣卽趕催後路兵勇往
扼瀨口或進府河夾攻德安或出襄河進勦武
漢量其緩急接應兩路軍情

官文又奏言前因下游逆匪分股由興國州擾
及崇陽通山竄撲蒲圻縣境當經署撫臣撥兵

援勦並飭該縣趕辦團練實力堵禦雖疊有斬
擒而逆匪盤踞崇通屢圖窺伺頃據署蒲圻縣
知縣孫守信稟稱探聞崇通股匪六七百人竄
至該縣中港地方經該縣督團往勦賊卽潰散
追殺至盧家橋殲斃數百名初六日該逆復分
三路直撲新店該縣會同千總樊文忠督帶練
勇亦分投迎勦鏖戰三時賊衆披靡我勇追殺

十餘里計斃賊匪四百餘名墜崖落澗死者無
算維時分水坳胡家橋地方各有賊數百人竄
擾經團首賀鵬搏等擊退等情臣查蒲圻一縣
爲武漢金口之後路崇通股匪屢撲該縣境地
意在聯合武漢賊匪肆其猖獗該縣文武紳團
協力堵剿均獲勝仗使逆匪不敢復行窺伺洵
屬奮勉其尤爲出力之藍翎千總樊文忠仰懇

天恩賞換花翎用示鼓勵仍飭嚴加防堵以遏賊氛

官文又奏言據蘄水縣知縣劉綮稟稱五月十八日探有賊千餘名由上巴河竄入蘄邑竹瓦店一帶當飭典史徐學浩等督令團勇出隊行抵附近地方遇賊迎拒我軍槍礮齊施斃賊二百餘名賊卽敗潰我軍追殺又斃賊多名將賊逼至渡口後無退路自相踐踏我軍又殺賊百

餘名用槍轟斃二百餘名餘匪梟水渡河淹斃者不計其數二十三日賊復招集各路竄匪共三千餘人在朱四橋等處築立土城五座爲持久計當經壯勇分投進剿擊斃三百餘名該逆敗遁時因各路防勇不敷策遣遂函商羅田縣借勇二千名飛調麻城勇四百名於三十日分三路進取直搗賊巢該逆傾巢迎敵我軍奮勇

三才圖會卷之四十三
三才

攻擊逆匪退守土城抗拒從九品李玉墀等督
勇躍上北面土城徐兆達等由後路斜入用礮
轟倒土城一座賊衆驚潰各勇乘勢夾攻當將
五座土城轟毀連放信礮伏兵齊出各在隘口
截殺計斃賊不下二千餘名內有穿黃衣賊首
多名生擒四十八名餘匪亂竄我軍又追斃千
名先後擊斃偽將軍黎姓等五名此次勦辦斬

水縣竄匪該官紳等殺賊幾盡尙稱勇敢 臣仍
札令知縣劉縻搜捕竄匪嚴密堵剿奏入

上命軍機大臣傳諭西凌阿綿洵官文胡林翼曰前因
西凌阿督兵失利疊諭官文會勦德安此時胡林翼
已過江攻破蔡店李保邦等亦破分水嘴賊巢攻克
漢川我軍上下之氣已聯官文正可乘此機會進剿
德安據奏先派顏朝斌前往應援該督親帶旗綠各

營兵赴下游接應或進府河夾攻德安或出襄河進
勦武漢察看緩急接應等語惟是德安未克漢陽又
爲該逆老巢守之必力該督徘徊中路恐有腹背受
敵之虞況西凌阿兵威已挫獨力難支著官文迅往
德安會勦勿再延緩西凌阿到楚後並未打仗兵勇
業已潰散駕馭無方殊堪痛恨屢諭帶兵進勦不得
株守隨州現在曾否拔營前進未據奏到儻再不知

愧奮立功贖罪更有何顏對朕耶胡林翼著與李孟羣所帶礮船及魁玉常恩等各兵聯絡聲勢進取武漢俾該逆南北不能相顧庶勦辦可望得手

上諭內閣曰蒲圻爲武漢金口後路現在股匪擊退其尤爲出力之藍翎千總樊文忠著賞換花翎

二十九日

庚寅

何桂清奏言欽奉

諭旨安徽甯池太廣道著暫改爲徽甯池太廣道加按

察使銜並添設皖南鎮總兵一員照臺灣鎮道之例
准其會銜專摺奏事其應辦事宜著該督撫分別妥
議迅速具奏等因臣伏查皖南鎮總兵業已奏定額
缺一切營制事宜應由兩江督臣安徽撫臣斟酌
酌奏辦其新任徽甯池太廣道石景芬應卽前
往任事以專責成至於徽州軍務臣前奏明令
張芾協同鄧紹良攻勦並責成辦理善後現在

徽池二府防務善後均係張芾一手經理尙屬
妥協甯太軍務係由向榮督飭鄧紹良勦辦浙
省兵勇在甯太防勦者五六千人統歸鄧紹良
調度臣愚昧之見似應將防勦事宜仍責成現
在任事文武諸臣照前認真辦理其地方公事
營務察吏安民卽責成新設鎮道熟商妥辦遇
有緊要機宜卽由該鎮道一面稟商金陵大營

一、面會銜專摺陳奏總期文武各員和衷共濟
以慰

聖主塵念東南至意該處協防籌餉事宜 臣當盡心竭力斷不敢以越俎爲嫌致負委任奏入

上命軍機大臣傳諭何桂清曰此時徽甯兩府甫就肅清池太各屬尙未悉數收復地方公事與軍務交涉者多原不能過爲區別惟據奏稱石景芬責令專任

地方而以防勦事宜仍責現辦文武亦屬因時制宜
卽著照所議辦理徽池防勦善後旣係張芾一手經
理該員現無職守自可專心籌辦若甯太兵勇雖歸
鄧紹良調度而該員四出征勦並非專顧皖省之人
皖南旣新設總兵卽應令其專司防勦豈可以本境
軍務概委客兵現在簡放之豫祺本係浙江副將何
桂清必能深悉其人著卽詳加體察該員於新設重

鎮能否勝任如果明白勇往則皖南軍務儘可責令督辦儻不能勝任亦卽據實具奏不可稍存成見總之皖南旣特設鎮道卽不當專恃鄰省爲依傍惟事屬草創如該鎮道駐紮之處尙待兩江總督等酌定此時需兵則不能不仰給於金陵需餉則仍賴浙江爲協濟惟在不分畛域互相聯絡使可戰可守則地方日有起色該撫如有所見仍當隨時奏聞